

**NATIONAL ASSEMBLY OF
SEYCHELLES**

Thursday 16th March, 2023

The Assembly met at 0900am

National Anthem

Moment of Reflection

Mr Deputy Speaker in the Chair

MR DEPUTY SPEAKER

Bonzour tou Manm Onorab Lasanble Nasyonal. Tou bann *staff* Sekretarya e piblik Seselwa ki pe ekout nou nenport landrwa kot zot ete.

Byenveni pou kontinyasyon travay Lasanble Nasyonal pou sa Zedi 16 Mars. E prensipalman nou travay ozordi e osi demen se kontinyasyon repons bann Manm lo mesaz Prezidan lo Leta Lanasyon ki ti prezante isi dan Lasanble Vandredi pase.

Prosen *item* lo nou azanda se Prezantasyon bann Papye mon ava envit Madanm Deputy Clerk pou pran laparol.

MADAM DEPUTY CLERK

Mersi Mr Speaker. Bonzour tou bann Manm Onorab e tou *staff* Sekretarya e tou dimoun a lekout.

Lalis i long so bear with me. Mon pou komans avek bann S.I pou 2022.

S.I. 129 Seychelles Court of Appeal (Amendment) Rules, 2022

S.I. 130 Statute Law Revision (Preparation of Revised Edition of the laws of Seychelles) Notice, 2022

S.I. 131 Magistrates' Court (Civil Procedure) (Amendment) Rules, 2022

S.I. 132 African Development Bank Loan Agreement Order, 2022

S.I. 133 Road Transport (Restriction on Use of Tint Material) Regulations, 2022

S.I. 134 Business Tax (Amendment of Eighth Schedule) Regulation, 2022

S.I. 135 Seychelles Pension Fund (Benefits) (Amendment) Regulations, 2022

S.I. 136 Seychelles Pension Fund (Retirement) Regulations, 2022

S.I. 137 Social Security (Retirement Age) Regulations, 2022

E finalman pou 2022. S.I. 138 Revenue Administration (Business Registration and Declaration of Operation) Regulations, 2022

Larestan la i pou 2023.

S.I. 1 Land Reclamation (Retrospective Authority) (No.10) Order, 2022

S.I. 2 Early Childhood Development Act, 2022 (Commencement) Notice

S.I. 3 Seychelles Maritime Safety Authority (Fees) Regulations, 2023

S.I. 4 Seychelles Maritime Safety Authority (Identification of small vessels) Regulations, 2023

S.I. 5 Seychelles Maritime Safety Authority (Licences) Regulations, 2023

S.I. 6 Seychelles Revenue Commission (Amendment of Schedule) Regulations, 2023

S.I. 7 Licences (Amendment of Schedule) Regulations, 2023

S.I. 8 Licences (Diving Business) (Repeal and amendment of Schedule of the Act) Regulations, 2023

S.I. 9 Licences (Trade) (Amendment) Regulations, 2023

S.I. 10 Merchant Shipping (Local Certificates of Registry) (Amendment) Regulations, 2023

S.I. 11 Merchant Shipping (Manning and Certification) (Amendment) Regulations, 2023

S.I. 12 Merchant Shipping (Registration of Non-Government Ships) (Amendment) Regulations, 2023

S.I. 13 Seychelles Home Care Agency Act, 2022 (Commencement) Notice, 2023

S.I. 14 2.70% Three Year Treasury Bond Debt Order, 2023

S.I. 15 4.30% Five Year Treasury Bond Debt Order, 2023

S.I. 16 5.90% Seven Year Treasury Bond Debt Order, 2023

S.I. 17 Fair Trading (Practice and Procedure of the Tribunal) Rules, 2023

S.I. 18 Access to Information (Proactive Disclosure and Mandatory Publication) Regulations, 2023

S.I. 19 Land Reclamation (Retrospective Authority) Order, 2023

S.I. 20 2020 Development (Seychelles) Limited Debt Guarantee Order, 2023

And finally,

S.I. 21 Seychelles Maritime Safety Authority (Identification of Small Vessels) (Repeal) Regulations, 2023

Mersi Mr Speaker.

MR DEPUTY SPEAKER

Mersi Madanm Deputy Clerk. E byensir pou lenformasyon piblik tou sa bann S.I. i pibliye lo gazette.sc pou bann ki le plis lenformasyon konsernan sa bann S.I.

Avan ki nou *proceed* avek larepons bann Manm, Dirizan Lopozisyon ti'n demann mon pou li permisyon pou lev en *matter of privilege* bomaten.

HON SEBASTIEN PILLAY

Mersi Mr Speaker e bonzour tou koleg Onorab. E byensir bonzour tou dimoun ki a lekout.

Mr Speaker mon *matter of privilege* pou bref. Mon en pe dezapwente me selman mon bezwen *raise* li aköz i kapab ariv avek nenport Manm Lasanble ki koze *next time*.

Yer swar dan Nouvel 8er ler pe pas ekstra lo *extract* lo mon diskour, tou dimoun i kapab vwar ki mon'n tande i lo *You Tube*, i lo *website* Lasanble.

Me par kont, *SBC* e sa zournalis ki'n fer sa raportaz in *misrepresent* serten fraz ki mon'n dir a serten moman.

Kot ler mon pe koz lo re negosyasyon bann Lakor Lapes, en fraz in ganny ensere kot i dir poudir mon ti donn langazman ki Gouvernman *US* pa pou fer sa. Me sa fraz i pa sipoze la. En *editing* in ganny fer pou tir sa fraz kot i sipoze ete. Sa fraz ti vin an relasyon avek sa ki mon ti dir ki konsern *PMC* pe al rod son prop kanmiyon *sewage*.

E mon ti pe fer referans avek lenterferans Gouvernman

dan *private sector*. E la mon ti dir sa fraz ki la. Mon ti dir ki 'pourtan Gouvernman *US* ti donn zot langazman pa pou fer sa'.

Mon dezapwente Mr Speaker ki sa in ganny fer. Mon pa konnen pou ki rezon in ganny fer. Me mon swete ki dan le fitir sa bann kalite *editing* pa ganny fer zis pou sey *misrepresent* sa ki en dimoun in dir dan Lasanble.

Mon remerisi ou Mr Speaker.

MR DEPUTY SPEAKER

Mersi Onorab. Mon'n regard sa eksre ki *SBC* in pase dan Nouvel. Mon'n osi regard son orizinal. E parey ou'n dir i en keksoz ki kapab ariv avek lezot Manm, so mon *advice* ki mon ti ava donn ou se pou ou aktyelman ekrir formelman *SBC* e met ou konsern lo an ekrir.

CC li to *Media Chairman* ki Onorab Woodcock. Me ou bezwen kre sa lasal redaksyon, me 'cc' osi *CEO* avek *Chairman Board*. Aköz i enportan ki, *CEO SBC* in vin isi li menm in dir nou dokimant sa bann lenstans kot nou annan *issue* avek *SBC*.

Aprè esper en larepons aköz mon krwar I - par lefe ki *SBC* prezan in fer li tradisyon pou raport spesifikman lo ou

diskour e osi pou *LGB*. So, i en keksoz ki zot in pran en desizyon editoryal e zot dwatet annan en larepons lo la.

So mon ti ava *advise* ou pou ekri zot formelman, met sa protestasyon e regarde ki larepons zot donnen. Mersi.

HON SEBASTIEN PILLAY

Mersi Mr Speaker. Annefe mon ti ankor pe travay *around* 11er diswar koumsa e ler mon'n reget Nouvel e mon'n regete, ki mon'n realize poudir sa in ganny fer.

E mon'n deswit osi anvoy sa 2 *video* kot *SBC* pou zot kapab vwar. Akoz mon ti pou bezwen al eksplike kot in ganny fer me sa 2 *video* i kler.

Mon oule remerisi nou bann teknisyen Lasanble ki fer tou pou fer sir ki Lasanble i reste *live* e ki nou kapab toultan vwar kwa ki'n ganny dir dan Lasanble. E sertenman mon krwar sa ki ou'n dir i enportan.

Resaman nou'n annan menm sityasyon lo kote *US*. Me mon pa pou al dan sa bann detay la ozordi bomaten. Me sa ki mon kapab dir se ki nou espekte, nou espekte ki en travay i ganny fer pou *avoid misrepresent* sa ki Manm in dir. E sertenman en konplent formel in deza fini ganny fer

avek *SBC* e i pou *followed up* lo la.

E mon ti ava apresye si *SBC* ti ava kapab a en lot moman koriz sa. Mon remerisi ou Mr Speaker. Mon pa le retard travay Lasanble plis bomaten.

MR DEPUTY SPEAKER

Mersi Onorab. Donk nou ava *proceed* aprezan avek bann repons. E premye entervenans ki mon pou kriye bomaten se Onorab Naddy Zialor.

HON NADDY ZIALOR

Mersi Mr Speaker. Mr Speaker, *Leader* Zafer Gouvernman, *Leader* parti minoriter, Ser koleg Manm Lasanble, Ser, frer Lepep Seselwa, bonzour.

Diskour Leta en Nasyon i i en lobligasyon kot *Sef d'État* i donn en bilan lo leta e sityasyon son pei. Ki swa ekonomikman, sosyalman e egalman fer resorti bann defi ki pei pe fer fas avek.

Devan Lepep Seselwa, Prezidan Wavel Ramkalawan in vin dan tout lonnekte e dan tout fransiz, pou adres Lepep Seselwa Vandredi le 10 Mars isi dan nou Lasanble. Kot mwan koman en Manm mon'n apresye. Kot Lepep Seselwa dan son gran mazorite in apresye.

Lepep Seselwa in apresye ki en vre Dirizan in vin dir nou

dan nou zorey sa ki nou ti bezwen tandé, sa ki nou merit tandé konman en pep. E sa se vre Leta nou Nasyon.

Ser, frer, Lepep Seselwa nou sorti lwen, nou sorti tre lwen. Leta Lanasyon 2023 in sa koudanwa ki ankor enn fwa pe demann avek mwan, pe demann avek ou, pe demann avek sakenn de nou pou nou inifye nou lafors, inifye nou kouraz pou fer Sesel bouze. Sa Sesel i sa Sesel yer, i sa menm pei apele Sesel ozordi. Wi Mr Speaker, Sesel.

Ozordi nou ki ti deklare ki nou en vre patriyot. E nou ki ti dir annou met Sesel premye. Ki Sesel i pas avan tou. Nou pe demann avek ou pou donn lanmen fer sa sanzman. Pou vin sa sanzman e pou rod fason e non pa, pou rod fason pou detri li zis aköz pouvwar.

Mr Speaker, ler mon dir ki nou sorti lwen, mon realize ki anba sa nouvo Ladministrasyon in annan bokou lekspektasyon, bokou lakonplisman. E wi bokou kanser ki nou'n erite ki nou bezwen rod solisyon ansanm. sa pou permet ki pei i progresse e ganny prosperite.

Bomaten mon ladres Leta Lanasyon mon pe adres avek bokou pozitivite. E mon vize ver solisyon.

Devan mwan, mon'n vwar en Dirizan ki pe travay san ses pou byennet Sesel. En Dirizan ki ler in pran ladministrasyon in fer tou pou sakouy bann lapousyer ki ti'n kale lo *file*. Resisit bann proze ki ti dan koma e tanzantan ti ganny releve zis detrwa mwan avan eleksyon.

Ki wi ozordi, bokou in ganny materyalize. Non pa 2000 zanmen, me dan 2an zis apre ki nou'n pran sa ladministrasyon. E wi nou'n koup riban.

E la mon anvi dir sak riban ki ganny koupe, i en lakonplisman pou Sesel. En Sesel ki nou tou nou form parti ladan.

Renovasyon *NIHSS* Mr Speaker, i en lakonplisman pou Sesel. Ozordi bann etidyan i dan en lanvironnman pli konvenab e mon pe antisipe ki zot ava ankouraze pou zot viz zot karyer ver byennet lasante Lepep Seselwa. Wi en lakonplisman pou Sesel.

Letan mon tann koz lo nouvo terminal Praslin - louvertir sa terminal, wi en lakonplisman pour Sesel. Viziter koman Seselwa, menm mwan menm mon'n rekonnet e eksperyans en tel devlopman Mr Speaker.

Letan mon pe koz tir lapousyer lo *file*, mon mazin renovasyon Libreri Nasyonal. I en lakonplisman pour Sesel Mr Speaker.

Bann lenfrastriktir Lapolis ki pe ganny fer renovasyon lo la, ki'n konplete. Lapousyer ki ti lo *file* Mr Speaker, tel konman Baie Lazare, La Digue e byento Glacis, i en lakonplisman pour Sesel Mr Speaker.

Pou fer ki, ozordi i fer ki nou bann polisye zot dan en lanvironnman pli konvenab. E la lo non tou pep Seselwa, mon tir mon sapo avek Lafors Lapolis Sesel, pour sa travay ki zot pe fer pou anmenn solisyon an se ki konsern kriminalite dan nou pei.

Kot ozordi sitwayen i ganny met azour lo bann ka ki pe ganny raporte e plizoumwenn satisfè avek bann solisyon lamazorite letan. En Lafors Lapolis ranpli avek lazènes Seselwa. Ki nou bezwen kontinyelman pe donn zot lankourazman pou sa travay ki zot pe fer.

Olye krwaz lanmen kritike, mwan mon a dir avek zot annou donn lanmen travay ansanm avek Lafors Lapolis dan nou kominote, pou nou anmenn meyer solisyon Mr Speaker.

Letan mon pe koz lakonplisman pou Sesel, mon mazin bann proze lakaz ki'n ganny konplete. E la sa fanmir ki'n bezwen esper li plis ki 20an pou vwar en sourir lo son figir. Sa i en lakonplisman pour Sesel Mr Speaker. E sa i reasir komitman nou Gouvernman, pou rod solisyon pou lafanmir Seselwa.

Ser koleg, ser pep Seselwa annou aplodir letan Sesel i akonpli. Parske letan Sesel i akonpli, nou osi nou akonpli. Non pa rod fason negativ pou rode ki fason pou fer Gouvernman *fail*.

E la fodre mon dir, i annan en kalite latitid ki pe sey ganny anzandre dan leker bann endividi. Olye fer sa pep atrap lanmen kanmarad, atrap lanmen son frer e travay ansanm, i annan en pti group ki kontinyelman senm laenn, senm zalouzi, fer rankin e rod fason pou detrir lakonplisman son frer e lakonplisman son pei Mr Speaker.

Sesel i pour tou son zanfán. Sesel i pli gran ki mwan i pli gran ki ou, i pli gran ki nou tou. Sa ti zot *motto* Mr Speaker.

E alors, aköz ki nou bezwen fer konplo pou met bonm? Aköz ki nou bezwen rod fason pou detri lazènes avek lenportasyon drog? Aköz ki nou

bezwen senm laenn ek rankin zis akoz lanbisyon pou retourn o pouvwar?

E la mon anvi adres lazenes Seselwa. Lazenes Seselwa nou, nou sa nouvo zenerasyon. Mon pou demann avek zot annou regard Sesel pli gran, annou met Sesel pli o.

Mon'n tann dir isi dan sa Lasanble, ki nou Gouvernman e Prezidan pa'n koz ditou lo lazenes Seselwa. Permet mwan - lazenes Seselwa i fer fas avek bokou defi. I annan ki krwar ki ler en zenn pe progrese, zot vwar sa zenn konman en baryer. Zot vwar sa zenn konman en menas pou zot pozisyon. Se akoz sa zenn kekfwa i vwar keksoz dan en lot perspektiv. Mwan mon konn sa tre byen.

Ozordi mon anvi dir avek lazenes Seselwa, napa nanryen ki enposib si ou persevere. Si ou gard ou vizyon lo ou misyon. Si ou gard ou rev ver prosperite e non pa lo negativite e tapaz ki otour. Sa zenerasyon yer, i pa menm zenerasyon ki la ozordi.

E la mon anvi felisit sa nouvo *cohort* Lasanble Lazenes elekte par zenn, pour zenn. Diferans pou konmans avek zot. Mon profite pou remerci sipor Lofis Komisyoner Britanik pou ede fer sa transformasyon materyalize.

Bokou fwa mon'n dir dan sa Lasanble, annou met *focus* lo keksoz pozitiv ki lazenes Sesel pe fer. Bann keksoz inovativ, lespas pou zenn vin pli kreativ pou nou zenn.

Pou nou zenn ki'n la resaman i fer leksplozyon pozitiv dan pei. Leksplozyon dan bann diferan aplikasyon teknoloji kree par zenn. La mon mazin *LinkUp* ek *SeyBooking* e lezot. Nou bezwen donn zot tou lankourazman.

Mr Speaker, ozordi bokou zenn pe angaz zot dan bann sport, dan bann lekip lo nivo distrik e lo nivo nasyonal. Zot pe ekspoze dan bann tournwa enternasyonal e rezyonal. Wi Prezidan ti koze lo la. Nou bezwen kontinyelman pe donn zot sipor, donn zot lankourazman. E sa Mr Speaker, i en lakonplisman pour Sesel.

Letan Prezidan Larepublik i tir sapo pou nou bann zenn ki partisip dan *CJSOI*, sa i fer Sesel fyer, tre fyer. I en lakonplisman pour Sesel Mr Speaker. E la mon a dir ki Gouvernman i merit kontinyelman investir dan potansyel sportif lazenes Seselwa.

Mon anvi kontinyen koz lo lazenes. E la mon anvi koz lo sa dinamik *Leadership* an se ki

konsern lazenes Sesel. En nouvo *leadership* dan *SNYC*. Bann nouvo nide inovativ kree par zenn pou lazenes e lazenes Seselwa.

Mon salye bann tel linisyativ e mon swete ki tou travayer Konsey Nasyonal Lazenes, i ede pou ansanm anmenn sa bann transformasyon pozitiv ki sa Konsey, pour sa Konsey la ki zot pe selebre zot 25enm laniverser.

Donn lezel lazenes Seselwa. Ankouraz lazenes Seselwa. Donn zot loportinite, fer zot vin pli endepandan. Mr, Speaker sa i lakonplisman pour Sesel.

Pandan ki mon'n la dan sa Lasanble e pandan ki *LDS* in pran ladministrasyon, mon'n vwar osi en transformasyon an sa ki konsern lanplwa Mr Speaker.

E la fodre mon dir, mon vwar bann linisyativ kot bann *training* in ganny kree sirtou pou bann zenn ki'n termin zot lekol segonder me pa'n ariv dan pos segonder. Kot zot ganny bann *training* e bann sertifika ki permet zot ganny bann labaz pou zot rantre dan lanplwa. Mon salye Departman Lanplwa pou sa.

Sepandan mon anvi fer en lapel avek Sekter Prive, nou bi

se redwir depandans lo lafors travayer etranze. Alors mon dir avek zot, annou rod fason pou ranforsi sa partenarya avek Departman Lanplwa, pour ki nou bann zenn i fasilman ganny en plasman. E ki Sesel i reisi.

Mon osi rekonnnet travay ki pe ganny fer an se ki konsern *succession plan* vizavi bann etranze ek Seselwa. E la mon ava dir ki annou regard osi bann potansyel ki annan dan lanplwa li menm, pou sa zenn ki dan travay ki parfwa i santi li dekouraze zis aköz *mindset* serten dimoun ki pa krwar dan inovasyon e pe refize form parti sa transformasyon.

Permet mwan koz lo Servis Piblik, Mr Speaker. Bokou in ganny dir depi yer. Mon zwenn avek Prezidan Larepublik pou salye tou travayer Seselwa dan Servis Piblik. Ki pe travay sanses pou fer sir ki ler en endividi i vin devan li, i rod solisyon.

Pare pou eksplik sa dimoun kwa ki i merit fer, kan ki i merit fer. E donn sa dimoun en mizazour vizavi son *file*. Sa i bann kalite ki nou merite e ki nou bezwen isi Sesel, Mr Speaker. Ki nou bezwen dan nou ladministrasyon.

Me lefe i reste ki wi in annan fristrasyon. Fristrasyon Mr Speaker. Fristrasyon dan

servis Gouvernman ki apre ki mon'n ekout bann Manm lo lot kote latab, i kler ki sa fristrasyon pe ganny fer entansyonnelman Mr Speaker.

E la mon ava dir, i annan enn de zot ki ti ganny anvoye lo en misyon. Pa mwan ki ti dir, zot ki ti dir. Zot ti ganny anvoye lo en misyon. Misyon sete fer politik dan travay. Vwala kote fristrasyon i vini Mr Speaker. Serten, zot, zot bonzour, se zot pa pe travay pou Prezidan Wavel Ramkalawan, solman zot dan Servis Piblik.

Zot, zot zournen ki manner i plen se rode keler e lekel ki'n vin kote e met retar pou sa bann piblik. Fer li fristre e pli tar zot zwe inosan e zot rod tou leskiz aköz en keksoz pa'n ganny fer.

Wi Onorab atraver ou Mr Speaker, nou menm nou bann Manm Lasanble nou'n pas atraver. Aköz? Aköz letan nou vir nou ledo par deryer ou tann dir "Mwan mon pa pe pran son traka, mwan mon pa pe vin travay avek okenn *LDS!*".

Mr Speaker, sa bann tel latitud nou'n fatigue. Lepep Sesel in fatigue. Sa bann tel mantalite nou'n fatigue. Silvouple annou aret met retar sa Gouvernman.

(APPLAUSE)

HON NADDY ZIALOR

Si zot anvoye fer konpany kont Gouvernman e fer piblik fristre, silvouple al travay kot sa biro ki'n anvoy zot fer politik e laba zot ava fer tou zot politik dan sa menm biro.

I pa akseptab pou annan bann tel latitud kot en kliyan i vin devan ou e ou demann avek li, "Toulezour ou menm?". I pa akseptab Mr Speaker.

I pa akseptab pou ler en kliyan i vir ledo devan ou, ou dir avek ou koleg "Pa i ti al tik anler, i ti krwar mon pa pou la, mwan menm ki ankor la e mwan menm ki i pou vwar!". I pa akseptab Mr Speaker.

I pa akseptab pou ler en travayer aköz i annan problemn personal avek en kliyan, i refize donn sa kliyan servis. Tir son non dan sistenm zis aköz problemn personnel e lopinyon politik Mr Speaker.

Letan en *public servant* i deside pou denigre e mank respe pou Sef d'État devan manm piblik dan sa Departman ki i pe travay, sa napa plas dan sa Gouvernman Mr Speaker.

Alors mon a dir avek zot, mon a dir avek ou, ler ou travay dan Servis Piblik ou bezwen annan lentere Sesel a ker. Si ou ankor krwar ki parti Gouvernman i parey ti ete o paran, silvouple sed la plas pou

en lot ki annan Sesel a ker e ki anvi ki sa Departman i prospere e bouz devan e non pa *fail* Mr Speaker.

Mon pa pou kapab fer mon diskour san ki mon koz lo en keksoz ki pre kot mon leker. Mr Speaker, i annan en *motto* ki dir '*There shall be nothing about us without us*'.

I fer mwan fyer ler mon vwar en ladministrasyon kot dimoun ki pe viv avek en dezabilite i reste en priyorite. Kot bann ki annan en abilite spesyal, pe fer tou pou zot sirmont zot defi e progre dan lavi. Kot Sesel ozordi nou pe koz pli bokou ek plis lo drwa bann dimoun ki pe viv avek en dezabilite.

Tre souvan pa tou ki konpran sa lalit, pa tou ki konpran sa legalite. Pa tou ki konpran sa transformasyon. Pa tou ki konpran rezondet solisyon.

Lefe i reste ki nou ankor annan serten baryer e defi ki nou bezwen fer fas avek e sirmonte. E mon konstate ki sa pa pou ariv dizour ou landmen. Sel fason pou nou arive fer li se ki nou travay ansanm. Se ler lentere sa group dimoun i ganny mete premye dan tou sa nou fer. Annou fer li pou Sesel, Mr Speaker.

Letan en zenn ki pe viv avek en dezabilite, i termin son letid dan *mainstreaming* malgre tou defi ki'n in pas ladan e i annan loner pou son paran e li menm. Sa i en lakonplisman pour Sesel, Mr Speaker.

Letan en zenn ki annan en abilite spesyal, i sirmont tou defi dan atletik e anmenn en meday lor dan lakour, sa i anmenn loner pou sa paran e sa zanfan. Parske in sirmont tou defi. Sa i en lakonplisman pour Sesel, Mr Speaker.

Wi letan en fiy, en garson 11an son paran i dir avek ou i annan bokou letan i pe esper en *wheelchair* pour ki son zanfan i kapab sorti deor e viv sa enklizivite avek bann lekipman adaptativ. E wi donnen par Prezidan Larepublik. Sa i en lakonplisman pour Sesel, Mr Speaker.

(APPLAUSE)

HON NADDY ZIALOR

Letan mon vwar en zenn en zenn Pedro Lavigne, in fer sitan byen dan son disiplin sportif. Sirmont defi, anmenn meday lor pou Sesel, sa i en lakonplisman pour, Sesel Mr Speaker.

Wi, letan mon vwar en fiy, en frer, en manman ki'n grandi e fer son zanfan ki li menm li i

annan en dezabilite. E i decide antre dan en biznes pou zener reveni pou li viv endepandan san ki i depan lo sistenm, Sa i en lakonplisman pour, Sesel Mr Speaker.

Zis parey letan mwan mon pe asiz dan sa sez, pe koz lo bann size ki pou anmenn solisyon pou pei e donn lanmen pran desizyon, pa pou mon laglwar Mr Speaker me pou byennet nou Nasyon Seselwa. Sa i en lakonplisman pour Sesel, Mr Speaker.

Mon anvi salye tou bann mouvman, groupman, lasosyasyon ki pe travay sanses pou fer en diferans dan lavi nou bann frer ek ser. Bann lasosyasyon tel konman *Blind Association*. Lasosyasyon bann Dimoun Sourd, Ms Anita Gardner ki vreman mon konnen in fer bokou e i pe fer bokou.

Mr Faure, Mr Christian Faure ki fek pran responsabilite Lasosyasyon Otizm kot nou'n ganny partaz diferan pwennvi e solisyon vize ver lavenir. Mon swete ki ansanm nou ava kapab ede anmenn sa transformasyon e solisyon Mr Speaker.

Wi, mon'n nonm Lasosyasyon *Blind and Visually Impaired* anba gidans Ms Brigitte e Ms Rosabelle ek son tim ki fodre mon dir, pandan

lannen pase bann letan ki zot in aktiv zot in anmenn bokou program pou *empower* sa kominote Mr Speaker. Sa i en lakonplisman pour Sesel.

Bann zenn parey mon'n dir ki dan *sport*, kot mon konnen zot paran ek zot *coach* i donn zot bokou sipor, bokou lankourazman. Zot fer li avek pasyon ek pasyans. Sa i en lakonplisman pour Sesel, Mr Speaker. Ki travay avek en pasyon pou reisi.

Lasosyasyon bann dimoun ki pe viv avek en Dezabilite anba gidans Ms Jourdane, ki regard byennet bann dimoun lo nivo kominoter, Mr Speaker. Sa i en lakonplisman pour Sesel.

Sepandan, mon konnen e nou konnen e Sesel i konnen. Ki i annan ankor en kantite defi ki nou pe fer fas avek. En kantite baryer. Se pour sa rezon ki tou dimoun i bezwen travay ansanm dan lentere Sesel, pou nou bann dimoun ki pe viv avek en dezabilite, Mr Speaker.

Mon akey lanons ki bann *weights ASP* in ganny revize. E la in annan bokou politik ki'n ganny fer lo sa size. Mwan sa ki mon'n toultan lager e ozordi mon fyer, se ki Gouvernman in anonse ki bann dimoun ki annan en dezabilite permanan zot lasistans pou prezan lavi

diran olye raport kot Dokter tou le 2an pou renouvle Mr Speaker. Sa i montre komitman nou Gouvernman vize ver en solisyon. E vize ki personn pa pou ganny kit deryer.

Wi, nouvo Lazans *Carer* ki pou efektiv komansman April, i ava anmenn en lot standard dan sa servis anba direktiv Departman Lafanmir. Mon swete ki nou tou nou travay ansanm pou fer sa Lazans reisi.

Mr Speaker, lespwar ki mon ti annan 2020 pou Sesel, i menm lespwar ki ankor sa konpa ki pe gid mwan e ki pe gid nou, pou travay dan lentere Sesel e Lepep Seselwa.

I sa menm lespwar ki pe gid nou pou Sesel progresse. Napa plas pou laenn. Napa plas pou vanzans. Napa plas pou asasinasyon karakter en endividi. Napa plas pou rankin. Napa plas pou traizon. Napa plas pou bat nou frer.

Sel keksoz ki nou pe demann zot se travay ansanm. Travay pou Sesel. Travay pou ou kominote. Travay pou byennet sa pep. Travay ver sa sanzman, pour sa sanzman. Pour ki Sesel i tras sa larout ki ou avek mwan nou ti form parti ladan an 2020.

Pa bezwen zis krwaz ou lanmen e esper rezouir sanzman. Me ou bezwen form

parti pou fer sa sanzman arive Mr Speaker. Lentere Sesel i pas avan tou. Lentere ou pei i pas avan tou. Non pa pouvwar Mr Speaker.

Mon kontinyen travay dan lentere sa pep. Nou Gouvernman pou kontinyen travay pou Sesel malgre tou baryer, malgre tou frontyer. Nou pou fer li pour Sesel e pour lakonplisman Sesel. Mwan mon pa pou zanmen les tonbe. Mersi Mr Speaker.

(APPLAUSE)

MR DEPUTY SPEAKER

Mersi Onorab Zialor. Mon vwar lanmen Dirizan Lopoziyon anler.

HON SEBASTIEN PILLAY

Mersi Mr Speaker. Mr Speaker, mon pa pe al dir naryen lo sa ki garson Mr Rene in dir. Me selman ...

MR DEPUTY SPEAKER

Non, non, non, Onorab sa i pa akseptab, i apel Onorab Naddy Zialor.

HON SEBASTIEN PILLAY

Uh ok be si li i apel Onorab Naddy Zialor, mwan mon apel *Leader* Lopoziyon dan Lasanble Nasyonal.

So, ler in komans son *speech*, lo son *speech* in komanse in dir ek mwan koumsa, in adres mwan koman *Leader* parti minorite dan Lasanble.

MR DEPUTY SPEAKER

I en tradisyon ...

HON SEBASTIEN PILLAY

Mon form ladres dan Lasanble i *Leader* Lopozisyon. Me si parey ou'n dir mon ler mon'n dir li garson Mr Rene, ou'n dir mwan poudir i apel Onorab Naddy Zialor, li i devret osi annan respe.

Ou pa kapab kasyet deryer en dezabilite pou fer malelve. I senp, i senp Mr Speaker, ...

MR DEPUTY SPEAKER

Non-non Onorab, la ou pe ...

HON SEBASTIEN PILLAY

... mon pa oule fer en *issue out of* sa. Sa ki mon le dir se ki ladres formel dan Lasanble i *Leader* Zafer Gouvernman e *Leader* Lopozisyon. Speaker ler ou dan *Chair*, Deputy Speaker ofisyelman ler ou pe fer en keksoz. Onorab Henrie si ou pe koz lo *behalf* Mont Buxton. Speaker Mancienne i Speaker Lasanble, koumsa i ete.

Dan mon *speech* mon'n refer avek Prezidan Larepublik. Mon pa'n donn li okenn lezot non, mon pa'n donn li okenn derogasyon. Ler mon refer to en Manm mon refer to bann *MNA*.

So mon'n refer to li as garson Mr Rene pou regard ou reaksyon. E ou pa'n kontan mon'n apel li koumsa. Me selman ou'n aksepte pou li donn mwan en lot non.

So, si sa i standar Lasanble nou ava ganny en gidans kler lo la. Konmsi pa ankoler ek mwan mon'n zis montre ou, petet mon'n tant ou, mon'n anvoy en pyez kot ou al ladan. E ou'n deswit reakte prezan mon'n ganny sa pwen lo ou.

MR DEPUTY SPEAKER

Non, non. Ou pa'n. Onorab, ok ...

HON SEBASTIEN PILLAY

Me dan Lasanble koumsa i marse sa ou konpran?

MR DEPUTY SPEAKER

Onorab *ok*, ou'n fer le pwen mersi. Solman mwan mon pa'n dir li naryen aköz nou en Manm *Commonwealth*. E i en tradisyon dan *Commonwealth* pou apel parti *Lopozisyon minority party and majority*

party. I pa pe envant en mo li.
Mersi.

(APPLAUSE)

MR DEPUTY SPEAKER

Prosen entervenans lo lalis i Manm Elekte pou Distrik Anse Boileau Onorab Phillip Arissol. Mersi.

HON PHILLIP ARISSOL

Mersi Mr. Speaker. Bonzour Mr Speaker, bonzour tou bann koleg Onorab. Tou dimoun ki pe ekout nou e tou zabitan Anse Boileau spesyalman.

Mr Speaker, la ki Gouvernman LDS i antre dan 3em lannen son manda, nou pei Sesel in sanze. Wi Mr Speaker, Sesel in vreman sanz pour le meyer. Sa i montre langazman en lekip serye ki pe travay pou son pep.

Me i domaz ki i annan serten dimoun menm si zot annan lizye, zot refize vwar ou fer krwar ki zot pa vwar naryen byen ki pe arive. I osi annan en group dimoun ki ti byen plase dan Gouvernman presedan, zot vwar sa bann sanzman, me zot kontinyen anbet en group dimoun ki krwar dan zot pou pa vwar, pou vwar zis sa ki mal.

Zot pe donn lenpresyon ki sete LDS ki'n o pouvwar pandan

sa 43an. Bokou i bliye ki nou fek antre dan lofis e napa 3an.

Pandan sa 2an edmi LDS in travay e diferans ant sa ladministrasyon e sa enn presedan, se ki ladministrasyon LDS, dan plas konplent e fer leskiz, nou plito vin ansanm, travay dir, rod solisyon e re-etabli sityasyon dan nou pei. E lakantite ki nou'n fer i montre langazman sa ladministrasyon serye.

Mr Speaker, i annan bokou keksoz pozitif ki'n arive pandan sa 2an edmi, tel ki trezyenm mwan saler baze lo performans. Sa pou garanti ki Sekter Servis Piblik, travayer i perform e ogmant produktivite, avek bi retir sa latitid trenn lipye.

Revizyon dan *weights* pou lasistans *welfare*. Sa pou fer sir ki sa ki bezwen lasistans *welfare* i kapab kalifye. Konsesyon dan karbiran pou bato *cargo* ki deservi nou bann zil. Sa pou fer ki komodite e materyo konstriksyon i kout menm pri ki Mahe.

Dediksyon R300 lo *bill* elektrik. Sa pou asire ki bann fanmir ki pli vilnerab i kapab pey zot *bill* ariv lafen di mwan. Etidyan dan 17 pei i benefisyavek 10 poursan logmantasyon dan zot *stipend*. Sa pou asire ki etidyan dan 17 pei an kontan

Sesel, pou kapab kouver zot depans vi ki apre lestimasyon kou lavi i'n ogmant par 10 pousan globalman.

Mr Speaker, lalis i long e Gouvernman pe travay, sa Gouvernman pe rod solisyon pou amelyorasyon, sa Gouvernman pe travay dir pou met larzan dan pos Seselwa.

Mr Speaker, fakter prensipal ki fer ki kou lavi i kontinyelman monte i an deor kontrol Gouvernman e sa i annan, sa i annan pou fer avek lefe ki *COVID 19* i'n anmennen e osi lager ant Larisi ek *Ukraine*.

E pli gro konsern sa Gouvernman se pou rod solisyon e soulaz nou pep. Avek bi pou kontinyen fer desann kou lavi, boner sa lannen Gouvernman *LDS* ti rezet en demann pou anpes lavant marsandiz an gro avek piblik, sa ti ganny fer dan lentere nou pep. Sa desizyon ti vin apre demann Lasosyasyon bann Marsan ki vann an detay pou anpes konsonmater aste marsandiz avek bann marsan ki vann an gro.

Mr Speaker, sa i pa en mezir kont boutikye, me senpleman en desizyon pour ede gard pri lavi osi ba ki posibil. Sa ankor enn fwa i montre pozisyon sa Gouvernman dan sa lager kont pri lavi.

Sa ladministrasyon i apresye e rekonnèt kontribisyon ki marsan ki vann an detay pe fer dan nou kominote. Nou pe osi profite pou demann zot pou travay ansanm ek Gouvernman pou rod fason pou ede soulaz lavi sa pep, e note ki konsonmater i devret lib pou depans son larzan kote e ki mannyer zot, zot anvi.

Mr Speaker, avek bi pou fer sir ki tou dimoun ki vreman dan bezwen i kapab ganny lasistans *part rental*, e pou evit bann labi lepase, i enportan ki sa prosedir i ganny fer dan en lankadremman ki kler e ki zis. I malere pou vwar ki i annan serten dimoun ki pa pe ganny lasistans ozordi, menm si zot merite, aköz serten mankman dan bann dokiman nesese pou ki zot kapab kalifye anba sa programm.

Lentansyon Gouvernman se pou amelyor sa sistenm ki egziste ozordi, pou fasilite lasistans pour bann ki vreman dan bezwen.

An sa ki konsern lakaz e later, parey tou lezot distrik, Anse Boileau i ankor annan bokou demann. Travay pe ganny fer pou idantifye en *site* kot ankor 6 lakaz a kapab ganny konstri pou konplet sa

24 lakaz dan proze Lakaz Lafous ki date depi 2018.

Mr Speaker, an 2023 Anse Boileau pou vwar komansman proze pou konstri 24 lakaz Anse Louis, *ex-Zelia*. Avek sa proze ankor plis fanmir nou distrik a benefisye avek zot prop lakour, sa proze i espekte konplete dan milye 2024.

Proze *landbank* Montagne Posée, i ankor annan retar. Sa i vin atraver difikilte pou kapab ganny *wayleave* pou konstriksyon semen ki pou deservi sa *landbank*. Mr Speaker, sa proze i kapab demare si zis sa bann propriyeter ti kapab tonm lo en lagreman ki a benefisye tou le de part. Sa *landbank* i annan 11 kare later e sa ti pou benefisye 11 fanmir dan nou distrik.

Boner sa lannen apre ki movetan ki Anse Boileau in eksperyanse, mwan avek Vis Prezidan nou ti fer en vizit pou enspekte mazorite landrwa ki abitye ganny afekte par linondasyon pou vwar si sa proze drenaz pe fonksyon byen. E sa fwa avek bon planifikasyon e aksyon, mazorite zabitan Anse Boileau sirtou bann ki toultan ganny afekte avek linondasyon, ti vwar en soulazman.

Nou remersye Gouvernman pou sa bon planifikasyon e aksyon apropiye pou finalman vwar en solisyon ki nou distrik pa'n ganny tro afekte sa voyaz avek sa movetan.

Mr Speaker, mon vreman fyer pou vwar ki nou bann ansenyan e etidyan lekol segonder Anse Boileau, menm si zot pe pas atraver bokou difikilte tel ki en mankman ansenyan, mankman dan partisipasyon paran dan ledikasyon zot zanfan. Menm *porte ouverte* ki lekol i organize zot prezans i vreman ba.

Renovasyon lo vye *block* S3 e S4 ki ti sipoze ganny fer anba *Indian Grant* boner an 2020, sa pa ankor arive. I annan mankman dan lekipman *ICT*, nou lekol segonder i annan selman 2 lasal konpiter avek 40 konpiter, pou en popilasyon 630 zelev, e sa i fer ki en pe etidyan S1 a S3 pa kapab fer serten sesyon pratik aköz priyorite i ganny mete zis S4 e S5.

Mr Speaker, i osi annan mank fasilite sportive pou bann etidyan, tel ki en *stand* e en *rim* pou *basketball*. Kantmenm sa, parey mon'n dir mon vreman fyer pou nou Lekol Segonder Anse Boileau. Aköz malgre tou sa defi e difikilte ki bann

etidyan pe pas atraver, sa bann etidyan pa'n dezespere, zot in persevere. E tou etidyan S5 ki'n asiz pou legzanmen *IGCSE* an 2022, in reisi prodwi tre bon rezilta e zot tou zot in *pass*.

E en zelev an partikilye in resevwar 6 A* e en A e sa i Vaidik Jayesh e in meyer etidyan pou lannen 2022. Mr Speaker, se sa ki apel determinasyon.

Mon ti a osi kontan felisit Dylan Freminot ki'n ganny elekte pou reprezant Lekol Anse Boileau Segonder dan Lasanble Lazenés.

Lekol primer Anse Boileau, i en parmi enn bann pli vye lekol e i demann en renovasyon mazer, ou konstriksyon en nouvo blok. Etidyan sa lekol napa en *hall* kot zot kapab zwe anndan pandan letan lapli, ouswa en landrwa apropiye pou fer *meeting* avek bann paran sa bann etidyan. I osi annan problem desarz ki fodre ganny rektifye osito ki posib.

Me malgre tou sa bann problem, bann etidyan P6 lekol Anse Boileau ki ti fer Legzanmen Nasyonal in sorti avek bon rezilta e en zelev Estelle Anacoura i parmi sa 5 meyer dan pei, e in osi ganny 100poursan pou matematik. *Bravo Estelle!*

Mr Speaker, ler nou vwar bann bon rezilta nou bann zanfan, mazorite fwa i vin atraver bon korperasyon bann paran ki met bokou lentere dan travay zot zanfan. Mon ti a kontan felisit bann etidyan primer e segonder, tou bann ansennyan e osi bann paran.

E mon fer en demann, ki plis paran nou met lentere dan ledikasyon nou zanfan. I kapab dan size akademik ouswa size vokasyonnel e osi dan zot lentere tel ki dan *sport* e kiltir e nou a vwar vre lepanouisman nou bann zanfan.

Lo kote lasante Mr Speaker, mon vremen kontan pou aprann ki tre byento nou pou reisi ganny en *standby generator*, en keksoz ki tre itil e lontan nou pe espere. Batiman kot sa zenerater pou ganny enstale in fini konstrir e sa zenerater pou ganny met an plas tre byento.

Mon pe fer en demann avek sa Minister Lasante pour ki en renovasyon mazer i ganny fer lo nou sant lasante, anpes li avarye plis. Demars osi pe ganny fer avek bi pou plis sekirite lo semen. Kot nou sant lasante, mon pe ensiste ki en *carpark* apropiye i ganny konstrir, e en vizit in ganny fer pou idantifye en sit ideal pou sa proze. Ki pou enkli trotwar

devan sant lasante e *parking* devan e deryer sa sant.

Mr Speaker, pou bann fermye mon distrik mon kapab dir zot ki finalman sa nouvo baraz Bonne Espoir i'n konplete e pare pou konmans servi, sa proze irigasyon pou ed fermye dan rezyon Montagne Posée e osi Hermitage.

Sa lannen zot pou osi vwar konstriksyon en bazar kot zot a kapab vann zot fri e legim, en sit in fini ganny idantifye kot sa pou ganny konstri. Sa a ede redwir risk aksidan lo bor semen. Mon swete ki sa travay a demare o pli vit posib e zot a kapab ganny en landrwa konvenab kot zot a kapab vann tou zot bann viv.

Proze pou fer en lapas Anse La Mouche i'n ganny byen akeyir e sa pe ed bokou nou bann peser. Sa lapas ti dan premye faz en proze ki pou sivre avek konstriksyon fasilite bazar, *store* pou peser kot zot a kapab met zot lekipman e osi labwet. E sa i ekspekte demare tre byento.

Negosyasyon ant Minister Lapes, Minister Lanvironnman e Minister pou Later pou ki sa sit kot proze pou ganny fer i ganny transfer avek *SFA* e sa a permet demaraz e konplisyon sa proze ki nou pe ekspekte a

kapab komanse sa lannen menm.

Mr Speaker, enn nou pli gro problem Anse Boileau se kondisyon nou bann semen primer, tel ki Montagne Posée e depi Anse La Mouche ziska Anse Boileau. La ki *PUC* in fini konplet travay lo enstalasyon kab, mon'n ganny lasirans ki travay pou re sirfas sa bann semen, i espekte komanse dan premye kar sa lannen. E sa pou komanse kot nouvo semen i zwenn semen Les Canelles. E mon swete ki sa travay i a kapab demare a ler.

Mr Speaker, mon ti a osi swete ki travay i ganny fer pou vwar danze ki sa bann pye dibwa lo lakot Anse La Mouche, Roche Canon i poze pou motoris e osi pyeton e si i nesaser, koupe.

Pou Montagne Posée, mon pe demande ki travay pou enstal *crash barrier* i ganny fer sirtou lo bann morso semen ki vremen danzere.

Letan mon pe koz lo kondisyon nou semen, travay pou re sirfas bann semen segonder dan distrik in byen ale pandan 2022. Me i reste travay pou re sirfas semen Mont Plezir ziska kot simityer Anse Louis. Travay preliminar pou bous bann trou pe fini e sa mon swete sa semen a kapab ganny

en nouvo sirfas avan lannen fini.

Mr Speaker, pou elimin drog dan sa pei i vremen difisil, me pa enposib. Malgre tou sa difikilte, Gouvernman in konmans sa latas ansanm avek bann *partner*, tel ki Ameriken, Angle, Franse e Endyen ki pe ed nou pou nou kapab elimin drog dan nou pei.

Pandan sa dernyen 2 lannen, in annan plis lentervansyon kot drog i'n ganny detri, swa lo erport ouswa lo lanmer, e sa i montre langazman e kantite serye ki sa Gouvernman *LDS* i annan kont lalit drog.

Mr Speaker, drog pe kontinyen afekte nou zenn, drog pe kontinyen detri nou pep. Drog i enn parmi bann faktor ki anmenn lapovrete, i responsab pou vol e vyolans dan pei. Prezidan in fer en lapel pou tou dimoun, tou Seselwa ki annan nou pei a ker pou ede lit kont sa fleo.

Avek sa sityasyon drog mon vwar ki ledikasyon pe ganny afekte, drog pe afekte nou mendev e si nou pa pran aksyon la nou pou perdi tou, tou keksoz. Tel ki kontrol lo nou Lendistri Touris ki pilye non lekonomi e pli ale nou pou vwar plis etranze ki pe antre

dan pei e pe fer sa travay ki nou zenn Seselwa ti merit pe fer.

Mr Speaker, mon annan lenkyetid pou Sesel e lavenir nou bann prosen zenerasyon. I sagrinan pou vwar ki problemn drog nou pei i'n vin e zafer enternasyonal, kot bokou dimoun aletranze pe vwar ki nou zenn pe fer fas avek atraver en program fer par *BBC*.

Mr Speaker, sa se senpleman aköz vorasite serten nou prop fre e ser Seselwa. Wi voras e egois. Me bon keksoz ki'n sorti dan sa program se en zenn for. Faddy ki ti en viktim sa fleo, ki avek lagras i'n reisi sorti e pe travay pou ed son frer e ser ki ankor viktim.

Koman en Gouvernman responsab, ladministrasyon *LDS* i determinen dan sa lager kont drog e trafik drog dan pei e napa naryen ki pou sanz sa desizyon.

Mr Speaker, *sports* i annan pouvwar pou ini en nasyon. Fer ki nou tou ansanm nou pe sant menm sanson e nou pe fer flote nou paviyon pli o ki posib.

Me, Mr Speaker i malere pou vwar ki pou tro lontan *sports* ti ganny neglize, bokou lenfrastruktir in tonm an rin e sa pe kout bokou pou fer renovasyon. Me avek *Zwe de Zil* ki pe arive, *Zwe de Zil 2023* ki

dan selman 5 mwan nou vwar ki renovasyon lo serten fasilite sportiv in fini konplete pou ki nou bann atlet a kapab fer zot bann preparasyon pou sa zwe.

En lot priyorite sa Gouvernman se pou investir pou remet mazorite lenfrastruktir sportif lo en nivo akseptab, akoz nou rekonnèt benefis ki *sports* i anmennen dan pei. Avek sa langazman antet, sa lannen nou ekspekte vwar travay renovasyon *Sports Complex* e osi konstriksyon en nouvo *Indoor Court* Anse Royale. Renovasyon *Sports Complex* La Digue e amelyor bann lezot fasilite e lezot lenfrastruktir sportif dan bann distrik.

Lo kote Anse Boileau pou annan travay renovasyon lo Sant Rekreyasyonnel Anse Louis, kot bann zenn a kapab servi sa sant pou aktivite lwazir. Pou osi annan travay pou redevelop sa pti laplenn, setadir konstri pti *Sport Complex* pou bann zenn sa rezyon.

Mr Speaker, zabitan Anse Boileau i vreman fyer pou lekip futbol *Tigers* ki pe byen debourye dan *championship*. Pour lemoman zot premye e mon swete ki zot kontinyen lo sa bon form e ki sezon prosen zot ganny promosyon.

Felisitasyon pou nou lekip *basketball AB Boys* ki'n ganny promosyon pou zwe dan premye divizyon sa lannen. E mon swe pou sa lot de lekip *basketball, Hotshots e Drifters* se ki zot kontinyen lo sa bon semen e tap tou pou en meyer pozisyon pou sa lannen.

Lekip siklis *Velo Club de L'Ouest* ki osi lo en bon parkour, kontinyen travay dir. Bravo tou nou *sportsmen* dan distrik. Mon pe demann avek tou atlet Seselwa, sirtou atlet ki sorti Anse Boileau, travay pou atenn sa nivo pli o. Mon byen plase pou konnen ki sa i demann bokou sakrifis. Pouse e avek perseverans tou i posib, vin sa atlet ki anmenn loner pou Sesel.

Mon pe osi fer lapel pou tou lezot zenn Anse Boileau. Annou koste ansanm dan kiltir e dan lezot aktivite ki zot pratike e annou fer Anse Boileau vin sa lafyerte nou zil.

Mr Speaker, ozordi Sesel i bezwen plis ki zanmen linite son pep. En lafors ini, ansanm annou konstri sa pon pou geri tou mal le pase, non pa kree divizyon, non pa senm laenn. Sesel i en pti pei kot tou dimoun i konn tou dimoun. Menm ki nou annan lopinyon diferan, nou kapab travay ansanm pou benefis nou pei. Apre tou Sesel

i nou pei. Parey Prezidan i'n dir annou fer sa semen ansanm. Fer li pou nou zanfan e fer li pou nou pti zanfan.

Mr Speaker, pou konklir, avan mon konklir, mon ti a kontan dir. Mr Speaker, Onorab Pillay i'n dir ki ler ou aksepte bef ou bezwen aksepte li avek son korn, e ki *LDS* pe tir dile ek *park* e non pa ek sa bef ki *US* ti kite.

Les mwan dir Onorab Pillay, atraver ou Mr Speaker, wi ti annan en bef, ni dile ti napa. Akoz sa bef ti'n vreman meg. *US* ti'n tir tou dile e personn pa konnen kote dile in pase. I pe koz *park*? *Huh!* Mr Speaker, *park* zis ou touse ti grennen! Se sa bef ki *US* ti kite dan sa swadizan *park*. Mersi Mr Speaker.

(APPLAUSE)

MR DEPUTY SPEAKER

Mersi Onorab Arissol. Prosen entervenans se Onorab Wilbert Herminie.

HON WILBERT HERMINIE

Mersi Mr Speaker. Mr Speaker, ser, frer, koleg Manm Onorab e tou dimoun a lekout, bonzour. Diskour Leta Lanasyon i en letan ki bokou nou bann frer ek ser i ekout nou Prezidan donn en bilan lo Leta nou Nasyon, e

son bann akonplisman e bann defi ki in rankontre. E son plan pou sa lannen ki pe vini.

Mr Speaker, malerezman sa enn *SONA* in konpletman rat target. Plizyer dimoun in dir mwan ki zot in sey ekoute e menm re ekout sa *speech* ankor, pou sey gete si zot vwar bann size ki pertinan pou zot ganny touse ou adrese. *Sadly*, Mr Speaker, sa size pa'n ganny adrese, tel ki pri lavi, ledikasyon e lasante.

Mr Speaker, o kontrer kwa ki Prezidan in vin koz ek nou lo la? Se ki mannyer tou dimoun pa pe travay, apard li ek son *Cabinet*. Mr Speaker, i bon osi note ki Mr Prezidan pa'n menm remersi son bann prop *MNA* pou sa travay ki zot in fer lannen pase.

(APPLAUSE)

HON WILBERT HERMINIE

Me in plito kontinyen menas travayer ki zot pou ganny pouse.

Mr Speaker, in koz lo *bomb*, me non pa pri lavi. Seselwa ti a kontan konnen ki son plan lo sa size. E Mr Speaker, ki'n arive avek sa lalis 14 komodite esansyel ki Minis Hassan sipoze fer revi depi Oktob lannen pase? Sa Mr Speaker, nou pa tann parle.

Sa size ti devret a latet Ladres Leta Lanasyon, akoz i annan pou fer avek vant Seselwa. Dan plas zis senm laterer e sey anbet Seselwa avek en zistwar ki prizonyen pe aste zarm *Mombasa*. Mr Speaker, i zis montre ou ki sa Gouvernman *LDS* pa enterese avek vant Seselwa.

(APPLAUSE)

HON WILBERT HERMINIE

Me nou Mr Speaker, dan *United Seychelles* nou pou kontinyen la, pou lager pou bann size ki konsern vant Seselwa.

Mr Speaker, Seselwa pa pe demann zot Prezidan ek Gouvernman *LDS* en bout lor, ou en bout dyanman, sirnon pa en bout lesyel, akoz sa nou kreater ki pou zize. Me zot pe demann sa ki ou ti promet zot dan ou *manifesto* ki ou ti vann zot pou ou vin o pouvwar. Kot bann dimoun aze ti pou ganny R10mil pansyon.

(APPLAUSE)

HON WILBERT HERMINIE

Kot ti pou napa viktimizasyon. Kot pri lavi ti pou desann. Be ki nou'n vwar Mr Speaker? Le kontrer in arive. Kot zot in donn bann dimoun aze R500 avek lanmen drwat e pran R1500 ek

lanmen gos. Kot tou dimoun ki pa siport zot in ganny fer aret travay, ou kontra pa'n ganny renouvle. Zot in menm al en pe pli lwen tou, pou akiz dimoun pou met pwazon dan delo. Ki savedir sa Mr Speaker? Eski sa i en Gouvernman responsab?

Mr Speaker, mwan mon apel sa vre paranoya. Servi "ek nou, pa ek nou", pou fer dimoun soufer.

(APPLAUSE)

HON WILBERT HERMINIE

Pourtan Mr Speaker, zot *motto* i 'Sesel pour tou son zanfan'.

Mr Speaker, la pri lavi pa koz lo la. En kote, Prezidan i dir nou sa i son priyorite pou fer pri lavi desann. Lot kote ki nou vwar, son Minis dan son prop Gouvernman *LDS* i dir nou ki sa i zis en myth, e ki pri lavi pa pou zanmen desann.

E sa i zis bann bon parol ki bann politisyen *LDS* i servi dan kanpanny pou zot vin anbet Lepep Seselwa. I montre ou klerman ki zis zot la pou anbet sa pep e vin ek en kart lapay ki zot ti napa okenn zentere pou Lepep Seselwa.

Mr Speaker, *social safety net*. Parey bokou dimoun i konnen, lasistans sosyal, ki ti menm ganny met an plas par Gouvernman *United Seychelles*

pou ed bann ki pli vilnerab. Ki menm ki zot ti pe travay, zot ti pe ganny difikilte pou fer de bout zwenn. Ki'n arive avek sa Mr Speaker? Zot in detri sa net! Epi ki zot vin dir nou? I annan zis 100 ekek dimoun lo *welfare*. Be ki la realite? Dimoun pe nepli *apply* pou *welfare*, akoz zot pa pe al asiste person e Seselwa pe pler an silans. Akoz pa sa ki sa pep ti *sign-up for*.

(APPLAUSE)

HON WILBERT HERMINIE

Wi, Mr Speaker, nou lo kote *United Seychelles* nou pou kontinyen met presyon lo sa Gouvernman *LDS*. Wi, granmersi ki *United Seychelles* pe kontinyen, e kontinyen met presyon lo sa Gouvernman *LDS*, pou zot revwar zot bann program sosyal. Tel ki goute pou zanfan, *part rental* pou bann ki pa kapab pey zot *rent* an antye. Ou osi revwar bann kriter pou kalifye pou benefis sosyal.

Wi Mr Speaker, presyon apre presyon nou pou mete. Kontan pa kontan, me zot pou bezwen *align* zot lekor.

(APPLAUSE)

HON WILBERT HERMINIE

Mr Speaker, dan Sekter Servis Piblik, Prezidan in dir nou ki i annan 3 kalite travayer. En tyer travayer i pares, lot tyer travayer i siport en parti politik, e zot trenn lipye. Lot tyer i servi zot pozisyon pou pini dimoun.

Be Mr Speaker, eski Prezidan pe fer nou krwar ki dan Gouvernman dizour i annan zis siporter *US*? Pourtan, zot ki o pouvwar. Sa i lafason ki Prezidan i dekrir leta Servis Piblik, ki dayer li ki ansarz.

Mr Speaker, annou met sa an konteks. Tou Minis i *LDS*. Laplipar, si pa tou *PS*, *CEO*, *DA*, *LDS*. Bann ki ti *US*, zot in pouse, ou pa'n ganny zot kontra renouvle. E sa i apel ganny pouse tou mannyer. I zis zot in servi en *smart way* pou zot fer. Me Seselwa pa bet. Nou'n vwar zot byen kler.

E ki parol ofisyel ki zot servi? Se zot in al pourswiv en lot parkour. Be ki parkour ki zot in al swive? Ou pa'n renouvle zot kontra. Ase pran Seselwa pou fou bet.

(APPLAUSE)

HON WILBERT HERMINIE

Prezan, i vin dir nou ki Sekter Piblik pa pe delivre e pe menas zot pou ganny met deor. Be lekel ki a latet Sekter Piblik, ankor mon demande? Aret

blanm travayer pou linefikasite sa Gouvernman LDS. Si problem i ek en travayer, i pa pe performen, ou bezwen disiplin li. Dan plas blanm tou travayer, apard bann ki a latet e ki annan lotorite e responsabilite pou delivre.

Mr Speaker, isi Sesel anba sa Gouvernman LDS nou fer tou le kontrer avek norm enternasyonal. Deor en aksidan tren i arive, Minis Transpor ki demisyonnen. Akoz responsabilite i tonm ek li koman latet sa Minister.

Mr Speaker, isi dife lo *landfill*, travayer Sekter Piblik ki ganny brile. *Sorry*, mon rebran Mr Speaker - Isi, dife lo *landfill*, travayer Sekter Piblik ki'n ganny blanmen e menm, en parti politik. Lans i sal, manm piblik ki ganny blanmen.

Mr Speaker, sa Gouvernman LDS i blanm tou dimoun, tou lekipman e tou zouti, apart sa enn ki pe dirize. Akoz li i toultan byen. Mr Speaker, sa Gouvernman i koz ek nou labous plen lo topik *rule of law*. Ki Lalwa i aplik pou tou Seselwa. En konsep ki zot pe fer nou krwar, kan lontan nou'n fini vwar kler.

Prezidan Rene ti donn nou ledikasyon pou naryen pou anpes dimoun fer nou krwar lizour pou aswar.

(APPLAUSE)

HON WILBERT HERMINIE

Mr Speaker, dir mwan eski *rule of law* i aplike, ki ler en dimoun, en Minis i tap en gard ek transpor, me Depite Komisyoner Lapolis ki ganny pouse? Eski sa *rule of law*? Eski *rule of law* i aplike kan en tim ibou, en tim ibou, i met fizi deryer latet sivilyen, eski sa i *rule of law*?

Eski *rule of law* i aplike ler *Chairman Board* en lakonpanyen parastatal i fer en fo dokiman, pou fer en travayer etranze antre Sesel, me naryen pa arive avek li. Eski sa i *rule of law*?

Paret mwan Mr Speaker ki *rule of law* pou sa Gouvernman LDS i annan en pwa de mezir. Kot enn i aplik pou Lepep Seselwa ordiner, e lot pou bann gro msye. Mr Speaker, i malerezman Sesel in retourn dan en sistenm *class* anba sa Gouvernman. Pourtan, zot zis 2an edmi dan lofis.

Sa i fer mwan efreye pou mazine ki mannyer lavi Sesel pou ete pandan sa lot 2an edmi.

Mr Speaker, lo lot kote, proze kapital ki Gouvernman LDS e Prezidan Larepiblik in koz lo la, ki egziste lo zis son *computer*, sa mon pa pou fer

komanter lo la konmela. Parey in dir, ki Seselwa ki pou ziz li si pa materyalize. Mr Speaker, tou Seselwa i konnen ki ler ou batir en lakaz, en batiman avek laz i toutafe normal pou pas en kours lapentir lo la. Fer serten *maintenance* lo la pou kit li an bonn eta. Kwa ki pa normal Mr Speaker, se ler en Gouvernman LDS i fer nou krwar ki nou ti napa en *Library* Nasyonal.

Kan *Library* Nasyonal se Gouvernman *United Seychelles* ki ti konstri. Zot pe fer renovasyon lo la, epi zot a met en lot plak lo bor e zot a koup en lot riban. Pou en louvraz *maintenance* ki dayer ou ti devret pe fer avek sa bann batiman ki Gouvernman *United Seychelles* in konstri e met a ou dispozisyon?

(APPLAUSE)

HON WILBERT HERMINIE

Mr Speaker, i drwa nou bann zenn atlet pou ganny en *tartan track* ki ganny *maintain* par Gouvernman dizour, pou zot kapab devlop e liber zot potansyel. E pou zot kapab partisip o nivo enternasyonal. I pa en privez sa, parey sa Gouvernman pe sey fer nou bann zenn atlet krwar.

Lepep Seselwa in vote pou met sa Gouvernman la pou

amelyor e travay lo promes ki zot ti met devan Seselwa, an servi sa baton mazik ki zot ti pou vin avek, pou vin fer tou louvraz ki devret ganny fer. Ki dayer Gouvernman i son drwa pou fer renovasyon lo tou batiman. Batiman in ganny konstri, i bezwen ganny *maintain*. Napa keksoz difisil ladan Mr Speaker. Napa naryen ekstraordiner.

Mr Speaker, Prezidan i vre ler i dir i mel dan tou keksoz. Menm si bann teknisyen dan sa *field* i dir zot i bezwen plis letan. Mr Speaker, pran lekol *NIHSS*, ki bann *staff* Minister Lasante in dir zot pa ancor pare pou bouz dan zot nouvo fasilite, e demann li pou fer en lot trimes. Sa msye pa ti le tann parle. Dan son dezesperasyon pou koup en lot riban, in fors *staff* ek etidyan bouze.

Be ki nou'n vwar? Wi *building* in fini. Bann lezot fasilite, e lezot fasilite pou zenn aprantiz fer laprantisaz napa. *Computer* i zis parey dan en simityer. Pa konekte. Napa fasilite *Wi-Fi* ek *internet*. Manrmay pe bezwen servi zot prop *data* pou akse resours pou zot aprantisaz. Kan tou sa bann fasilite ti la ler zot ti pe lekol, lekol Anse Norde.

I bon note ki sa i vin en depans an plis lo nou bann

zenn adolesan ek adilt, me zot *allowance* in reste parey.

Mr Speaker, Gouvernman *LDS* i bezwen ganny fer konpran ki laprantisaz i pa zis *building*, i servis, resours imen e lekipman. Laprantisaz i pa zis prese pou ouver en *building* e koup riban.

Mon dakor avek Onorab Phillip Arissol, atraver ou Mr Speaker, ki nou sistenm ledikasyon in tonm an rin. En gro defi pou sa Gouvernman la ki an se moman o pouvwar.

Mr Speaker, mon pa pou kapab termin lo sa pwen san dir de mo lo lasose Baie Ste Anne Praslin, ki bokou mon bann zanmi Pralinwa in met devan mwan. Ki apre bokou zoli travay ki mon koleg Onorab Churchill Gill in fer pou konstri en nouvo lasose.

Gouvernman *LDS* dan son program koup riban, tou proze ki *US* in konstri san konsiltasyon, in sanz batiman ki bann dimoun ki ti pe servi lasose ti'n demande e ranplas li avek en *shelter*. Ki *by* lannen prosenn pou napa lespas pou nouvo servis.

Pralinwa ti le en batiman ki pou kapab zwenn zot lekspektasyon pou bokou lannen ki ti pe vini. Mr Speaker, malerezman ki ler en Dirizan i dir ou si pou sanz en glob, si ou

bezwen *survey*, pe diviz sa pei. Sa ki arive. Tou proze pou li i parey ler ou pe sanz en glob. I pa pou *survey*, i pa pou konsilte. Me a lafen Pralinwa ki anmas lepokase.

Parey mon koleg, Onorab Churchill Gill in dir, in fer *exactly* 25an ki sa proze in materyalize. Sa i normal, akoz ler ou konble en landrwa ou bezwen les li stabilize avan proze i ganny fer. Me zot, zot in dir nou ti pe trenn lipye. Nou, nou *survey* e nou planifye avan nou fer keksoz.

Mr Speaker, en sistenm lasante i vital dan devlopman en pei son zabitan. Gouvernman *United Seychelles* in *train* bokou ners, Dokter, lezot Spesyalis lasante e osi *non-medical staff*. Me i tre sagrinen, dan ki zis 2an edmi ki en Gouvernman *LDS* in o pouvwar zot in detri en sistenm servis lasante, menm si i pa ti parfe, me i ti pe marse.

Dan 2an edmi Gouvernman *LDS* in o pouvwar, lopital napa dra, napa zorye, napa matla. *Lift* in kase. Petet si Minis ti *survey* son lopital, petet i ti ava vwar sa. Dan lot kot *LDS* pa krwar dan sistenm lasante piblik, parske *Cabinet* antye i ganny *allowance* medikal pou al dan Klinik Prive ou aletranze pou tretman.

(APPLAUSE)

HON WILBERT HERMINIE

Mr Speaker, Gouvernman *US* in toultan krwar dan met zonm o sant devlopman. Kot atraver nou sistenm ledikasyon nou'n toultan kapab *be what you want to be*. Nou'n konstri plizyer lekol e sant ledikasyon.

Nou'n menm kree Liniversite Sesel pou fer li pli fasil pou annan en *graduate* dan sak fanmir. Kot nou pa'n zis batir batiman, me met program e fasilite an plas pou fer sa kapab vin en realite. Kot nou'n get dan *welfare* nou bann resours imen e nou donn zot, zot bann *dues* pou zot kapab vin pli prodiktiv e ankouraz bann ansennyan pou delivre.

Mr Speaker, sa ki sagrinan, sepandan sa 2an edmi sa Gouvernman *LDS* in les nou sistenm ledikasyon tonm dan depi. Kot bann ansennyan tre kalifye in ganny dir ki zot pa lo lalis ansennyan pou lannen prosenn. Kot lezot pe ganny viktimize akoz zot lopinyon politik.

Serten laklas napa meb debaz, tel ki sez ek latab ki konvenab pou zanf ansize e aprann. Resours pou nou bann edikater kalifye servi pou edik nou zanf napa. Sa ki fer pli

lapenn se 2an edmi in pran pou sa arive.

Mr Speaker, napa person ki kapab konsantre e aprann lo en vant vid. Sanmenm sa dan son sazes Gouvernman *LDS* in kree *Dedicated Fund* pou ed bann paran, ki menm zot pe seye zot pe vwar li difisil pou fer de bout zwenn.

Gouvernman, parey zot in dir, zot bann liberal in vwar sa konman en landrwa ki zot kapab koupe pou kouver trou, ki ti'n vini dan Bidze par koupir *tax* lo bann gro biznes dalon. E ki nou'n vwar, nou bann pti zanf ki soufer.

Avek presyon mete par *United Seychelles*, zot ti bezwen revwar sa desizyon. Mr Speaker, si en Minis pa kapab asire ki nou bann pti trezor i kapab etidye dan en latmosfer sen, i devret fer sa keksoz onorab e demisyonnen.

(APPLAUSE)

HON WILBERT HERMINIE

Annou pa detri lavenir nou bann pti trezor plis ki sa.

Mr Speaker, drog i en fleo ki kontinyen ravaz nou sosyete. En fleo ki kontinyen fer nou bann zanf soufer e nou bann paran plere.

Pandan kanpanny, sa msye ti dir nou ki i konn tou

trafiker e i pou annan en dyalog ek zot. Ki pandan son premye san zour, i pou elimin sa fleo. Me ki nou'n vwar Mr Speaker? Bann eskobar in ganny pardon Prezidansyel e en boug in ganny met dan prizon pou de bout zerb. Eski sa Gouvernman LDS i vreman serye e responsab dan sa ki zot dir, ouswa zot ti pe zis zwe lo lemosyon elektora?

Mr Speaker, drog mil ton in ganny sezi solman egzibit i anba lanmer. Lepep Seselwa ti le vwar laprev ki vre ti annan sa kantite drog e dezyenm, si vre in ganny detri. Mr Speaker, akoz in fini tro tar pou fer nou dormi boner.

Mr Speaker, lo kote reabilitasyon, nou bann frer ek ser ki'n tonm dan sibstans, sa zot in detri net akoz politik. Mr Speaker, pa pran mon parol. Me programm enternasyonal fer par BBC ki pe dir nou sa. Sanmenm sa ki arive ler ou annan en Gouvernman e en Dirizan ki pa krwar dan adiksyon i en maladi.

Mr Speaker, a latet Gouvernman zot Prezidan i krwar dan *cold turkey* koman sa mwayen pou tir zenn dan adiksyon, kan bann profesyonnel pe dir le kontrer.

Mr Speaker, Prezidan in koz fortman lo rezo sosyal kot in dir bokou dimoun i servi *fake*

profile pou anvoy lensilt lo son kanmarad, ki i pa pou tolere e ki Lafors Lapolis pou akte lo la. Mwan mon siport li dan sa demars. Be kestyon i reste Mr Speaker, kote sa bann demagozi ti konmanse? Pa lanmenm la dan sa Lasanble?

(APPLAUSE)

HON WILBERT HERMINIE

Dan sizyenm Lasanble, lekel ki ti servi rezo sosyal pou denigre son prosen? Mr Speaker, mon zis espere ki sa *Cybercrime Act* i aplik pou tou. E i pa vin zis en zouti pou servi kont serten dimoun ki nou pou swazir pou aplik *the rule of law* avek. Mon senserman swete.

Mr Speaker, dan lavi listwar i en keksoz ki enportan pou nou aprann e tir leson avek pou nou fer pli byen dan lavenir. Pou nou pa ganny anbete ek bann politisyen ki annan zot prop plan personnel.

I annan serten i le re ekri listwar. Kan en Dirizan i dir nou i ti kapab anpes Gouvernman fonksyonnen, me i pa'n fer li. Me i bliye se li ki ti blok Bidze *DICT*, akoz portre Prezidan Larepublik sa letan, ti monte koman *screen saver* lo en *computer*. Ki mannyer i apele sa Mr Speaker? Kan en Dirizan i dir nou, li sel Prezidan elekte

dan Sesel, ki manner i apele sa? Kan tou Seselwa i konnen kantite fwa ki zot in vote.

(APPLAUSE)

HON WILBERT HERMINIE

Mr Speaker, kan en Dirizan i dir nou ki konpansasyon ki sa Gouvernman *LDS* in peye pou Mr Alain St Ange, i lafot Gouvernman avan. Kan li menm li ki ti blok lapwentman Mr St Ange la dan sa Lasanble ler Gouvernman *US* ti pe rod sipor Lasanble, pou son nominasyon. E rezon ki i ti donner, se ki Sesel pou siport kandidatir *Zimbabwe* olye en Seselwa. Sa ki i ti dir nou. Epi zot dir nou, Sesel i pour tou son zanfan.

Wi Mr Speaker, ki manner i apele sa? Kan Gouvernman *US* ti vin avek propozisyon pou en 5poursan logmantasyon saler, ki dayer si ti'n pase ozordi Seselwa ti a ganny li en logmantasyon 15poursan dan sa dernyen 4an.

Mr Speaker, ki manner i apele ler en Dirizan i le fer nou krwar ki son *Cabinet* of Minister i ganny R40mil, kan nou tou nou vwar ki lapey en Minis dan liv Bidze. Mr Speaker, sa i pirman lipokrizi en zonm ki oule sey fer nou bliy nou listwar.

Mr Speaker, vre Leta nou Nasyon, se ki Seselwa i pli mizer ki zanmen. Ki bokou nou bann frer ek ser Seselwa, pe ganny difikilte pou fer de bout zwenn. Ler en bann pe *enjoy* zot *allowance* ki zot in mete pou zot lekor, bokou nou bann frer Seselwa pe dormi vant vid.

Mr Speaker, kan en Dirizan i dir nou i al lapes bann zoli pwason, ki an realite i tourn zis avek sise. Mr Speaker, Seselwa i ankor pe esper sa bann nouvo kabri ki zot tin ganny promet.

Scholarship pou nou bann mizisyen al *Austria* in evapore. Mr Speaker, bann ners ankor pe esper sa bann *scholarship Kenya* e plizyer lezot fo promes ankor. Sa i vre en gran prometer pti doner.

Mr Speaker, atraver ou, wi mon'n not sa bann parol ki Onorab Labonte in dir, e mon swete ki i ti senser. Kwa ki i ti regretab Mr Speaker? Se ki zot in koz nou de parol.

Mr Speaker, zis apre ki Onorab in donn mwan en lanmen, ki nou'n vwar dan kan *LDS* e Onorab Hoareau a partikilye, in kontinyen fer latak personnel lo nou.

(APPLAUSE)

HON WILBERT HERMINIE

Mr Speaker, dan politik i normal pou atak Polisi ou adverser ou keksoz ki in dir, me latak personnel sa i tonm dan kategori denigre ou prosen. Eski sa ki nou pe montre nou bann zanfan ki pe grandi demen? I paret i difisil pou en leopard sanz son tas.

Kan ou pe koz lo linite e rekonsilyasyon nasyonal. Me zot *still* pe lans latak lo laparans fizik en dimoun. Si i gro, si i gran, si i pti pti, si i meg. Sa bann latak anba sang, nou osi nou kapab al dan sa direksyon me nou pa pou fer li. Nou pa pou desann dan rigol.

(APPLAUSE)

HON WILBERT HERMINIE

Wi Onorab Labonte, mon'n note sa ki ou'n dir, me mon pe pran li avek en pens disel. E se Seselwa ki pou ziz ou senserite.

(APPLAUSE)

HON WILBERT HERMINIE

Mr Speaker, kouler ofisyel parti *United Seychelles* i rouz, parey zot, i ver pou bann ki dan *SNP* e pou bann ki dan *LDS* i ble. Mr Speaker, i paret mwan ki ti napa naryen pou koz lo la dan sa *SONA*. Akoz ziska nou kouler ofisyel zot pa kontan.

(laughter)

(APPLAUSE)

HON WILBERT HERMINIE

Mr Speaker, me nou lo sa kote latab nou pa pou zanmen kanmi nou kouler politik. Nou'n rouz e nou toultan pou reste rouz. Dir nou, nou kouler i valanten ou pa valanten si zot oule, me sanmenm sa kouler ki pou met zot deor 2025!

(APPLAUSE)

HON WILBERT HERMINIE

Mr Speaker, an terminan, ou konn vre Leta nou Nasyon, kan en dirizan i dir nou son pli gro lakonplisman, ki son Gouvernman *LDS* pandan sa 2an edmi o pouvwar, se ki in tir 2mil ton silt dan lavil Victoria. Pwen!

Mr Speaker, sel lalimyer a lafen sa tinel se ki i reste zis 2an edmi pou Lepep Seselwa tenir anba sa sistenm kapitalis, kot 2025 Lepep Seselwa a montre sa Gouvernman *LDS* ki zot in fatigue e fristre. E zot a servi sa marto gro may, pou kas sa lasenn ek *State House*. Pou li pran son *bin liner*, pou li *pack and go* e i a kontinyen reste aletranze e vin vakans Sesel.

Mr Speaker, an terminan, mon anvi dir mersi pou nou

bann siporter e manm piblik ki kontinyen deryer nou, pou donn nou kouraz, pou nou kapab kontinyen travay, pou nou lager, pou nou kapab rebran nou pei dan en sityasyon difisil. Nou realize ki pa en louvraz fasil. Be lo lapar *United Seychelles* e bann Manm Lasanble *United Seychelles*, mon anvi remersi zot pou sa sipor. Mersi Mr Speaker.

(APPLAUSE)

MR DEPUTY SPEAKER

Mersi. Mersi Onorab Herminie. Nou pou prezan pran en *break* nou pou retournen 11er. Mersi.

(BREAK)

MR DEPUTY SPEAKER

Welcome back tou dimoun e nou kontinyen avek bann repons bann *MNA* lo mesaz Prezidan lo Leta Lanasyon. Prosen entervenon ki mon pou apele se Manm Elekte pour distrik Glacis, Onorab Regina Esparon

HON REGINA ESPARON

Mersi Mr Speaker. Bonzour tou koleg Onorab, tou dimoun a lekout espesyalman zabitan Glacis. Mersi pou donn mwan laparol, pou mwan osi servi sa lokazyon ki devan nou pou zet

en regar lo Leta nou Nasyon e Leta nou pei.

Dabor mon oule remersye Prezidan pou sa diskour tre emouvant, direk ek fran ki in delivre semenn pase. Ki ler mon ekout li, mon santi ki malgre tou difikilte ki li ek son Gouvernman pe pas ladan pou redres sa pei ki'n pas dan dir pandan sa dernyen 43an, me keksoz pe bouze dousman, dousman.

E mon konnen ki i son swe, se ki keksoz ti a kapab bouz pli vit, me kan zot rankontre lobstak e rezistans, sa i met retar dan progre ver la reisit.

Kantmenm, kontrerman avek bann ki ti a voudre vwar sa Gouvernman *fail*, nou, nou pou touzour priy Bondye pou ki i kontiny don Prezidan Ramkalawan ek son Gouvernman, sa kouraz e lasazes e ekler zot lentelizans, pou zot fer sa ki byen pou sa pep e met nou pei lo sa semen progre.

Mr Speaker, tou sa ki nou Gouvernman in reisi fer pandan sa 2 dernyen lannen ki in ganny elekte, malgre ki nou ti dan peryod kot lemond ti pe pas dan difikilte, in reisi par bonn volonte e travay dir. Parski nanryen, nanryen pa'n ariv par laverti okenn tabatyer ou baton

mazik. Me atraver lwayote e konfyans ki sa pep in met dan sa Gouvernman, ki fer ki ozordi i a pe delivre lo son manda.

E Mr Speaker, sa i donn nou rezon pou selebre sa lakonplisman. Ozordi nou kapab konpar sa diferans ant sa Gouvernman *LDS* ki la o pouvwar avek Gouvernman lepase e ou vwar sa gran diferans. Kot Gouvernman *LDS* i enn ki pe travay pou tou zanf an Sesel e i rod sa ki meyer pou tou dimoun. Parski i krwar ki Sesel pour tou son zanf an, parey i ti promet ler i ti al dan eleksyon.

Zis get mannyer in akey bann zanf an dezabilite e zot paran *State House* de zour pase. Tandis ki Gouvernman lepase ti travay zis pou en serten pti group, ranpli son pos lo lasyer sa pep. Sa ki ti pran 52 morso later, sa ki ti pran bann ptipti bout. E kot sa ki ti pe vol dan ta 50 ti ganny transfer dan ta 100.

E nou ti vwar kot en kantite koripsyon ti pas anba zot nennen e nanryen pa'n ganny fer. In annan en kantite labi pouvwar, viktimizasyon e disparisyon. Tousala ki ozordi pe kout Gouvernman e pep Seselwa en kantite larzan pou repar zot bann fot e pey konpansasyon.

Eski sa ki nou le ariv ankor dan sa pei? Si wi zis donn sa parti Alibaba zot vot ankor e mon garanti ki sa pei pou lo son zenou. Pep Seselwa pa rod ankor lagal ki zot pour napa zong pou grate!

(APPLAUSE)

HON REGINA ESPARON

Ladan menm zot Dirizan a dir piblikman, ki li i eksite ler i vwar madanm? Ki pe sey enskrir, ki i pe sey ilistre vizavi bann madanm? Mwan koman en madanm ki diriz *Caucus* bann madanm lo nivo rezyon Lafrik pei *SADC*, mon vwar sa koman en mank respe pour bann madanm e en *harassment* pour nou bann madanm!

(APPLAUSE)

HON REGINA ESPARON

E sa i montre nou ki labitid en segonn natir e parfwa i fer ou bliye kote ou ete. Mon poz sa la Mr Speaker, akoz i pa gou ditou!

I remarkab ki i annan bokou ki'n ganny fer dan sa pti git letan. Malgre, ki nou pa pe vwar bokou proze mazer dan tou distrik, me sa bann proze nasyonal ki'n ganny fer i tous dimoun dan tou distrik.

La mon pou koz lo proze tel ki nouvo lekol formasyon dan servis lasante, travay ki kontinyen lo lagrandisman bann Por, nouvo terminal pasaze Baie Ste Anne. Proze pou adres *flow* trafik dan lavil par kree en lezot alternativ parey en nouvo *roundabout* lo semen Mont Fleuri, ki donn en debousman lo semen ki al kot *Hypermarket*.

Renovasyon ki pe fer lo batiman Carnegie e Libreri Nasyonal, kot i ofer ou sa fasilite, pou pli byen fer ou resers. Bann nouvo proze lakaz en pe partou ki pe demare. Renovasyon lo *Palais des Sports* ki pe ofer plis bon fasilite, pou ou ki pe pratik sa *sport*. Amelyorasyon lo *tartan track* lo Stad Linite, ki ti'n vin en danze pou nou bann atlet. I annan bokou, ki si mon nonm tou, letan pa pou ase.

Nou'n osi tann Prezidan mansyonn renovasyon lo Kordgard Baie Lazare ki'n konplete e Glacis ek Anse Etoile ki pe al ganny fer, ki pou re anmenn sa servis a laporte, nou zabitan dan kominote. E nou annan proze lakaz *ex-Ferrari* ki pou benefisye nou zabitan ki ankor pe esper en lozman ki lo lalis priyorite. Sa i zis enn de dan sa seri proze lakaz ki Gouvernman in arive fer dan sa

pti git letan e nou dir bravo Prezidan ek son lekip.

Mr Speaker, annou get nou Servis Piblik. Mon siport sa lespri ki fodre nou annan en Servis Piblik ki deliver e vin pli efikas, e kot nou bezwen adopte en kiltir travay dir, olye trenn lipye e kree fristrasyon dan Servis Piblik.

Mr Speaker, mon pa pou kasyet mwan, parey in ganny dir dan- par lezot lo tou lede kote latab, ozordi i annan en leokri konsernan move servis dan Sekter Piblik. Kot sitwayen i santi zot fristre aköz tou senpleman keksoz pa pe bouze, oubyen servis dan serten landrwa pa alaoter e dimoun zis pe *kill time*.

Me aköz sa i leka? Mr Speaker, mon vwar sa lo de lapse. Premyerman i annan sa kote problem lapartenans politik ki kontinyen anglouti lespri serten nou sitwayen, e ki pe afekte zot performans koman en travayer Sekter Piblik.

I vre ki dan lepase ti annan ki ti krwar ki i ti kapab fer sa ki li i anvi, zis aköz i ti pros avek bann dirizan parti ki ti o pouvwar. Me i tris pou dir ki ozordi nou annan serten dimoun ki ankor pe mazin koumsa. I malere ki serten, nou prop dimoun parfwa, i azir avek en latitid nou ki pe *rule border*

konmela e ki aköz sa move latitud zot pe fer egzaktaman sa ki bann, sa ki Gouvernman avan ti soutire ti fer.

Zot trenn lipye, zot lesefer, zot pa delivre lo responsabilite senpleman aköz zot viv ek enn *mindset* ki aprezan se zot tour donn sa pep lenfirmite. Sa i pa akseptab ditou. Se pa sa sanzman ki nou ti lager lebra kase pou nou anmennen dan sa pei.

Mwan mon fortman kondann sa bann tel latitud, ki fer dimoun fristre e met retar dan progre ki Gouvernman i oule fer. Mwan mon dir zot sekwe zot! De lot kote nou annan sa bann ki'n perdi zot privez lepase depi ki *LDS* in vin o pouvwar e zot fer tou sa ki zot kapab pou met bar dan larou progre.

Plenn fwa sa bann dimoun pe okip bann pozisyon tre o dan Sekter Piblik e avek zot leksperyans e konesans, i pa'n fasil pou ranplas zot toudswit. E aköz ki Prezidan i krwar senserman dan Sesel pour tou son zanfan, in swazir pou donn zot benefis *du doute* e gard zot dan sa bann pozisyon.

Be ki arive prezan? Malerezman zot in pran sa koman en kart *blanche*, pou sabotaz travay sa bann lezot anlwayer ki pe met zot

senserite dan tou sa ki zot fer. Se sa menm group ki pran bann desizyon arbitre ki pa dan lentere piblik. Zis aköz zot konnen ki sa sitwayen i fristre pou blanm sa Gouvernman e Prezidan.

Tandis ki li i kontinyen sof sez, donn *geez* e lenfirmite, koz move lo Gouvernman, maltret kliyan ki vin devan li, ki i pa kontan, e lafendimwan i kontinyen tous son gro saler, san gete si in delivre.

Mon kestyon. Eski sa i akseptab? E ziska ki tan sa pou kontinyen, ki nou pou kapab tolere? Mr Speaker, nou pa pou kapab kontinyen koumsa, kot sak fwa en lepa ki nou fer an avan, sa bann kalite travayer i fer nou fer 3 lepa an aryer.

E mon siport Prezidan 100poursan ler i dir ki i pou vin pli strik avek zot aprezan. E mwan mon poudir li "pa zis koze Prezidan, me annou met li an aksyon!". Parski sa bann dimoun in ganny ase letan pou sanz zot mantalite. E prezan in ler pou zot swa refer, oubyen transfer an deor Gouvernman, si zot santi ki zot pa oule travay e delivre pou sa ladministrasyon.

Si nou asiz trankilman e analize sa ki pe pase dan serten Sekter Piblik, ozordi nou pou kapab vwar ki i annan en

manev sabotaz ki pe deroule pou destabiliz Gouvernman. San realize zot pe fer soufer sa pep e anpes zot prop frer bouz devan e benefisyè.

Mr Speaker, an menm tan sa ki napa sa kapasite nesese pou delivre i plifere sabotaz son kanmarad olye donn lanmen fer keksoz marse. En sekter ki pres ek mon leker se Lasante. E mon atriste pou tann sa kantite konplent ki bann sitwayen mon distrik i met devan mwan konsernan Lasante.

Mon kontan e apresye lanons ki Prezidan in fer konsernan konstriksyon en nouvo lopital. Nou vreman bezwen nouvo fasilite e meyer lanvironnman travay pou bann travayer lasante. Me batiman tousel pa pou sanz nanryen otan ki bann pratikan Lasante zot pa apresye servi li parey i fodre.

Avek sa bann zefor ekstra pou donn meyer lanvironnman travay, fodre ki an retour sa travayer i donn son mye. Fodre ki tou Dokter kan en paysan i dir ki son zorey i fermal e son lagorz i fermal, i omwen demann sa pasyan pou ouver son labous, kler dan son zorey e gete ki kalite problem sa paysan i annan, olye zis preskrir latizann ki bokou fwa

sa paysan pa pe ni bwar. Me i zis en gaspiyaz.

Mr Speaker, an menm tan nou bezwen rekonnèt e apresye ki i annan ki donn 100poursan e fer tou pou reisi. I annan Dokter ki devoue pou son paysan. E la mon salye nou bann Dokter ki vreman devoue. Parey Dokter Ania ek son lekip medikal kot Klinik Glacis, mon dir zot felisitasyon.

Parski dimoun i apresye zot servis, malgre ki zot swe, se ki osi i swe bann zabitan, se ki konsiltasyon Dokter ti a kapab omwen ganny fer 3 fwa par semenn, kot sa ti a tir en pe sa presyon ki zot gannyen dan sa 2 zour ki annan konsiltasyon Dokter. En keksoz ki mon'n deza met devan Minister Lasante e i ankor anba diskisyon.

Mr Speaker, parfwa nou osi annan sa latid lesefer, sanmenm ki fer nou fer fot ki parfwa i sitan grav ki i kout lavi dimoun. E apre tou blanm i tonm lo ledò sa Minis e lo ledò Prezidan, ki li i pa ni Dokter, ni spesyalis. Me ki toultan pe rod fason pou amelyor kondisyon travay sa pratikan Lasante.

Ti sok mwan resaman kan en paysan ki pe ganny asma for ti raporte ek mwan ki i ti ganny met espere kot *Casualty*, akòz i annan dimoun ki'n vin avek

injury e zot bezwen gete si i grav ou non, avan get li. E si pa ti en Ners ki ti pase e vwar li pe toufe ozordi i ti pou'n defen.

Mr Speaker, i enportan ki a tou moman tou dimoun i azour ek bann protokol ki ganny servi, e pasyan i ganny eksplike. E mon konpran ler Prezidan i dir ki *Casualty* in vwar plis 41mil pasyan dan 2022.

Ledikasyon i enportan pour dimoun konpran kwa ki en *emergency* e kwa ki en *routine*, pou nou pa vin ankonbre *Casualty* kan pa fodre pou bann keksoz rutin, me plito pou bann ka vreman nesaser.

Pou retourn lo size lopital nef, Mr Speaker. En lopital nef pou osi bezwen plis travayer ki ganny formasyon. E zisteman, la Gouvernman *LDS* in fer kado lazenes Seselwa en zoli sant formasyon dan servis lasante. Konbyen lannen sa vye *Nurses Home* in la abandonnen kan bann Gouvernman avan ti'n zis les li tonm an rin, e i ti zis en latraksyon pou sa ki ti anvi fer en aktivite anti-sosyal e pou lera avek lezot vermin?

Mwan, mon enn parmi sa kantite ansyen Ners e menm serten bann ki ankor pe pratik sa vokasyon, ki ti ganny formen la dan sa *Nurses Home*. E i ti

vreman desir mon leker ler mon ti vwar degenn ki Gouvernman avan ti'n les li tonm ladan.

Ozordi mon soulaze e ere ki sa sant formasyon in retrouv son splander. E pou bann zenn etidyan dan servis lasante, ozordi zot in ganny en sant formasyon ki modern. I lanmenm la a kote lopital kot zot kapab ganny akse avek loportinite pratik.

Met tou zot zefor dan zot letid e servi li byen pou ed zot avanse dan karyer ki zot in swazir. Fer sa depans ki Gouvernman in fer lo sa sant enn ki vo lapenn. Reisi e vin bann travayer lasante ki serye, ki travay dir e ki toultan met zot profesyon a ker.

Mon osi oule enplor bann zenn ki'n fini S5 pou swazir en karyer dan Lasante, fasilite pou zot devlope in met la a zot dispozisyon. Atrap avek de lanmen, servi loportinite ki zot in gannyen e demar lo en karyer ki son rannman i plis ki zis larzan.

Mr Speaker, mon swe se ki zefor nesaser i ganny mete dan ankadre sa bann zenn, pour ki demen zot vin bann profesyonnel responsab ki devoue dan zot vokasyon, e annan sa konpasyon pou donn sa swen avek lanmour.

Annou fer en revi lo nou sityasyon drog. Mr Speaker, en keksoz ki tou dimoun in realize ozordi se ki sa promes ki Prezidan ti fer lo size lalit kont drog, i enn ki in vreman garde. Ozordi, i menm annan dimoun ki ti siport *LDS* ki pa kontan akoz zot osi zot pe trafike. Me mwan mon pou dir Mr Prezidan kontinyen, anmenn en lalit asarnen kont sa fleo. Akoz dan bal kafe pou napa triyaz, akoz zot in ganny ase *warning*.

I pe detri nou zenn, i pe detri lafanmir. E ozordi bokou madanm in vin viktim sa sibstans, zot in deroute e zot pe fer soufer zot zanfan.

Mr Speaker, mon pa pe envante, me realite i la devan nou e ozordi statistik i prouve ki pa zis zonn ki viktim sa fleo, e pe vin *zombies* avek rezilta eroin. Pa bliye ki sa sityasyon in eskale anba *watch* ansyen Gouvernman *US* e *LDS* in zis erit sa problemn.

Letan mon lo a size drog, i fer mwan get en kou sa program *methadone*. I byen mon'n tann Prezidan koz lo sant reabilitasyon. E bokou dimoun i annan divers lopinyon lo sa program *methadone*, kot Gouvernman pe depans milyon pou reabilit sa bann adikt, ki an retour laplipar pa pe anmenn

okenn rannman dan lekonomi pei.

Statistik pou lafen 2022 i montre ki i annan 414 madanm lo program *methadone*, ki fer environ 15poursan. E si nou al pli lwen nou pou vwar ki in annan 27 madanm ki'n tonm ansent pandan letan ki zot ti lo *methadone*.

Parmi selman 16 ki'n kapab donn nesans, lezot in perdi zot zanfan oubyen zanfan in ne e pa'n kapab sirviv. Nou vwar bokou sa ki nou apel bann *crack baby* ki fini dan bann lenstitisyon ou fwaye. Swa manman i ale avek lo *ghetto* e Servis Sosyal i entervenir i pran, swa zot ale zot kit maternite pou ners.

Eski sa pa en sityasyon ki fer nou santi nou konsernen e rode kote nou pe ale koman en pep? Eski nou realize ki sa i montre ki sa fleo drog pe aprezan afekte to nesans ki li menm i annan en lenpak lo fitir nou bann zenerasyon?

Malgre tou zefor ki Gouvernman pe mete pou elimin drog dan pei, lefe i reste Mr Speaker, ki drog i ankor pe rante e i annan dimoun la ater ki ankor pe anmas milyon lo ledon sa bann adikt.

Ler zot, zot dan zot konfor deryer baro, droger pe ravaz kanton e vol tou keksoz

dimoun. Ozordi zour zot vole ziska dile pti baba ek *pampers* dan lakour zot paran pou vann pou soutenir zot adiksyon.

Mr Speaker, mon konpran e mon santi sa ki bokou fanmir ki annan en adikt dan lakour pe pas ladan lo sa size drog. I annan temwannayaz ki vreman fermal. Parski sa bann sityasyon i osi anmenn avek li problem sosyal ki pe detrir nou fanmir. I detrir fabrik nou sosyete, afekte nou *workforce* e pez en pwa lour lo lekonomi nou pei.

Mandyan in vin en *lifestyle* ou en karyer pou serten. E nepli en zafer vyeyar, me zenn vyeyar ki pe mandyan ozordi dan tou kwen semen, kot en bonzour, oubyen en *parking* lo *stadium carpark* i kout ou R25, oubyen kot bann dimoun pli aze i ganny anras zot sak konmisyon menm an deor *Hypermarket* devan sekirite. E tou i al fini par vann lo *ghetto* pou ganny zot laliny.

E la mon lans en lapel, pou ki nou bann lenstitisyon ki lit kont drog i fer en travay ankor pli asarnen e san pitye, pou vreman ariv kot bann eskobar lokal e koup sa akse avek sa bann drog ki pe detrir tou travay dir ki nou pe fer.

Aret enn pti *men*, avek en bout *hashish* pa rezourd

problem. Ni menm aret sa bann pti *dealer* ek zot balans pe vann lapoud dan zot lakaz pa ase pou lit kont sa fleo. Al rod problem kot son rasin i ete e derasin li - sa ki pli enportan!

Mr Speaker, sityasyon drog i tris e i annan ka ki fer lapenn parey mon dir. Me i osi annan dimoun ki kontinyen aste sa bann lobze vole e soutir sa bann dimoun. Mon mesaz se annou aret sa pratik reseler e soutir sa bann dimoun ki pa pe travay.

Konmela drog i ganny met dan *pampers* pti baba, anba granmanman dan *wheelchair*. Trafiker i vin pli visye, zot anmenn lodas e zot pli atoufer, nou bezwen kas sa lasenn.

Ti fer lapenn pou nou tande lo radyo Lendi bomaten, ki ti topik konversasyon kot detrwa zanfana anba laz, par anba 8an Dimans apre midi pe mandyan *juice* ek *twisties* kot en laboutik dan rezyon nor.

En kestryon ki tou dimoun ti pe demande se oli paran sa bann zanfana? Larealite se ki pli ale zanfana napa sipervizyon, aköz manman ou papa i par la lo *ghetto* avek en zegwir dan lebra. Sa i montre dekadans ki nou sosyete pe ale.

Mr Speaker, permet mwan aprezan koz en pe lo mon distrik. Sa manda ki mon pe

deservi la i mon 5enm, e parmi mon'n ganny elekte 3 fwa koman MNA Glacis. Mon vremen fyer poudir ki mon'n asosye avek devlopman mon distrik pou en kantite lannen.

Me sa ki mon pe vwar akonplir dan sa enn manda i montre ki zistans nou ti kapab ete si avan 2020 tou distrik ti ganny trete parey e non pa selon lekel parti ki'n ganny elekte la. Mon dir sa aköz pandan 2an selman mon'n vwar en kantite progre pa zis Glacis, me partou dan bann lezot distrik osi.

Pour nou Glacis, nou'n finalman kapab rezourd en pe problemn esper bis dan sant Glacis e sa i en program ki pe kontinyen.

Glacis i e distrik kot i annan bokou peser. Dan sa 2an nou'n kapab fer en pti bazar pou nou bann peser vann zot prodwi e la nou fini negosye avek lafanmir Mancham, pou komans konstrir en stor lekipman lapes, pou sa bann peser kapab met zot bann keksoz an sekirite.

Mon fyer pou dir ki bazar legim North East Point in fini met lo *tender*. E sa lannen nou pou kapab vwar komansman sa proze lakaz *ex-Ferrari*, ki pou annan 12 *unit*, ki ava benefisyè bann fanmir ki dan bezwen

lakaz dan nou distrik. Wi pa tou keksoz ki an roz me travay pe ganny fer ptitapti. Ptitapti nou ava akonplir nou bann target.

Semen kot lafanmir Hoareau, prosedir pe progrese pou ganny tou *wayleave*. Reparasyon lo *mini hall* pou ganny fer sa lannen, nou ankor pe fini negosye pou termin sa proze lagrandisman semen North East Point.

Mr Speaker, pour konklir, letan mon pe ariv ver lafen mon lentervansyon mon anvi fini lo en not pozitiv. Malgre bann defi ki pei in pas atraver o kouran sa 2an sirtou, sa dega ekonomik ki *COVID* in anmennen, nou pe vwar bokou pozitiv osi, pozitivite osi.

Nou vwar ki *Air Seychelles* pe fer byen. *SEYPEC* osi pe fer byen. Sesel in kapab komans *issue* son paspor biometrik ki donn bokou plis konfyans dan nou paspor lo nivo enternasyonal.

Lakantite touris ki pe vin Sesel pe depas prozeksyon. Sesel in kapab briye parey sa vre bizou ki i ete, e kot nou repitasyon koman en pei ki pe kontinyelman fer progre lo bann laspe imaniter, e devlopman la demokrasi pe ganny konsolide.

Mon note ki tou resaman in annan lorganizasyon *V-DEM*

ki en lenstitisyon renonmen ki fer analiz lo nivo la demokrasi dan lemond ki'n fer sorti son rapor pou lannen 2022. Kot nou'n vwar ki Sesel in fer en kantite progre e in avans 3enm pozisyon. E sa in met li par devan Moris dan nou rezyon an sa ki konsern devlopman e la demokrasi.

Sa rapor i felisit Sesel koman en pei kot i annan en vre la demokrasi liberal konpare avek lezot pei Lafrik. E Mr Speaker, menm nou Lasanble in fer progre kot nou'n vwar Sesel pran la Prezidans *SADC-PF*. E i annan nou osi ki prezid bann *Standing Committee SADC-PF*.

E lo kote *Pan African Parliament* e *IPU* nou'n vwar ki nou annan Manm ki a latet bann Komite. Sa i montre ki nou lenstitisyon ki pou selebre 30an sa lannen pe osi fer sa progre a kote lezot brans Gouvernman nou pei.

Avek sa mon remerci ou Mr Speaker pou donn mwan mon sa loportinite poudir detrwa mo an repons diskour Leta Lanasyon. Ki Bondye i kontinyen beni nou pei e nou pep. Mersi.

(APPLAUSE)

MR DEPUTY SPEAKER

Mersi Onorab Esparon. Prosen Manm pou entervenir se Manm Elekte pou distrik Plaisance. Onorab Richard Labrosse.

HON RICHARD LABROSSE

Mersi Mr Speaker. Mr Speaker, mon bann koleg Manm Lasanble. Manm *staff* Lasanble Nasyonal, ou ki a lekout. Bonzour.

En bonzour spesyal byensir i al pou bann dimoun entelizan ki sorti lo sa bastyon pli entelizan dan nou pei. Sa se pa lot ki Plaisance.

Mr Speaker, se avek plezir ki mon pran laparol pou donn repons lo diskour Leta Lanasyon fer par Prezidan Larepublik, son Ekselans Wavel Ramkalawan isi dan sa Lasanble.

Mr Speaker, sa ti en diskour ki'n depouy vre Leta nou Nasyon ek realite nou pei Sesel. Dan en moman kot nou lenstitisyon pe selebre son 30enm laniverser, i byensir en loner pou tou bann Manm isi prezan pou temwanny sa moman memorab.

Petet i en moman osi ki bann Dirizan nou lenstitisyon i devret sezi pou kontanple persepsyon respe e lenportans ki lapopilasyon nou pei i akord nou lenstitisyon konmela

konpare avek bann lezot lenstitisyon ki egziste dan pei.

Pou tourn ver Leta nou Nasyon, wi dan en pti pei parey Sesel apre sa troubleman ki COVID-19 in viz ver lemonn, Sesel in reste koman en vre legzanp lo kote Lafrik anba en Dirizan ki'n mazin son pep an premye. Son bann desizyon in ganny pran toultan an konsiderasyon lentere, lavenir son pei.

Wi, koman en Dirizan in met politik dekote menm avek sa pti morso resours ki sa nouvo Gouvernman ti vin zwenn. Ansanm avek en lekip ki kontan Sesel, ozordi Sesel i lo semen progre. Nou pa ankor rekipere 100 poursan, me in anmenn en gran lespwar ler pei in reouver ek lemonn e touris pe antre.

Osi nou'n vwar en lankourazman lo kote bann pti biznes ki pe sirviv dan sa nouvo lekonomi e byensir lo kote bann pti biznes, mon kontan pou vwar bann nouvo metod pou fasilite prosedir pou fer biznes dan Sesel. I donn lespwar ler ou vwar Minis Lenvestisman pe met sa lo lalis azanda priyorite. Me byensir nou bezwen ankor plis zefor lo sa kote.

Mr Speaker, ler nou pe al dan sa direksyon lo kote Servis Piblik, ki kle, ki donn servis sa

pep, i bezwen annan en plan pou *upgrade* dan sa domenn. Tro bokou fwa dimoun pe konplent pe vir an ron. Parfwa lenpresyon ki mon gannyen se ki i annan ki mank *training*, ouswa eski zot pe fer ekspre? Sa i en kestyon.

Wi nou bezwen bouze. Nou pa pou kapab koz lo sa pou lannen apre lannen. Parfwa ou pa ganny en konpran ki mannyer en senp repons ouswa en senp *call* koman en travayer Servis Piblik ou vwar li tro difisil pou fer. Alors mon krwar apre 2an nou'n donn ase sans, nou bezwen ozordi konnen lekel ki serye e lekel ki pe met lipye lo fren.

Donk la mon pou dir ki mon totalman siport lafason ki trezyenm mwan saler in ganny donn sa lannen ek lannen pase. Napa en biznes dan lemonn Mr Speaker, ki pou pey en dimoun pou zis asize san fer naryen. Ouswa ki asize gaspiy letan ek resours. Oubyen ki asize donn nou Nouvel lanmwatye lazournen. Nou pa kapab espekte Gouvernman ki pe zer larzan *taxpayers money*, larzan Seselwa e zis donn kado koumsanmenm.

Avek sa sistenm ki pe mezir performans e ki a kout, la keksoz i ava zis. Si ou pa delivre, ou pa kapab ganny

peye. Si ou pe trenn lipye pou fer dimoun fristre, ou pa kapab ganny peye. Sa mon krwar mazorite dimoun pou dakor avek mwan. Me si nou pe fer politik sal nou pa pou vwar sa byen. E malerezman dan tousala se byensir sa pep ki ganny pini. E sa fodre nou anpese.

Lo Leta nou Nasyon, en keksoz kle osi ki bezwen fer sir ki pe mars ansanm avek devlopman pei i ledikasyon.

Mr Speaker, pandan sa moman *recess* mon'n fer mon devwar kot mon'n detanzaot fer en pti vizit kot sa de lekòl ki deservi mon distrik Plaisance, sa i lekòl Plaisance primer ek lekòl segonder. Mon soulaze kot lekòl primer kot mon vwar sa kantite zefor ki bann ansenyan pe mete lo kote laprantisaz, nou bann zanfan ki al laba.

Mon'n osi ekout zot bann konsern ek sizesyon pou amelyor fason fer. Me sa ki soulaz mwan plis se sa lanvi pou amelyor zot lekòl e sa i donn mwan lankourazman pou angaz mon ankor plis pou ed zot a nenport ki fason ki mon kapab.

Lo kote segonder, mon kontan pou vwar serten ansenyan ki ankor la apre plizyer lannen. Sa i montre zot

lanmour pou sa profesyon e zot devosyon pou sa bann manrmay. Me sa ki tris mon kot lekòl segonder i sa problemn disiplin. Ki byensir mon pa krwar i en problemn ki zis lekòl ouswa Minister Ledikasyon i devret pe *deal* avek.

La mon pe lans en lapel avek bann paran pou silvouple apros lekòl pli souvan, koste pli pre avek lekòl pou donn zot sipor. Akoz apre tou se i apel lekòl kot zot zanfan i al lekòl.

Mon osi annan en gran lenkyetid lo kote rezilta nou bann etidyan. Lotorite Distrik in zwenn avek tou ansenyan ki'n pare e volontermen pou donn en koudmen kot tou le Zedi zot ofer leson siplemanter gratwit pou bann zanfan primer.

La aprezan nou pe organize pou al lo novo segonder. Sa ankor i montre ki i annan en ansenyan ki vremen kontan zot vokasyon. I osi montre zefor ekstra ki serten *stakeholders* pe mete, ensi ki konsern e lentere ki Lotorite i aport a sa size.

E lo menm laliny mon osi remersi Minister Ledikasyon anba Gouvernman *LDS* ozordi. Nou bann zanfan i kapab aprann byen lekòl san mazine ki pou met dan zot vant pou

goute. Ler nou pe vwar tou sa zefor ki pe ganny fer e sa osi nou demann nou bann etidyan pou travay dir e plis zefor pou donn pli bon rezilta.

Lozman en lot preokipasyon mon distrik parey dan tou lezot distrik. Plis ki 220 dimoun ki aktiv lo lalis lakaz pe esper lakaz pandan sa dernyen 2an. Plis ki 13 fanmir in kapab ganny asiste. E mon kontan ki tre byento dan sa bann semenn ki pe vini ankor 8 *unit* i sipoze ganny donneren avek 8 fanmir.

Proze redevlopman Kan Gard in fini re demare, Lotorite Distrik in deza fer bann konversasyon avek Departman Lakaz e plis detay pou kominike dan bann zour ki vini.

Nou'n osi fer nou premye *meeting* sou distrik pou sa lannen kot plan ki pe ganny fer, ki nou ava kapab annan plis ki 20 fanmir lo lalis bann dimoun ki pe esper en kare later ou lakaz, ki zot ava bouze tre byento antretan ki redevlopman li menm i pe kontinyen.

Lannen pase ansanm avek en group zofisye Departman Later ek Minis Rangasamy, nou ti osi al vizit en lot *site* Copolia, *ex-* Murray kot i annan plan pou li vin en *housing estate*. E la mon profite pou propoz avek Minis pou osi konsider sa landrwa pou vin anba en *self-*

financing program. Dan distrik Plaisance ozordi bann zenn in pare pou investir dan zot fitir.

An regardan bann proze distrik pou lannen 2022, 2 fanmir pou byento ganny akse avek en semen konfortab apre plis ki en pake lannen espere. Pou 2023 zabitan kot semen Tristar ki en pake lannen espere zot osi. Sa proze ti pe ale vini, la mon annan plezir pou anonse ki sa plan semen in fini pare e tre byento pou annan en *meeting* ki pou ganny fer pou eksplik bann zabitan lo fason ki sa proze pou demare.

Lafanmir Porice, Belle, Molle osi pou sanse sa lannen avek en proze kapital. En lot fason pou sa bann zabitan ariv kot zot apre ki zot in lager pou plizyer deseni. Apre ki nou'n vin zwenn en gran *project land bank* ansanm avek DA ek bann lezot Lazans, nou'n revwar bann proze priyorite, sirtou bann ki bann zabitan in demande pou plizyer lannen. E ansanm parey nou ti promet zot, se ansanm ki nou pou vwar en solisyon.

Mr Speaker, dan tou sa ki pe pase dan distrik e dan pei, distrik Plaisance pou kontinyen rekonnèt zefor bann ki'n donn tou dan nenport ki fason dan lakominote e dan pei an zeneral. Nou pa kapab mazin

sa bann dimoun zis dan en temwannayaz dan en lanterman, kot nou pa ni konnen si zot pe tande.

Ti en plezir sa lannen ankor enn fwa, pou la 2^{em} fwa pou nou rekonpans ankor 10 madanm ki distrik i santi ki zot in donn tou dan zot domenn respektif e zot in vin koman en legzanp pou lasosyete e pou bann lezot zenn madanm ki pe monte.

Sa lannen nou tre fyer pou rekonnet 2 zenn madanm parmi tou sa bann eksperyans. Sa aktivite in ganny kree pou kontinyen ankouraz sa ki pli zenn pou met pozitivite premye dan zot lavi. Se menm mesaz ki mon anvoye avek bann pti zanfan lakres Plaisance, sa tou le 8 Septanm kot nou selebre lazournen literatir ansanm. E apre sa nou donn zot en token en liv koman en lapresyasyon e osi koman en komansman pou fer zot vwar lentera lir a en tre zenn az.

Koman Manm Elekte pou distrik Plaisance, mon osi asiz lo 3 komite ki annan pou fer avek mon louvraz Lasanble. Sa i COGA, kot ansanm ek lezot Manm nou vwar bann lasirans ki Gouvernman i donner devan Lasanble Nasyonal. Lannen ki'n pase nou'n fer plizyer travay kot nou'n apel plizyer

Departman konsernen e la mon oule remersye tou mon bann koleg Manm lo Komite e osi mon *Chair*, Mrs Sylvanne Lemiel e osi mon *Vice-Chair*, Hon Norbert Loizeau pou zot sipor.

Dezyennm Komite ki mon asize lo la i *FPAC* ki li osi in travay bokou. Parfwa i pa neseserman ki tou keksoz ki nou'n bezwen fer li vin en *live hearing* oubyen anmenn lo medya. Nou'n zwenn plizyer Lazans, kestyonn zot lo bann depans e osi bokou *follow-up* pou fer sa lannen.

Lo lot Komite ki mon en Manm lo la i *SADC-PF* ki regroup bann Parlmanter dan rezyon Lafrik. Mon asiz lo komite La Demokrasi ek Bonn Gouvernans e mon annan gran plezir pou anonse Mr Speaker, ki koman en manm Komite *SADC-PF* ek bann lentervansyon ki mon fer lo mon Komite, in fer ki 2 zenn Plaisance pou tre byento pret serman koman 2 zenn Onorab dan Lasanble Lazenés *SADC*.

Sa i montre en bon *networking* ki zot *MNA* pe fer dan son travay. E sa 2 zenn pa pe zis al reprezant Plaisance Mr Speaker, i pe al reprezant Sesel.

Mr Speaker, i ankourazan ler Prezidan i donn en bilan lo lenfrastruktir nou bann fasilite sportif. Sa i osi lo menm laliny

mon kestyon ki mon ti demann Minis pou *Sport* lo kote bann lenfrastruktir sportif dan pei, apre plizyer lannen ki zot in ganny neglize, ozordi mon kontan ki bann zenn mon distrik ki servi sa bann fasilite, pou tre byento kapab servi li dan konfor. Wi Mr Speaker, apre plis ki 2an sa i en travay remarkab.

Mon ti a kontan remersye tou dimoun ki'n ed mwan ler mon tap zot laport dan nenport ki fason ki zot kapab, ler mon pe sey rod en laklerte pou mon bann zabitan. Mon kapab dir ozordi, menm dimoun dan distrik pe partisipe. Se sa lapros ki nou pe rode. Avek menm lapros, tre byento zabitan Fairview La Misère pou ganny zot premye *bus stop* apre ki zot in esper bis dan kondisyon ki pa favorab ditou pandan sa bann dernyen lannen.

Wi bann zabitan, zot *MNA* in tann zot e en biznessmenn dan nou distrik in pare pou donn son *full* finansman pou sa *bus stop*. An se moman plan i an se moman pe ganny travay lo la kot *SLTA* e nou espekte ganny sans vwar sa plan dan bann zour ki vini e sa kominikasyon pou fer avek zot. Ankor enn fwa pou annan en konsiltativ lo la, espesyalman

ler nou pe regard landrwa kot si i vre i sitye pou nou met sa *bus stop*.

E mon ti a kontan osi remersye tou bann dimoun ki'n asiste nou dan bann aktivite volonter dan distrik Plaisance dan nenport ki fason. Dan botan, dan movetan, e nou vwar zot e nou apresye zot bokou.

Pou sa zenn dan Plaisance ki pe kontinyen fer eroin vin son zanmi prefere, mon krwar moman refleksyon lo sa in arive. In ler pou met sa lennmi dekote. Lontan en dimoun ki ti fim son lapay Mr Speaker, ti leve bomaten al rod son zournen, ed son fanmir. Sa ti vin koman en lanmizman pou li, en fason detant pou li. I pa ti son dalon.

Me ozordi ek eroin, menm ou gran manman ler pe rod son rob desanm pou li al lopital, i tande pe ganny vann lo *ghetto* ouswa bouyon Dimans ler i pe al kwi in fini disparet dan *deep* ouswa byen rar ki i kapab konnen ki'n pase avek.

Se sa i bann konplent ki bann paran i vin akont mwan e zot vin apre lo nou zepol pou rod en soutyen parfwa e menm en *advice*. E sa bann keksoz i pa gou pou tande. E nou dan Plaisance nou pe siport sa lager kont eroin pou lavenir nou

bann zabitan dan nou distrik e pou byennet nou pei.

Ler mon lo sa laliny mon pou ankouraz zabitan pou reste angaze. La mon remersye tim Ladministrasyon Distrik Plaisance anba gidans DA, Ms Mary-Anne Florentine ek son lekip. San oubliy nou bann volonter ki angaze a nenport moman ki nou bezwen zot sipor. San oubliy mon *clerk*, Ms Nadia Valentin ki annan son distrik a ker. Mersi zot tou pou zot sipor. Ansanm ek nou kominote, Desanm lannen pase nou'n kapab met en sourir lo figir nou bann zanfan.

Nou'n kapab fer aze regroupe, degourdi ansanm. E bann ki otreman kapab, in kapab annan en pti sourir nwel lo zot figir zot osi. Se sa ki nou apel travay ansanm. Met tou diferans dekote, fer nou distrik briye.

Mr Speaker, ler mon pe desann lo laliny finisyon mon diskour, mon ti a kontan dir de mo lo *Air Seychelles*. Mr Speaker, tou dimoun lannen pase lanmen ti lo latet ler nou ti ganny sa move nouvel lo nou lakonpanyen aeryen. Ti ariv isi menm dan sa Lasanble; bokou diskisyon ti ganny fer e nou'n vwar ki nou ti annan en Gouvernman ki vwar keksoz pli lwen.

E ozordi mon kontan pou tandé ki menm sa lakonpanyen ozordi in remet son 2 lezel anler kot i pe anvole e bon nouvel ankor ki mon pe aprann se ki zot osi dan laliny pou fer profi. Se sa ki nou apel en Gouvernman responsab.

I ti annan bann opsyon kot i ti kapab dir ferm sa lakonpanyen kot nou ti pou vwar plizyer travayer lo semen ozordi.

E alors mesaz ki mon annan pou bann travayer dan sa lakonpanyen, mon krwar zot in vwar tre byen ki mannyer keksoz in marse. Zot in vwar lekel ki'n siport zot e alors byensir desizyon pou reste avek zot ler zot fer zot desizyon.

Pou fini Mr Speaker, mon oule dir Bondye Papa mersi ki pli o pou son lagras ek lasazes ki'n donn mwan toulezour dan mon louvraz e osi bann zabitan ki *call* mwan detanzaot pou get mwan manter mon ete. E osi mon ti a kontan osi dir mersi Speaker Roger Mancienne ek Egzekitiv pou son sipor.

E Mr Speaker, avan mon terminen mon ti a kontan zis pas lo en pti mo ki Onorab Bastienne in anvoy pou mwan, ki an se moman i lo en vizit travay aletranze pou son distrik.

Mr Speaker, permet mwan pou dir 2 pti mo lo lapar Onorab Desheila Bastienne ki lo en misyon travay aletranze pou reprezant nou Lasanble kot *Pan African Parliament*, (PAP) Mon site,

“Mon pou remersye Prezidan Ramkalawan pou sa zoli ladres lo Leta Lanasyon ki i ti delivre Vandredi le 10 Mars dan nou Lasanble.’ (Onorab Bastienne in dir) “ki’n donn nou bokou keksoz pou reflesir lo la e pou aranz nou fason fer keksoz e osi annan lespwar pou nou pei. E pou nou pep an zeneral.

Mr Speaker, Prezidan Ramkalawan in fer byen kler ki pou nou vwar rezilta pou nou pei bouze, fodre nou tou nou zwe nou rol e nou pran nou responsabilite o serye.

Letan Prezidan pe kontinyen dir ki Sesel i pour tou son zanfan, i ape donn lasirans ki dan sa Gouvernman tou dimoun i annan son drwa travay, drwa ledikasyon, drwa lasante, drwa pou ganny son prop lakaz ouswa ganny asiste atraver bann *Housing Scheme* ki an plas e menm bann servis sosyal kan ou merite. Enkli bokou lezot servis, ki lalis i long.

Mr Speaker, dan nou zoli pei ozordi plas pou divizyon

napa plas. Pou okenn diskriminasyon napa plas. Napa plas pou fer politik aköz bann zwe manev politik i zis met retar dan travay. Fodre i disparet dan sa nouvo Sesel.

I malere Mr Speaker, ki i annan ki krwar zot kapab kontinyen fer malis zot prosen aköz zot annan lanmen dan menm pozisyon e dapre zot, zot ki ankor pe *rule border*. Trenn zot lipye, kasyet *file*, donn fo lenformasyon, fer *strike*, pa reponn telefonn, pa reponn *email*, koz manti, fer propagann.” Lalis i long, ki Onorab Bastienne in dir.

“Mr Speaker, ozordi letan nou pe travay anba slogan Sesel pour tou son zanfan, i enportan ki nou tou nou pran nou responsabilite nou travay pou nou pei, nou distrik e pep Seselwa an zeneral.

Malgre tou lesey pou met pei an retar e kree bokou fristrasyon pou sa 2an, nou fyer pou temwanny tou sa bann progre pe fer pou pei avans pli lwen ankor.

Mr Speaker, tou sa bann keksoz ki’n ganny mansyonnen i laprev travay dir en Gouvernman responsab ki pran bon desizyon, ki travay pou lepep e ki anmenn bon solisyon pou son problemn.

Pou li donn lasirans zabitan Perseverance ki koman zot *MNA*, mon pe kontinyen pouse pou ki sa lannen nou ava arive vwar enn de pti proze ki pou komanse dan nou distrik,” Onorab Bastienne i dir.

“Avek sipor Minister Gouvernman Lokal, Minister Labita, Minister *Sport* ek Lazenes, Minister Lantreprenarya ek Lotorite Distrik, ansanm nou pe desid lo enn de proze priyoriter dan distrik ki pou donn lentere nou zabitan.

Nou okouran ki vandalizm pe kontinyen ganny fer, me sa pa pou dekouraz nou e Lazans konsernen pou kontinyen travay pou anmenn solisyon lo problemm *streetlight* dan Perseverance.

En remersiman spesyal i al pou elektrisyen, Mr Pierre Jeannie ki touzour pare pou reponn lapel sak fwa ki i ganny apele pou vin rezourd en problemm lalimyer.

Remersiman osi i al pou mon Clerk, Hazel Larame. *DA* Nichole ek *DA* Aaron. Tou *staff* le de biro Ladministrasyon Distrik, tou mon aktivis e osi tou Manm Onorab.” Onorab Bastienne i terminen. Avek sa mon termin sa Mr Speaker. Mersi.

(APPLAUSE)

MR DEPUTY SPEAKER

Mersi Onorab Labrosse. E prosen entervenans lo lalis se Onorab Wallace Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour tou Manm Onorab. E en bonzour spesyal pou tou Seselwa ki pe ekout nou ozordi.

Ozordi Mr Speaker, mon ti a kontan zwenn avek tou siporter *United Seychelles* pou mon dir avek lafyerte ki mon en siporter *United Seychelles*!

(APPLAUSE)

HON WALLACE COSGROW

Mon fyer mon en Manm *United Seychelles* dan Lasanble Nasyonal e mon fyer mon pe koz pou tou Seselwa e sirtou pou bann Seselwa ki pe pas dan bokou difikilte anba sa Gouvernman *LDS*.

En keksoz ki bann Manm *LDS* pa'n kapab fer ziska prezan.

(APPLAUSE)

HON WALLACE COSGROW

Ankor enn fwa. E sa letan dan lannen kot nou bann Manm Lasanble Nasyonal nou ganny

sa loportinite pou reazir lo ladres Leta nou Nasyon ki ganny delivre par Prezidan Larepublik o komansman travay Lasanble Nasyonal o komansman en nouvo lannen.

Mr Speaker, ladres lo Leta nou Nasyon i enn parmi bann ladres pli enportan ki ganny fer par Prezidan Larepublik e i ganny fer o komansman lannen zisteman pou donn en kontrandi lo sityasyon nou pei. I en ladres ki kaptir lentere bokou Seselwa e bokou i ekout avek antisipasyon.

E si oule en baromet lo ki pep Seselwa i mezir performans son Gouvernman pandan sa lannen presedan. Me i malere Mr Speaker, ki pou ankor enn fwa e sa se 3em ladres Prezidan, i enn ki'n mal ganny prepare e ki pa reflekte ditou Leta Nasyon Seselwa an 2023 apre preski 3an ki Gouvernman LDS i pe diriz Sesel.

I en ladres kosmetik e siperfisyel e pa al ase o profon pou koz lo bann vre problem ki Sesel e Seselwa pe fer fas avek e pa donn okenn lespwar ki keksoz pou amelyore.

En ladres sitan enportan ki ganny fer dan nou Lasanble avek bann envite distenge ni menm salitasyon Prezidan pa ti'n pran letan pou ekrir.

Mon'n obzerv tre byen kot Prezidan i demann Mr Speaker pret en bout papye ki annan salitasyon bann envite lo la pou li lir o komansman son diskour. Sa pou mwan Mr Speaker, i pa akseptab pou en diskour a sa nivo. I senpleman en mank respe e i en siny move preparasyon.

Sa diskour ki'n ganny delivre par Prezidan Larepublik Vandredi i enn ki mon term li koman en vre leta fristrasyon e non pa Leta nou Nasyon!

(APPLAUSE)

HON WALLACE COSGROW

I kler ki Prezidan i fristre par son prop inabilite e inabilite son ladministrasyon pou diriz e delivre pou Sesel e pep Seselwa. I sitan fristre ki in perdi tou abilite pou dyagnoz vre Leta sa Nasyon ki i ape dirize. I pa'n kapab ofer okenn lespwar pou Sesel e Seselwa.

Pou preski enn erdtan Prezidan in debout devan nou e blanm tou dimoun e tou keksoz anba soley, pou tou keksoz mal dan sa pei. Ofet, pou servi parey i kontan dir. Si nou analiz byen sa ladres napa naryen ki pe marse Sesel. Me foutou, lekel ki pe diriz Sesel, mwan? *United Seychelles? Come on my*

man leve ekout sa pep e travay pou sa pep!

Ou ti demann en manda pou fer keksoz diferan, pli byen me non pa diferan, pli mal. Si ou pa kapab, si ou napa solisyon kile sed laplas avek en Gouvernman *United Seychelles* e nou a montre ou ki mannyer i dirize!

(APPLAUSE)

HON WALLACE COSGROW

Mon ti krwar Mr Speaker ki premye SONA ti en katastrof, me sa enn Vandredi in sirpas tou mon krwayans, akoz ti en vre katastrof! E aprezan i mon responsabilite e in responsabilite tim *United Seychelles* ziska prezan isi dan sa Lasanble pou dir avek nou pep, ki vre Leta nou Nasyon.

Ziska prezan *well done* nou *on point* mon bann koleg. I malere ki in annan bokou menas dan ladres Prezidan, menas bann ki servi medya sosyal pou eksprim zot fristrasyon e bliye ki li ek son bann aktivis in pou bokou lannen servi sa platform pou atak Gouvernman oparavan e atak bokou endividi.

Fas a sa bann menas ozordi bokou dimoun i per pou eksprim zot, zot per perdi zot

louvraz e ganny marzinalize. In menm annan ki'n ganny arete, detenir e kot zot lekipman elektronik personnel in ganny sezi e fouy lo la. Eski se sa laliberte lekspresyon e respe pou drwa imen ki bann gran liberal parey zot i profese?

I paret mwan ki sa viris menas in afekte menm *Leader Zafer* Gouvernman. I menas Lasanble Nasyonal avek pep Seselwa pou servi son mazorite absoli. Mon enkyet Mr Speaker, sirtou sorti kot en Zonm de Lwa e en gran liberal ki *rule of law* i sipoze enn zot prensip kardinal.

Eski nou pou vwar en latak lo nou Konstitisyon par sa Parti Mazoriter? Eski nou pou vwar bann Lalwa e desizyon ki pou ganny enpoze lo nou pep akoz zot gran mazorite?

Pou preski 3an avek en mazorite absoli zot pa'n kapab fer naryen pou soulaz soufrans sa pep, prezan ki ou decide servi li Onorab? Atansyon pa krwar nou pou larg ou ek ou mazorite.

Premye group dimoun pou ganny menase sete travayer Servis Piblik. Annefe en gran parti sa diskour ti vize ver Servis Piblik. Koze mirak pou travayer Servis Piblik ti dan sa ladres. Sef Servis Piblik Mr Speaker se Mr Prezidan Larepublik li menm. Ansarz

bann Minister Departman e Lazans Piblik se bann Minis dan Gouvernman Prezidan Ramkalawan.

Si ozordi Prezidan i santi ki Servis Piblik pa pe marse, i annan zis pou li ek son *Cabinet* get zot prop lekor dan laglas e blanm zot prop lekor non pa travayer Servis Piblik. I zot devwar pou aziste kot pa pe fonksyonnen, revwar bann prosedir e Polisi pou fer keksoz pli efikas. Tou fason sete sa ki zot ti promet pep Seselwa an 2020 ler zot ti pe demann en manda pou dirize.

Ozordi Mr Speaker, linefikasite dan Servis Piblik e Gouvernman an zeneral, se pa akoz i annan siporter *United Seychelles* ki pe travay dan Servis Piblik me se akoz depi Oktob 2020 sa Gouvernman *LDS* pe sistematikman demantibil tou striktir ki ti an plas.

E la Onorab Esparon in *remind* nou, in dir tre kler pa *US* ki pe trenn lipye. In dakor e admet ki Gouvernman *LDS* ki pe fer dimoun fristre.

(APPLAUSE)

HON WALLACE COSGROW

Zot in atraver en plan byen kalkile retir bokou fonksyonner Servis Piblik tre eksperyanse e

tre kapab dan bann pozisyon tre kle. Ki swa nivo Sekreter Prensipal, Sef Egzekitiv, Direkter Zeneral e menm a nivo Administrater Distrik. E la mon pe dir zot krwar mwan sa detrwa ki reste ki zot pe menase pou tire, ler zot fer li, nou sityasyon pou vin pli pir.

Wi parey Mr Prezidan mazorite Seselwa i fristre, zot fristre avek en Servis Piblik ki pa performan. Zot pa ganny larepons e solisyon zot bann problem, zot keksoz pa pe bouze e bokou pe zis vir an ron e pa pe vwar okenn solisyon. Bokou fwa pou bann keksoz tre senp. Zis parey *National Band*, apre ki i ti kraz *Brass Band* Lotris, ti promet zot lenstriman ek *allowance*. Ziska aprezan, naryen.

Ou koz fristrasyon, vre fristrasyon se sa Lalwa ogmant laz retreat ki zot pe al entrodwir. La mon dir zot, *US* atraver *Leader* Lopozisyon pe al *table* en Mosyon pou retir sa Lalwa. In ler pou fer parey pep Franse e fer en lamars protestasyon. Sa se vre fristrasyon sorti laz 63an pou mont 65an!

(APPLAUSE)

HON WALLACE COSGROW

Proseidir i sanze, lenplimantasyon i fer sitwayen

fristre, kit zot san solisyon. Desizyon sa konsiltasyon in vin en norm dan Servis Piblik. Sef i donn lord aköz i sef e apre i refoüle, pas Lalwa e apre ler Seselwa i anvoy lavwa zot taye zot retire, apre fer sanblan fer konsiltasyon ler Lalwa in fini *repeal*.

Fer desizyon mank konpasyon lo goute pou bann zanfan, apre ler in so dir let ti *fake*. Ler Onorab *Leader Zafer* Gouvernman i koz lo *breakfast* koman en gran lakonplisman, mon bezwen dir li, si zot ti pran bann desizyon pou soulaz Bidze sa pep, fer desann pri lavi, met larzan dan pos Seselwa paran ti a prezerv son dinyite e donn *breakfast* son zanfan se li.

(APPLAUSE)

HON WALLACE COSGROW

La realite i se ki bokou paran napa! *LDS* sakouy en pe sa pye ouswa anvoy de koub, mang i a tonbe. Pa asiz dan pye e manz tou zot menm.

Mon *advice* pou ou Mr Prezidan, sey fer Sesel vin ou rezidans permanan e non pa en landrwa vakans.

Dirize e ler i ava annan vre direksyon keksoz i ava sanz pou le meyer pou nou pep. Si sa i

difisil zis glis a kote, sed laplas nou a fer li pou ou!

(APPLAUSE)

HON WALLACE COSGROW

E Mr Speaker, ozordi Sesel pe sirman glis ver en presipis a en vites tre alarman e si naryen pa ganny fer; si Gouvernman i kontinyen pa pran aksyon e reste dan en letarzi, kot lanmen gos pa konnen ki lanmen drwat pe fer, e kontinyen mars lo lipye kanmarad se lamazorite nou pep ki pou sibir konsekans.

Deza bokou pe dir zot in fatige e zot in ganny ase, bokou i viv dan dezespwar e pe dir ki 2025 pe tro tarde. In ler pou tir li, in ler pou tir *LDS* e *Wavel out!*

(APPLAUSE)

HON WALLACE COSGROW

Seselwa ozordi an 2023 pe santi douler sanzman dan diferan fason; apre en promes pou sakouy pye e met larzan dan pos Seselwa, bokou i vwar zot sityasyon finansyel pli dan dir. Pri komodite i kontinyen mont pli o, larzan pou pey tata pou al travay e retourn dan lakour i ozordi en sonm konsiderab dan Bidze la fanmir.

Bidze Lafanmir pa aziste e pa ariv ziska lapey lot lafendimwan. Zot sey tap en

laport kot Lazans Proteksyon Sosyal, me dan mazorite ka sa i anven.

Pou bokou parmi sa anviron 13mil pansyoner lavi i en kosmar, se pourtan pa tro lontan en zoli rev en pansyon R10mil par mwan ti ganny promet. Me ziska aprezan i reste zis en rev. Lapovrete parmi Seselwa pe ogmante e si nou kontiny lo sa semen bokou fanmir pou tonm dan lapovrete absoli.

Mr Speaker, mon'n komans mon ladres koumsa akoz mon krwar i enportan penn en portre zeneral lo la realite ki devan nou e ki mazorite nou pep pe fer fas avek. Si par kont zot ti krwar ki sa i vre Leta nou Nasyon ozordi non, ser ek frer Seselwa Prezidan pa ni menm *scratch the surface, comme* dir Angle.

Linefikasite e move zeran servis gouvènmantal, dalonnri, faver e wi, koripsyon in bokou dan nou pei ozordi.

Les mwan abord premyerman Mr Speaker, Servis Lasante ozordi Sesel. Kot ou pase sanmenm ki lo lalev Seselwa. Prezidan dan son diskour in koz lo konstrir en nouvo Lopital Sesel e i aret lanmenm konmsi sa en nouvo lide li ek son Gouvènmant.

In koz lo nouvo *oxygen plant* ki byen, me pli gro problem e konsern nou pep se mankman latizann. Sa i sirman devret en priyorite limero enn. Nou bezwen realize ki Seselwa pe demann en servis lasante kot napa fristrasyon e reponn a son bezwen dan en fason satisfèzan.

Napa problem dra ek zorye, napa problem mankman latizann enportan, tel ki latizann pou tretman kanser. Kot lapwentman tretman spesyalize i enn ki dan en letan rezonnab.

Mr Speaker, nou Servis Lasante i dan en leta kriz, akoz move zeran lenfrastruktir, resours imen, resours finansyel e move planifikasyon. Spesyaliz etranze i ganny promote me zot refize valoriz e promot Spesyalis Seselwa. Kad servis proteksyon dan servis lasante pou bann profesyonnel, sirtou bann Spesyalis ek Dokter pa pe ganny respekte. Zot refize donn en Spesyalis transpor ler i *on call*, me selman zot kapab *afford* tou sord *allowance* pou Minis.

Ozordi Mr Speaker, lekspektans lavi en Seselwa pe redwir. To mortalite parmi zanfan pe ogmante e wi *casualty* Mr Prezidan i vwar bokou dimoun e sa i en siny ki swen a nivo kominoter in

degrade e pa pe deservi son fonksyon.

Mr Speaker, moral parmi bann travayer lasante i ba e zot santi ki personn pa *care*. Napa *leadership*, napa direksyon e standar pe gradyelman tonbe. Se sa vre leta nou Servis Lasante ozordi e se sa ki Prezidan ti merit pe koz lo la dan son ladres!

(APPLAUSE)

HON WALLACE COSGROW

Donn sa pep en lespwar pou en servis meyer. Mon mazine ki zot, zot ganny *allowance* medikal e zot kapab al rod en swen prive. E se sa la rezon akoz ki zot pa pe fatig zot.

E la ankor enn fwa mon oule dir avek Minis Lasante, si ou pa kapab *provide leadership*, si ou pa kapab rod solisyon pou sa leta ki Servis Lasante i ladan *resign* e sed laplas! Prezidan i fer en pti vizit dan lopital dan milye lannwit san ou prezans. Si sa pa en siny, mon pa konnen mwan menm.

(APPLAUSE)

HON WALLACE COSGROW

Parey Servis Lasante nou sistenm ledikasyon i ozordi enkyetan. Konmsi problemn mank *teacher's* pa ase. Ozordi

nou servis ledikasyon pe fonksyonn lo *trial and error*. E la sa ki Minis i dir e lo lord ki sorti santral. Ni en sanblan sa lotonomi a nivo lekol ki Minis ti koz lo la depi son premye lannen dan lofis ou pa vwar e la nou pe apros deza 3an.

Si i annan en lot kategori travayer ki fristre enormeman Mr Speaker se bann ansennyan. Si pa pou en problemn *allowance* ki ti ganny promet me ki pa'n ganny bidzete, i pou logmantasyon lo la kantite peryod ki zot bezwen ansennyan. Moral bokou bann ansennyan i ba e zot pe dir ki zot *overload* avek louvraz e zot dekouraze.

Bann *teacher assistant* osi pe konplent, travay i bokou e bokou fwa zot vwar zot pe pran kontrol laklas. Sitan lenvestisman pou antrenn en ansennyan e apre en kourt letan dan profesyon zot dekouraze e al rod en lot karyer.

In ler pou vreman ekout lavwa ban ansennyan. Ozordi ansennyan i bezwen al prepar goute, ede prepar goute e sa pov *tuck shop operator* li ki pe sey fer en pti biznes, i pri dan birokrasi peyman. Lafendimwan i arive son *cashflow* napa pou pey sa ki i anploye akoz peyman i ankor pe *process*.

Ou fristre Mr Prezidan? Be kot ou met sa ban dimoun ki pe sey fer zot pti biznes. Bann zenn etidyan aletranze ki pe esper zot logmantasyon 10poursan dan zot *stipend* parey ti'n ganny anonse, i aprezan aprann ki pa tou ki pou ganny parey.

Ankor, fer desizyon apre sanze. Omwen sa enn zot pa kapab dir ti en lanons *fake*. Se sa leta servis ledikasyon ozordi Sesel e ki Prezidan pa'n oze aborde. Wi Mr Speaker, drog i en fleo ki pe afekte nou sosyete, nou kominote, nou lafanmir e nou lazenes an partikilye.

E sa size in ganny prominans dan ladres Prezidan. Ozordi ou zanfandemen i kapab pou mwan. Alors nou neserman bezwen konsernen.

Me i kantmenm enportan Mr Speaker pou mwan fer resorti serten fe. Premyerman Prezidan li menm dan bokou lenstans in fer detrwa prononsman dan lepase koman *Leader* Lopozisyon lo sa size.

Pep Seselwa i ava rapel ki i ti dir ki i kapab rezourd sa probleman dan 100zour. E la nou pe apros byento 3an depi ki in pran direksyon pei. Posibleman ozordi i annan plis adikt e bokou plis drog dan Sesel ki zanmen. Ki'n arive avek son stratezi 100zour? Eski ti en prononsman dan naivite

ouswa zis en bat latet pou ganny senpati bann ki pe soufer?

Dezyenman Mr Speaker, nou tou nou rapel sa fame prononsman kot Prezidan ti dir i konnen lekel bann gro trafikan e ki in fer en konversasyon avek zot. Me la Vandredi i dir nou zot pa kapab atrap drog lo sa bann dimoun. An menm tan ki tousala pe arive leskiz apre leskiz, i annan en tim ki pe teroriz bann viktim drog dan nou bann kominote?

Mon pas Stevenson anler St Louis, mon ganny rakonte bann lenstans kot zenn pe ganny teorize e bate. Corgat Estate menm parey, ganny arete, bate, pran sa ki annan ek ou apre larg ou.

Lapolis i lav lanmen ladan e i dir ou zot pa enterfer dan louvraz *State*. Pli soka dan diskour Prezidan se ler i dir zot in zet plis ki en tonn drog dan delo sale, plis ki 3mil met fonder. Selman lavyann torti, pye kanabis ki ganny sezi i ganny detri devan televizyon nasyonal.

Sa enn i ganny zet anba - i ganny zet dan lanmer e sa bann trafiker i ganny large avek zot bato san okenn sarz. Mon demann mon lekor ki mannyer zot ti konnen sa la kantite drog ti lavalen en tonn si zot pa'n

peze? Bann bout Mr Speaker, pa azoute. I annan kek nen ladan. Sa enn i difisil pou mwan konpran.

Onorab *Leader* Zafer Gouvernman i dir ki *dealer* drog i ganny soutire par politisyen pou ganny vot, be dir mwan lekel politisyen ki i ape koz lo la? Sa enn ki ti dir in fer konversasyon ek bann gro *dealers*?

(APPLAUSE)

HON WALLACE COSGROW

Sa enn ki i ti dir sa bann *dealers* zot osi zot en bann viktim? I menm annan koze deor ki parti, zot parti dan kanpanny eleksyon 20 ti ganny finanse par *dealers*. Pa mwan ki'n dir, koze deor. Sey eklersi mwan Onorab, sey eklersi Seselwa.

Mr Speaker, malerezman lapros sa Gouvernman anver drog i enn ki pa pou aport okenn fri. Ozordi zot in preske demantil tou program vize ver sipor siko sosyal, tretman e reabilitasyon. E zot ti met presyon pou ferm *NDEA* e tou resaman ferm *ANB*.

Zot refize vwar adiksyon koman en problem lasante e en problem enterzenerasyonnel. Tou fasilite reabilitasyon in fermen e napa

okenn sipor e lespwar pou bann ki'n pri dan sa fleo.

Mansyon in ganny fer lo en sant tretman ki pou ganny konstrir, ankor en nide resikle parske sa ti'n deza fini tonm dakor avan. Me sete Lasanble 15 lo 10 ki'n fer tou fason pou blok sa proze ki ti'n ganny agree ek Gouvernman *UAE*. Me dan en diferan konsep ki ti pou konpri tretman entegral ek bann program reabilitasyon e provizyon bann *skills* nesese kot bann adikt ti pou kapab re antre dan lasosyete ler zot konplete.

Mr Speaker, lanplwa i reste en sekter avek bokou konsern, prensipalman parmi bann zenn ki pe rod en travay. Statistik i montre nou ki to lanplwa parmi bann zenn i reste en konsern. I reste en poursantaz ase o ler ou konpar li avek to mank lanplwa an zeneral.

I annan en nesese pou annan en kordinasyon pli byen kalkile ant Departman Lanplwa en Minister Ledikasyon, avek en bi pou lo en kote revwar program ledikasyon ek *training* vize ver bann zenn. Sirtou bann ki anvi pran en karyer dan lendistri lospitalite. E lo lot kote revwar bann kondisyon travay dan sa bann sekter pou ankouraz plis nou

zenn pran en karyer dan sa bann sektè e redwir lakantite etranze ki ganny anploye dan sa bann sektè.

Letan in arive pou revwar kondisyon travay dan Sektè Tourizm e Lospitalite, si nou oule redwir depandan lo etranze e ankouraz plis zenn pou zwenn sa sektè.

Kondisyon travayer i reste en konsèrn reel ozordi dan nou pei menm si i annan Lalwa ki reglemant sa. Gouvernman i bezwen fer en zefor spesyal ki swa atraver program sansibilizasyon ou menm plis lantrenman pou bann anplwayer.

Travayer i bezwen konn zot drwa e osi zot responsabilite. E anplwayer i bezwen kapab respekte sa bann drwa. Tro souvan nou pe antann bann konplent labi dan bann landrwa travay. Mon ti ava krwar ki Prezidan ti pou adres sa koman en konsèrn reel dan plas zis kritik travayer konmkwa zot pe trenn lipye.

Ou konnen Mr Speaker, la mazorite nou sitwayen se bann travayer, nou travay tre dir. Sityasyon ekonomik parkont i fer ki pour en mazorite nou pep menm si zot travay dir zot vwar li difisil pou fer 2 bout zwenn. E parey mon'n dir, souvandfwa lapey lafendimwan pa arive lot

lafendimwan. Se pour sa rezon ki Lazans Proteksyon Sosyal ti ganny kree.

Pandan sa dernyen 2an sa Lazans in perdi direksyon e rezondet son kreasyon. Zot konsèrn en avek fer *savings*, fer dimoun tourn an ron avek en pake birokrasi pou zis dir zot apre ki ou pa kalifye lasistans. La Prezidan i dir nou ki sa Lazans pe al ogmant son bann lasistans. Bokou fanmir ozordi menm i dan bezwen e pe demande kan?

Mon analiz dan tousala se ki en revè total i bezwen ganny fer ek bann prosedir ki ganny servi par sa Lazans sansan napa naryen ki pou sanze. En laplikasyon pou kontinyen pran mwan avan i ganny rezilta e antretan lafanmir i soufer plis.

Sa latitid ki tou dimoun i vin rod led, i en gran pares fodre arete. Nou tou nou'n admet ki en kantite bann zenn in pri dan malez, in pri malerezman dan malez sosyal. Me nou konnen osi ki lazènes se fitir nou Nasyon.

Mon'n deza dir ki zenn i la relev e ki i annan bokou pozitivite parmi lazènes. Annefe lamazorite pe pratik pozitivite. Me Prezidan pa'n adres lazènes dan son diskour, zot kapab dir ki diskour ti diferan, diskour ti isi, diskour ti laba me zenn i

prezant en loportinite pou en fitir diferan e en fitir meyer. Zenn i annan rev, zenn i annan lenspirasyon. Zot rev sikse, zot rev annan zot prop lakaz, zot prop loto e en bon dyob, en bon saler, eksetera, eksetera. Me a la resers zot bann rev i tro fasil pou deroute, sa Gouvernman i bezwen sorti kler lo zot bann plan pou lazenes.

À *mon avis* size lazenes i bezwen ganny *mainstream* dan ou domenn lasosyete. Parey nou koz zenn dan *sport*, zenn dan kiltir, nou bezwen osi fasilite akse zenn dan biznes. Zenn dan devlopman teknolozi, zenn dan politik, eksetera. Se atraver sa lentegrasyon ki nou pou retir zenn dan negativite e dan malez sosyal.

Ozordi Parti *United Seychelles* i en legzanp, kot in donn loportinite zenn. Vis-Prezidan *United Seychelles* i en zenn Dokter.

(APPLAUSE)

HON WALLACE COSGROW

Sekreter Zeneral *United Seychelles* i en zenn Manm Lasanble Nasyonal.

(APPLAUSE)

HON WALLACE COSGROW

E *Leader* Lopoziyon dan Lasanble Nasyonal i osi i en zenn.

(APPLAUSE)

HON WALLACE COSGROW

E Mr Speaker zenn i osi vin nou bann *rally* an gran mazorite.

(APPLAUSE)

HON WALLACE COSGROW

Mr Speaker, Sesel se lanvironnman e sa 2 i difisil separe. Ou koz Lendistri Touris, ou koz lanvironnman, ou koz lo lapas ou osi koz lo lanvironnman. E wi Sesel i en sanpyon lanvironnman.

Pa akoz Prezidan Ramkalawan in fer detrwa *speech* dan bann *forum* aletranze, me akoz i annan en travay ek en zefor ekstraordiner pou ariv kot nou ete ozordi.

Parkont tou i kapab diferan si nou pa kontinyen asim sa rol *leadership*. Sanzman klimatik i enn bann pli gro menas pou nou lakonplisman koman en Pti Leta Zil vilnerab.

La Mr Speaker, mon oule profite eklersi Onorab Georges lo sa size *Multi-Dimensional Vulnerability Index*, ki i dir nou ki Prezidan Ramkalawan in

ganny rekonnèt koman en sanpyon.

Ou konnen Mr Speaker, se sa bann kalite *statement* ki fer sa Gouvernman ganny sa tit Gouvernman koup riban. Bann fe e rikord i la depi byen lontan, en travay komanse par Minis Danielle de St. Jorre byen lontan.

(APPLAUSE)

HON WALLACE COSGROW

E sa in ganny pouse kontinyelman par bann ansyen Minis pou finans siksesivman, Danny Faure e lezot. I lo rikord e la kominote enternasyonal i konnen e rapel lapel ansyen Prezidan Faure dan son ladres kot Nasyon-z-Ini an 2018 e 2019.

Finalman an 2020 an Desanm en rezolisyon Nasyon-z-Ini ti ganny adopte pou demann Sekreter Zeneral Nasyon-z-Ini pou donn rekomandasyon lo ki mannyer sa in deza pou ganny etabli. Annou aret fer distorsyon dan bann fe. Pa okenn Prezidan Ramkalawan ki'n pous sa dosye.

Aprè ler nou dir zot pe vin pran laglwar lo travay *US* zot oule nerve. Malerezman letan pa ase Mr Speaker pou mwan

kontinyen koz lo la, akòz i annan bokou pou dir.

MR DEPUTY SPEAKER

2 minit silvouple.

HON WALLACE COSGROW

Soutenabilite nou resours maren e proteksyon losean e nou biodiversite maren i en pwen entegral dan proteksyon nou lanvironnman. Santral a sa se leksplwatasyon nou stok pwason, sirtou dan lapes endistriyel.

I enteresan pour swiv pozisyon *LDS* lo sa size. *LDS* dan Lopoziyon son *Leader* i dir fodre *ban* sa bann zafer *FADs*, lapes avek *FADs*. Me ler i vin dan Gouvernman i sanz son *tune* vizavi *FAD*. Ki ou kapab konpran? Lapes en size ek imans lenportans, me diskour Leta Lanasyon pa'n tous li.

Mr Speaker, i annan sitan keksoz pour koz lo la. Sitan keksoz ki'n ganny kit ater par Prezidan ki mon panse ti merit ganny mansyonnen pour ki nou kapab met azour nou pep lo leta sa bann keksoz e Leta nou Nasyon.

Nou sitwayen i annan diferan lentere e zot anvi konnen ki pe pase dan serten domenn spesifik kot zot lentere i ete. Sekter Prive e domenn lantrepriz kot pti biznes pe

ganny difikilte pour kit zot biznes ouver. Prezidan pa abord sa size, se pourtan se zot ki form mazorite anplwayer Sesel e zot pe ganny ankouraze pour donn logmantasyon saler. San menm en diskisyon lo ki plan Gouvernman pour siport e devlop sa sekter pour ki zot ava kapab fer plis e an retour rekonpans travayer.

Malerezman Prezidan pa'n prepare, i pa'n fer en *speech* konplet pour adres lanasyon Seselwa, me in plito konsantre lo bann menas, lakizasyon ek latak lo Servis Piblik. Lo bann ki servi medya sosyal pour eksprim zot mekontantman ek fristrasyon; lo zournalis ki *challenge* li ek desizyon son Gouvernman, lo sa ki i apel bann dimoun ki swadizan pe fer sabotaz.

Sa ladres pour mwan i kler ki i en diskour en Prezidan ki'n vwar tou siny ki son pep i mekontan avek la fason ki sa pei pe ganny dirize. En Prezidan ki santi ki de zour an zour son popilarite e popilarite son parti pe tonbe, aköz zot bann linefikasite e inabilite pour delivre.

I en ladres vize ver son bann siporter pour re galvaniz son sipor. Me malerezman in mank abord bokou bann size ki pe tous lavi Seselwa toulezour.

Fas a tou sa bann mankman, *United Seychelles* i la pour fer resorti tou sa ki pe tous Seselwa pe enport ou lapartenans ou kouler politik. Nou kontinyen travay e reste angaze dan la kominote. Konpran soufrans sa pep.

Krwar mwan, frer ek ser Seselwa, dan son gran mazorite in ganny ase e in pare pour en lot sanzman 2025. *United Seychelles* i prezant en loportinite diferan e i reste sel opsyon pour Sesel! Mersi.

(APPLAUSE)

MR DEPUTY SPEAKER

Mersi Onorab Cosgrow. Nou pou pran en *break* la. Avan nou al *break* mon oule zis port zot latansyon lo en keksoz. Depi yer i annan 16 diskour ki'n ganny fer e i annan 3 mo ki'n ganny servi.

Pou Lasanble kekfwa pou bann Manm nou kapab krwar zis sa mo in pase koumsa. Solman nou pa kapab kontinyen glis dan sa direksyon. I annan mo "araze" in ganny servi, "foutou" in ganny servi 2 fwa, "geez" in ganny servi. Pou mwan sa bann mo i pa akseptab, nou merit revwar bann diskour ki pou kontinyen.

So port latansyon lo la silvouple. Nou ava pran *break* la e nou ava retournen 2er. Mersi.

(BREAK)

MR DEPUTY SPEAKER

Bonn apre midi tou bann Manm Onorab e manm piblik ki pe swiv nou. *Welcome back* to sesyon Lasanble pou sa Zedi. Avan nou kontinyen avek nou bann deliberasyon, mon'n vwar lanmen Onorab Cosgrow anler, ou ki ti dernyen Manm pou koze avan *break*.

HON WALLACE COSGROW

Yes, Mr Speaker. Mersi Mr Speaker. Mr Speaker, mon'n lev lanmen apre midi zis pou en pti pwen klarifikasyon akoz ler mon'n fini mon pa'n ganny sans. Apre ki ou'n fer sa lentervansyon, mon pa'n ganny sans rod sa klarifikasyon, akoz ou ti pe leve pou ale.

Mon klarifikasyon i an relasyon avek ou *statement* apre ki mon ti'n koze konsernan bann parol, bann mo. Mon pe zis rod en klarifikasyon. Eski dan mon *speech* ki mon'n dir sa bann keksoz *or* eski i an relasyon an zeneral?

Akoz zis apre sa mon ganny en *post* avek en zanmi sorti dan *Wavel 2025* e i preski

egzakte man sa ki ou'n dir. Mon pe gete si sa ki mon'n dir ouswa i en *issue Facebook* e prezan pe dekoul dan Lasanble Nasyonal? Mersi bokou.

MR DEPUTY SPEAKER

Mersi Onorab. Mon ava dir ou en keksoz, mon pa en manm *Wavel 2025*. Ou kapab al rod mon non dan sa group. E mon telefonn. Rezolisyon ki mon'n pran pou 2023, letan mon la dan sa Sez, ouswa letan mon pou laba, mon telefonn pa ek mwan. So, mon pa vwar ki pe pase.

Be letan mon'n dan Chair, mon'n dir 3 mo. Dan ou *speech* ti annan "foutou", i ti fer dezyenm fwa. I annan en lot Manm ki ti'n dir. En lot Manm in dir "geez" e Onorab *Leader* Lopozisyon yer dan son ladres i ti servi mo "araze". So, sa 3 mo. I ti zeneral e mon pe dir bann larestan *speech* annou evit sa bann mo, akoz pou nou i kapab inaparsi, me i annan nou bann popilasyon ki tre sansib avek kalite mo ki nou servi.

Nou'n ganny en *Right of Reply* ki la devan mwan, me mon pa pou pran li la akoz mon bezwen al rod son provizyon konstitisyonnal ki fer provizyon ki donn en endividi ouswa en lenstitisyon e apre le 2 *Leaders* i sipoze ganny en kopi sa *Right*

of Reply ki'n anvoy dan zot *email*. So, verifye. Alors nou fer sir ki nou tou nou *onboard*, ki napa okenn kontestasyon avan nou *take the Right of Reply*.

Leader Lopozisyon?

HON SEBASTIEN PILLAY

Mersi Mr Speaker. Mon note sa ki ou'n dir e mon kapab dir mon apresye ou' n fer sa koman ter e mon krwar sa i en *ruling* ki ou pe donner. Eski i en *ruling* ki ou pe donner an relasyon ek sa bann mo? Akoz ...

MR DEPUTY SPEAKER

Non, mon pe donn en konsey koman en Koleg *MNA*.

HON SEBASTIEN PILLAY

Ok, mon krwar i en keksoz pertinan. Rezon akoz petet i annan serten mo ki'n ganny servi se akoz dan lepase nou'n deza *challenge* Speaker Mancienne ler Onorab William ti'n servi bann menm mo ki mon'n servi, ou a rapel tre byen. So, mon kontan ki ou pe re set keksoz dwat e mon krwar bann Manm i ava swiv sa legzanp. Mersi.

MR DEPUTY SPEAKER

Nou pou kontinyen aprezan avek bann entervenans ki ava donn zot repons lo mesaz Prezidan lo Leta Lanasyon. E

prosen Manm ki mon pou apele se Onorab Doyace Porice.

HON DOYACE PORICE

Mersi Mr Speaker. Mr Speaker, tou mon bann koleg *MNAs*, *staff* Lasanble Nasyonal e tou piblik a lekout, espesyalman zabitan Praslin, bonn apre midi.

Mr Speaker, mon pou komans mon lentervansyon koumsa. Mon pou remerci Bondye Papa pour sa kouraz, sipor ek lasante ki in donn mwan pou kapab la ozordi pou prezant mon repons lo Leta Lanasyon. Parey nou tou nou konnen ki avek li tou i posibil.

Apard ki mon Bondye Papa, mon pou osi remerci Prezidan Wavel Ramkalawan pou aksepte mwan koman en kandida dan distrik Baie Ste Anne e vin en Manm Proporsyonnel dan Lasanble Nasyonal Sesel. San li ek sa 12,089 zabitan Baie Ste Anne, Praslin ki'n vin vot pou mwan, mon pa ti pou la.

Menm si mwan avek mon Prezidan nou ti annan en diferans dan lepase akoz in annan serten koze ki mon'n fer anver li, e pour sa ozordi mon pou demann li en gran leskiz piblikman. Pou tou mal ki mon'n fer anver li dan lepase.

Dan fon mon leker mon dir sa ozordi Mr Speaker, pou mwan montre lepep Seselwa ki mannyer Prezidan Ramkalawan son leker i ouver pour tou son zanfan.

(APPLAUSE)

HON DOYACE PORICE

Pare pou travay ek nenport ki san gard rankin ek personn. En vre zanfan Bondye ki'n ganny swazir pou diriz nou pei Sesel.

Mr Speaker, Prezidan Wavel Ramkalawan son diskour lo Leta Lanasyon ti vreman enpresyonan. In donn Lepep Seselwa sa vre Leta nou Nasyon. I fer premye Prezidan elekte ki'n kapab koz fran avek son pep e pa'n kasyet naryen. E in aksepte tou defi ki'n annan dan nou pei Sesel.

In ouver lizye ek zorey tou Seselwa, ki petet ti annan doutans, lafreyer, trakase, sirtou ler zot tann bann mansonz par serten bann politisyen nanryenfer. Si vreman nou'n ekout li byen in donn bokou leklersisman dan tou son splander. In menm rod solisyon pou anmenn sa lavans e sa laklerte pou nou pep e nou pei Sesel.

Pandan sa 2an 5 mwan, Prezidan ek son lekip in

debrouye. Zot in fer zot mye pou fer sa pei kontinyen bouze. Pou elev lavi Seselwa dan tou son laspe, devlopman en pei an zeneral.

Mr Speaker, ler nou get nivo lanplwa, lenfrastriktir lo nivo nasyonal, Servis Sosyal. Bann devlopman dan bann distrik, diferan *Board* pou anmenn bann bon desizyon, ledikasyon e byennet nou zanfan; tir koripsyon dan tou son splander, anmenn la demokradi anver nou pep.

Nenport ki kouler ki ou ete. Nwanr, ver, rouz, oranz. Nou tou nou benefisyen ek en travay, en lapey, en lakaz, en bout later ou menm en biznes dan nenport ki domenn lavi. Apre zot dir i pa pe fer naryen.

Prezidan Ramkalawan in osi anmenn en transformasyon dan sa pei e anmenn en sanzman radikal pou ede fer keksoz pli byen e transparan. Se sa fason ki i travay, pou fer ki nou pti Sesel i kontinyen vin sa bizou dan Losean Endyen, Lafrik e menm dan Lerop. E kot nou met dan lemonn antye?

Ozordi mon anvi fer Lepep Seselwa mazine ki 2an nou'n dan *COVID*, pei ti fay. Lekonomi ti'n bese. Me Prezidan ek son lekip pa'n dekouraze, zot pa'n les tonbe sa pep ek sa pei. Zot in fer sir ki

travay i bezwen kontinyen. Lapousyèr lo bann *file* ki ti pe dormi dan tirwar ouswa anba lili *State House*, dan bann Minister. E rod solisyon pou fer travay pou benefis nou pep.

E pa bliye osi, nou bann MNAs LDS, dan nou distrik osi ti parey. Kot ti annan menm sa bann lapousyèr ki'n amenn bokou lanmertim anver nou zabitan. Bann problem zabitan, proze lo nivo nasyonal, rezyonal e osi dan distrik. Proze ki'n komanse ouswa pa'n fer ditou.

Bann ki larzan in donner pou fer, pa konnen kot in ale. Problem zabitan ki'n ganny ekoute e osi pa'n kontinyen ganny ekoute. Tousala nou'n vwar, nou'n trouve, asiste kot nou kapab. Pou sanz sa pei Mr Speaker, pa ti fasil me nou pe kontinyen pou sey fer Seselwa apresye ki sa Gouvernman LDS pe fer. Non pa asize ekout mansonz ki bann Dirizan Lopoziyon pe fer zot krwar lizour pou aswar.

Akoz i paret ki SPPF, US in fek sot lo later Sesel le 24 Oktob, 2020. Wi, Mr Speaker, e zot pa'n konn naryen e naryen ki'n pase lo sa later Sesel. Dekrir tou keksoz pa bon. Minister Lasante pe deteryore. Napa dra, bann vye lili; goute ek repa lekol, ledikasyon pa bon.

Me Mr Speaker, mon demann mon lekor. Lekel sa bann fouter dezord ki'n la lo later Sesel, ki'n kree sa dezord total ki nou'n vin zwenn?

Pa bliye, koripsyon pa ti manke, voler dan tou son splander dan sa lopital pa ti manke. Menm ek pasyan ki al aletranze pou al trete. Zot ti fer trik, servi pasyan pou anmenn byen personnel. Ziska laport loto, pasyan pe trenbale. Trik dan lenportasyon latizann, pou anmenn laptop pou vann. Tousala bann fouterdezord in fer! Tro bokou pou dir.

Ozordi sa parti minorite, deside pou vin donn nou ledikasyon ki mannyer pou diriz sa pei konmsi nou Gouvernman i bann fou bet. Ki zot problem?

Mr Speaker, Prezidan ek son lekip in les tousala deryer e met nou pei ek son zanzan devan pou kapab sanz fason fer. Seselwa, Seselwaz silvouple ouver zot lizye, ouver zot zorey e fer travay zot lespri ki Bondye in donn zot. Get byen, ekout byen e analiz byen ki pe pase Sesel.

Pa les lezot gete, tande e fer travay lespri pou zot. Nou Gouvernman LDS in fer bokou. I pe fer bokou e i annan bokou pou fer ankor.

Me pti pa, pti pa nou pou arive *achieve* bokou ki nou pep pe demande. Avek lagras Bondye tou pou posib.

La zis get lo Zil Pros e Praslin ek La Digue, ki mannyer pe vin sa bizou ki mon'n toultan dir dan bann lentervansyon ki mon'n fer. Wi, mon rev e rev pep Pralinwa ek Digwaz pe vin vre.

Ozordi en bon pe sa bann plan ki ti zis *black and white* lo papye, menm si ti napa ase finans, Gouvernman LDS in fer zot mye. Nouvo terminal Ero Baie Ste Anne, koltar lo semen, nouvo *roundabout*, lenfrastriktir lo Ile Eve, *bus stop*, *fitness trail* ki'n deza fini; nouvo bazar ek lenfrastriktir pou peser ek zofisye SFA; Kordgard ki byento pe al fini. Nouvo *ice plant*, renovasyon bazar, *gears store* Grand Anse ki osi in fini. Tousala bann proze dormi e zis pyedibwa ki ti pe benefisye.

Byento nou bann zenn anba laz, pou benefisye avek *youth offender facilities* lo Praslin pou zot refer zot lavi, pou retour dan lasosyete, pou anmenn zot kontribisyon e aret fer keksoz ki mal. Ki pe afekte zot lavi.

Pou osi annan en nouvo fasilite spor parey en *dojo* pou *judoka*, laboks ek *karate* kot

ansyen *STC store* Grand Anse, Praslin. En *sport complex* ki pou ganny fer Baie Ste Anne. Proze touristik ek artizanal vizavi Erport Amitie. Kot lasose Grand Anse pe ganny fouye e pou annan en renovasyon par SFA. Tousala Mr Speaker pe al komanse sa lannen.

Mon avek mon koleg Onorab Wavel Woodcock nou vremen *happy* e nou annan tou rezon pou selebre ler nou vwar sa bann devlopman lo zil. Pa bliye nou zabitan osi zot byen kontan, akoz nou zil ti'n ganny abandonnen!

(APPLAUSE)

HON DOYACE PORICE

Si ozordi sa bann devlopman pe ganny fer, gras a nou Prezidan Wavel Ramkalawan ek son lekip ki'n tir lapousyer lo sa bann *file* proze swadizan ti la 20an pase e pa'n ganny servi. E mwan osi koman en Manm Proporsyonnel LDS, mon'n vin pouse pou anmenn sa laklerte lo nou zil. Nou'n osi ganny bokou volonter ek biznesmenn ki'n vin devan pou siport sa Gouvernman, e pour sa nou dir zot en gro mersi de la par nou Gouvernman.

Mr Speaker, kot nou met La Digue? Lagrandisman lasose, nouvo lopital. Renovasyon Kordgard, drenaz e

plizyer ankor, byento pe fini. Tousala zabitan Digwaz pou benefisye. Me Seselwa zis pou fer zot konnen ki sa bann proze La Digue la, pa'n zanmen ganny anmennen par *MNA* Elekte e parti *US*. O kontrer zot anmenn petisyon pou anpes fer serten proze.

Mr Speaker, i montre nou ki sa Gouvernman pe travay e pa pe les tonbe son pep. Nou Praslin nou pa ekoute bann mansonz ki pe ganny dir akoz nou a ker pou nou zil. Nou met politik de kote ler nou pe travay, menm si ti en bastyon *SPPF*, *US*.

Akoz in annan bokou la deor sirtou atraver bann ki ankor pe lafen pouvwar. Zalouzri i prodwi laenn kot zot pa ti espekte ki Gouvernman *LDS* pou rod solisyon pou avans devan e rezourd bann defi ki ti annan lo nou pti Sesel.

Zis parey sa mansonz yer ki ti ganny dir ki pe annan divizyon ant Grand Anse ek Baie Ste Anne zis akoz sa non Ero ki'n apel terminal Baie Ste Anne.

Mon pe zis fer konnen lepep Seselwa ankor enn fwa ki sa non ti vin lo en nivo konpetisyon ouver e nenport ki Seselwa ki ti kapab partisipe e en komite ki ti swazir sa non. En madanm ki reste Mahe ti

partisipe e i ti ganny sa pri pour sa non. Fodre pa nou fer dimoun konfize e pa bliye ki bato Ero ek son papa in fer bokou pou Praslin e Pralinwaz e in anmenn plizyer nou. I paret ki nou oubliy lepase.

Mr Speaker, lennmi pe koz lipokrizi. Les mwan dir zot enn de laliny ki koz lipokrizi. Ler sa bann menm gran koneser *US* ki pa'n desarz zot responsabilite anver Minister Lasante dan lepase, apre ozordi zot dir i pe deteryore, sa ki apel lipokrizi! Sa bann menm gran koneser *US* ki pe ede pou detri sa pei zis akoz zot pa aksepte perdi e lafen pouvwar. Sa ki apel lipokrizi!

Mr Speaker, sa bann menm gran koneser *US* ki pe koz goute ek repa pou zanzan lekol, kan zot pa'n kapab kontinyen donner, sa ki apel lipokrizi!

(APPLAUSE)

HON DOYACE PORICE

Ler zot in les bann lenfrastruktir sport deteryore Mahe, Praslin e Zil Pros e tou lezot ankor. Sa ki apel lipokrizi.

Mr Speaker, ler Onorab Elekte ek son parti *US* i dir ki sa bann proze lo Praslin ti lo program ansyen Prezidan defen Albert Rene, akoz pa'n

ganny fer pandan sa 43an, ouswa pandan sa 22an pase ki i ti pas baton. Sa ki apel lipokrizi!

Ler Onorab Elekte i dir ki li ki Manm Elekte pou Baie Ste Anne, wi. Be ki in fer pou Baie Ste Anne pandan sa 4an ki i ti la dan sa sizyenm Lasanble, kot i konn tre byen ki son Gouvernman ti *fail* li. Sa ki apel lipokrizi!

Ler Dirizan parti *US* ti dir *cancel* tou proze kapital, la ozordi zot dir ti dan zot program. Sa ki apel lipokrizi! Se sa ki ozordi 43.5 pousan zabitan Baie Ste Anne in siport mwan avek parti *LDS*. Zabitan ti'n fini vwar ki si pa sanze zot pou reste dan fernwar.

Konsernan Komite Kato Nwar, ki Manm Elekte i dir i pa lo la. Be wi, se zis bann biznessmenn ek endividi lo Praslin ki lo la. Tou Manm *MNA* pa lo sa Komite. Manm Elekte pou Baie Ste Anne pe konplent i mank biro lenformasyon pou touris lo nouvo terminal, me zot, i pa ti dan *meeting* piblik ler Prezidan ti devwal plan akoz i pa ti fer sa propozisyon?

Mwan Doyace Porice koni *comme* Joyce Stravens, ki zabitan Praslin i konn mwan, menm si mon en Manm Lasanble Proporsyonnel pou *LDS* lo Praslin, ki ou elekte, ki

ou proporsyonnel, mon en Manm Lasanble dan sa pei Sesel!

(APPLAUSE)

HON DOYACE PORICE

Se mwan sa fanm determinen ki'n anmenn sa sipor Lo Praslin. Zabitan Baie Ste Anne i kapab zize pou zot menm, enn zot zanfan in vin delivre zot e la mon pou demann lezot ki pa'n vot pou mwan e *LDS* pou mazin lo la 2025. Alors mon pou demann bann fanm Seselwa ki ankor dan sa kannot nanm, pou fer parey mwan, pou sote, osi tir bando lo zot lizey.

Aret krwar dan bann lezot fanm *US* ki'n deza pran e ankor pe pran fortin dan *taxpayers money* e pe fer zot krwar dan anmenn rezolisyon.

Mr Speaker, kote sa bann fanm rezolisyon ti ete avan 2020? Ki zot ti pe fer sa letan, zis zot ti pe kalkile ki mannyer pou fer koripsyon dan sa pei? E la ozordi zot pe zis anmenn divizyon. Fanm Seselwa annou aret krwar dan sa bann rezolisyon demosyon ki zis pe fer dezord dan nou pei Sesel.

Pandan sa Karenm silvouple, bann madanm menm si nou pa dan menm larelizyon, menm parti politik ek mwan. Annou mazin byen ki Sesel i

pour nou tou. Se nou ki viv dan sa pei. Met dezord, pa pou anmenn nou okenn par e nou Bondye pa kontan.

Mon pou koz lo sa zil ki apel Ile Eve, ki swadizan in konble pou bann biznesmenn lo Praslin pou benefisye. Ki nou vwar, zis dezord. Ti napa ni en plan, sakenn ti pe fer pou zot. In annan in ganny later pou R50 e vann pou bilyon. Preski twa kar dimoun ki ti lo lalis pa ti ganny later. Onorab Elekte Baie Ste Anne i konn tre byen sa, bann dezord total ki ti annan.

Prezidan Wavel Ramkalawan in dir Sesel i pour tou son zanf. Annou vin sa vre zanf Seselwa. Pa les bann politik bonmarse fer nou krwar ki nou pa apartyen pou Sesel. Wi Mr Speaker, i ankor annan defi dan nou pei pou Gouvernman adrese. Me pti pa, pti pa Prezidan ek son *Cabinet* pou kontinyen rod solisyon pou adres sa bann defi.

Si Gouvernman *LDS* in kapab fer bokou pandan sa 2an 5 mwan, aköz ki i pa kapab fer dan sa 2an 6 mwan ki reste e menm pou plis lannen ankor. La deor, aletranze bokou pei pe ouver laport ek Sesel. Partou kot nou Prezidan in ale in debourye menm. I pa'n al vakans ouswa zet salte pou

lezot ki vini pou anmase. Zis parey bann travayer *LWMA* Praslin pe anmas salte zot kanmarad, aköz zot krwar dan lapropte lo nou zil menm si i pa form par zot travay, sa bann zenn madanm ek msye pe vremen debourye. Pou sa mon pou dir zot mersi.

Mon pou osi remersi mon *clerk*, Ina Esparon. Ladministrater Distrik, Denis Antat avek son *staff*. Tou bann *staff* dan lezot letablisman Gouvernman lo Praslin e prive e tou zabitan Baie Ste Anne ki touzour la pou siport mwan.

In osi annan plizyer biznesmenn ki'n anmenn zot sipor pou en pti larzan ouswa pou zis pou naryen. Mr Luc Grandcourt, son madanm, Mr William Rose, Mr Shelton Jolicoeur, Mr France Rose ek son garson Brian, Mr Barry Soufle, Mr Jean-Claude Dubignon. Ralf ek Monica Prea, lafanmir Verlaque. Tou lezot ankor, nonmen. Nou dir zot en gro mersi pou sipor anver Gouvernman *LDS*.

Pou konklir Mr Speaker, mon ti a kontan si Onorab *Leader* Lopozisyon ki avan i dir nou Prezidan pou al get li dan laglas, mon krwar ki li ki bezwen al get li dan laglas pou donn legzanp son zanf.

(APPLAUSE)

HON DOYACE PORICE

Mon pou sipliy ek Lepep Seselwa pou annan pasyans ek nou Gouvernman. Les zot kontinyen rod solisyon pou lezot defi ki pa ankor ganny adrese. Aprese, anmenn zot sipor koman en sel fanmir. Tir divizyon, aret ekout bann fo profet pou diviz nou, akoz nou tou nou form par sa zanfan Sesel.

Annou met lanmen ansanm, annou donn sipor Gouvernman *LDS* pou ki nou pti Sesel i a ariv pli devan. Pou ki Bondye i vers disan son garson lo nou Prezidan Wavel Ramkalawan, son *Cabinet of Minister*. Tou nou bann *MNAs*, tou zabitan Praslin ek La Digue, tou Seselwa e pa bliy nou pti pei Sesel ki Bondye i ed nou. Mersi.

(APPLAUSE)

MR DEPUTY SPEAKER

Mersi Onorab Porice. Prosen entervenans lo lalis i Manm Elekte pou distrik St Louis. Onorab Sathya Naidu.

HON SATHYA NAIDU

Mersi Mr Speaker. Mr Speaker, tou bann Manm Onorab, *staff*

Lasanble Nasyonal. Ser ek frer pep Seselwa bonn apre midi. En bon apre midi spesyal i al pou zabitan St Louis, en group zabitan ki'n toultan rezilyan.

Mr Speaker, devan mwan in debout en zom ki Parti Lopoziyon pou plizyer lannen ti'n dir i pa pou vwar baro *State House*. Me in fini ariv *State House*, baze lo lavolonte sa pep. I ti'n dedye 30an son lavi, i ti atas li avek bann prensip ki pa'n zanmen sanze. E sa prensip i enkli koz fran, onnet e senser avek son pep. Sa i 3 eleman ki ti dan son diskour.

Kot i pa'n kasyet larealite parey i ete. I ti'n dir keksoz parey i ete. Me selman pou bann ki dan Lopoziyon byensir zot pou dir nou Prezidan i dekonekte avek larealite. Me ankor enn fwa nou tou nou konnen ki kalite Lopoziyon nou annan dan sa pei. Pou 2an edmi mon'n vwar zot an aksyon, kot nou ti vwar en *Leader* Lopoziyon kit Komite *Platinum* ler pei ti bezwen li.

Zot ti'n *boycott* konpanyi vaksinasyon malgre ansyen Prezidan Faure ti'n vin devan pou apiy nou Prezidan. E ozordi si nou Prezidan in rekonnèt Prezidan Faure pou dir felisitasyon. Sesel i pour tou nou zanfan *me amis*. Pour tou son zanfan *mes amis*. E ler nou

ti'n dir re ouver frontyer pou kapab asire ki nou Sekter Tourism i rebran le 25 Mars 2021, ki zot ti fer? Zot ti *boycott*.

Mr Speaker, zot ti konn tre byen a sa letan lekonomi pa ti pe perform byen, i ti lo son zenou. Zot ti konn leta nou kof e zot ti konnen ki poursantaz nou popilasyon ti san lanplwa. Zot ti konnen poudir ki nou Sekter Tourizm i pa ti aktiv. Zot ti konnen poudir nou sistenm lasante i ti anba en presyon enorm, prenon kont ki en viris ki apel *COVID* ti pe ravaz lemonn an antye.

Zot ti konn tousala byen, byen kler me selman zot ti obzekte. E zot ti menm servi lanmor bann inosan pandan letan *COVID* koman zot seval batay.

Mr Speaker, se sa kalite Lopoziyon ki nou annan ozordi. Baze lo bann diskour ki mon'n tann yer e menm ozordi, i kler ki zot pa'n sanz zot fason fer, malgre zot pe sanz non zot parti ki mon pa pou mansyonnen.

Mr Speaker, Lasanble pe al ganny 30an sa i apepre menm laz avek mwan. E mon swe se ki sa lenstitisyon i kapab vin en sours lespirasyon pou en zenerasyon. Les mwan pran sa moman pou rekonnnet zefor ki tou bann *staff* ki'n enplike dan

sa travay pou kapab aranz nou *Chamber*, pou fer li vin pli modern.

Kestyon ki mon oule poze. Eski lafason asize savedir ki nou pou sanz nou fason fer? Eski nou pou sey etabli pli meyer standar, ouswa nou pou desann dan en rigol pou fer politik?

Mr Speaker, mwan koman en Manm Onorab mon annan iminite, me selman i nou devwar koman tou bann Onorab ki la anndan pou itiliz sa drwa dan en fason ki responsab, Mr Speaker. Mon pa pou desann dan en rigol, me selman i enportan pou pa *distort* lenformasyon avek lobzektif pou konfiz nou pep.

Les mwan ilistre en legzanp, lo lafason ki Dirizan Lopoziyon ti pe sey senm dout dan lespri nou bann zenn. *The bar examination is R5 thousand and not a R150 thousand*. Sa i zis en legzanp, so nou tou nou konnen ki mannyer son diskour an antye ti pou kapab ete. Mon pa bezwen al depouy sa akoz pa vo lapenn fer en keksoz koumsa.

Me selman, ouswa plito *comme* dir David Louise koz laverite silvouple! E ler mon ekout zot, mon demann mon lekor. Eski zot tann sa ki zot pe dir? Eski nou pou kapab

vreman met konfyans dan zot parol?

Mr Speaker, Dokter Patrick Herminie dan dernyen kongre, non selman i ti eksite, me selman i ti annan serten parol ki li i ti'n dir dan sa kongre. I ti'n dir ki "nou bezwen viv dan en sosyete kot napa diskriminasyon baze lo kouler endividi, e son larelizyon ouswa son loryantasyon seksyel".

Ler ti'n ganny anonse ki Sudarsan Sathyanarayanan Naidu, pe debout koman kandida St Louis, ki nou ti vwar? Zot ti fer en konpany sal kot mwan ek mon fanmir baze lo kouler mon lapo e mon larelizyon.

Mr Speaker, les mwan pran legzanp tre resan, ler mon koleg Onorab Naddy Zialor ti'n delivre son diskour lo Ladres Bidze par Minis Hassan. Ki nou ti vwar? Ti annan en group aktivis US ki ti mon lo rezo sosyal e zot in denigre mon frer. Me apre ki ti'n arive? Mon pa pou kapab itiliz bann mo ki ti'n ganny dir, me ti vreman degoutan.

Ler sa size ti vin devan dan sa Lasanble, *Leader* Zafer Gouvernman ti'n denons sa e ti'n demande ki annan zero tolerans. Lo lot kote *Leader* Lopozisyon ti'n perform *about turn* e i ti sanz topik e i ti fer

topik vin lo li e i ti pe dir ki mannyer li i ti pe ganny ensilte lo rezyon sosyal. San dir okenn keksoz lo sa ki ti'n arive ver Onorab Naddy Zialor. Eski se sa kalite *Leader* Lopozisyon ki sa pei i bezwen?

Mr Speaker, sa swadizan dirizan i annan admirasyon enorm pou Dokter Patrick Herminie. Me i enportan ki zot met zot parol an aplikasyon ler i konsern *droit de l'expression*. E ki mannyer eski nou devret adres lafason ki dimoun i kondwir zot lo rezyon sosyal par lenstans. Rezo sosyal i en sosyete dan li menm, e wi ozordi in vin en problenm e in en problenm pou plizyer lannen ki pa'n ganny adrese me pa tro tar pou nou kapab fer le lesansyel.

Bokou dimoun i *deactivate zot account* akoz zot in ganny ase prenon kont ki sa parti lemonn, dan sa lemonn vertyel in vreman vin toksik e negativ. E Mr Speaker parfwa lo *WhatsApp*, konbyen fwa nou'n vwar bann zimaz obsenn ouswa fo lenformasyon ki ganny partaze, kot bann dimoun pa ni edik zot lekor, e zot pa ni lir konteni zot zis *forward*.

Me tousala se bann keksoz ki nou bezwen adrese. *Droit de l'expression* i devret ganny servi dan en fason ki

responsab. Kot si ou annan en lopinyon fer pase ou lopinyon, san ensilte prosen zis akoz i pa siport ou parti politik. Ouswa zis akoz son perspektiv i totalman diferan avek pou ou. Kot ou drwa i fini, drwa en lot i komanse.

Alors mon pou donn 100poursan sipor vizavi lenplimantasyon efektiv *Cyber Crime and other Relating Crimes Act, 2021*. Akoz i enportan pou nou kapab etabli pli meyer standar, pou kapab asire ki nou pep i aprann respekte kanmarad, malgre diverzans dan lopinyon.

Ler mon pe koz lo standar i anmenn mwan lo size nou *civil service*. Mr Speaker, i pa pou fer premye fwa ki mon pe adres sa size isi dan sa Lasanble, mon totalman konpran fristrasyon mon Prezidan e mon santiman i pa diferan.

Dan zot 34enm kongre ti annan en madanm ki ti dir, nou pa anmenn politik lo lans. politik dan bis, politik dan travay. Politik dan travay Mr Speaker, sa ti en rezolisyon ki bann Manm sa parti ti'n fer pase enkli Onorab Gill ki ti dan sa Konvansyon.

Mr Speaker, ler Prezidan i koz lo bann endividi ki pe *boycott* nou Gouvernman, akoz *LDS* in ganny eleksyon e zot

parti ti'n perdi, eski nou pa pe vwar levidans kot en group politisyen pe dir anmenn politik dan travay, dan plas travay? Ki kalite mesaz eski zot a pe anvoye?

I kler ki zot annan en azanda pou met retar dan travay Gouvernman. Alors ler i pou annan serten ki pou ganny pouse, pa vin dir viktimizasyon. Akoz tou bann dimoun, sa 55 poursan dan ka St Louis 60poursan dimoun ki'n mete i oule vwar keksoz i bouze e zot oule vwar serten ki pa pe performen, i ale.

Mr Speaker, i annan pa mal ka ki mon pe *deal* avek lo nivo distrik e lo nivo mon bann zabitan. Plizyer sa bann ka i date pou sepa konbyen lannen e i pa'n ganny rezourd senpleman, akoz i annan en mankman lavolonte politik. Kot mon bann dimoun ti'n ganny viktimize. Me selman in annan progre dan serten ka e mon pou tous lo la pli tar.

Mr Speaker, mon pe sey mon mye pou kapab adres sa bann problem a kote mon bann Minis, e bann dimoun ki travay par anba zot. Bann dimoun ki travay par anba zot, bann *civil servants* ki mon'n travay avek pandan 2an edmi. Mon konn bann ki vreman serye, bann ki donn

100poursan dan sa travay ki zot fer. E parfwa ler mon vwar zot dan distrik, mon ganny en pe lazwa dan en serten sans pou dir *ok*, travay pou bouze. E vre i bouze.

Me selman lo lot kote i annan en bann ki trenn lipye e i annan akt sabotaz. I annan akt sabotaz e mon pou zis sit en legzanp kot ti annan en *unit 3* lasanm Harrison, zot ti'n fini pas en *file* pou dir en dimoun ki'n kontribye pandan 2018 i annan 56 mil ki devret ganny lakaz.

Mon dir tyonbo en kou, ma get sa *file*. Be ler mon gete i annan en madanm ki'n kontribye 200mil e son laplikasyon ti date lannen 2000. Be lekel ki bezwen ganny konsidere? Sa i bann akt sabotaz e pa krwar mon pa konn lezot akt ki zot, zot a pe fer, me *just not that I am one step ahead of you*.

E an relasyon avek lapros ki bann *civil servant* i dwatet annan, mon swe se ki zot konpran ki zot pa la pou deservi en parti politik, me plito nou pei - nou Nasyon e i bezwen zot pou nou kapab bouz de lavan. Silvouple mon pe lans en lapel avek zot, silvouple deservi nou pep byen.

E Mr Speaker, ler mon pe koz lo ki mannyer eski nou

kapab deservi nou pep pli byen, mon pou al lo size drog. E mon swe se ki nou pa repet menm fot ladministrasyon lepase a sa ki konsern program *methadone*.

Wi, in annan rikord lo lakantite lasezi e bann konviksyon e mon oule felisit tou bann Lotorite ki'n zwe zot rol. Me an menm tan i enportan pou mwan fer resorti poudir ki mon ti'n siport 10enm lamannman nou Konstitisyon. E mon ti vreman vokal. E apre nou ti'n vwar serten lorganizasyon, tel ki Komisyon Drwa Imen, *Ombudsman* avek *Bar Association* ki ti'n anmenn en ka Ankour.

Ozordi sa bann lenstitisyon in ganny *empowered* dan nou demokrasi ki nou pe viv ladan pou anmenn en ka Ankour. Mon rapel *Public Order Act*, ti napa sa bann lenstitisyon ki ti'n anmennen. Ti *SNP* avek Msye Viral Dhanjee ti ti'n anmenn en ka ankour lo *Public Order Act* ki pa ti Konstitisyonnel.

Sanmenm Lalwa ki Onorab Pillay dan 5enm Lasanble ti'n lev son lanmen pou vote.

Me lo sa size mon a les Lakour determinen. Me selman mon fermeman krwar nou bezwen re entansifye nou zefor pou netway bann kan drog.

Bann pti pwason ki pe bouz lo bann *scooter* ek bann *i10 fully tinted*. Se zot ki fer sa gro pwason vin gro. Alors i enportan pou nou kapab anpes bann tranzaksyon ki pe arive. Par egzanp kot en blok *flat* kot Harrison, kot Stevenson Delhomme.

E ladan menm mon'n tann Onorab Cosgrow pe dir anler Stevenson Delhomme. Be sa i tonm dan Bel Air, i pa ni konnen ki bor pe ale.

Mr Speaker, selman vis a vis Stevenson Delhomme, wi, aksyon i bezwen ganny pran. E i annan 2 lokasyon Belonie e menm Waterloo.

Mr Speaker, mon pa per pou fer resorti bann landrwa kot drog pe ganny vann malgre ki mon'n ganny menase. Me selman i enportan ki mon fer resorti sa pwen, aköz se zabitan ki vin devan kot mwan zot demande ki aksyon i ganny pran.

Ziska prezan in annan kominikasyon ki'n ganny fer avek bann Departman relevan. E mon swe se ki nou pou kapab adres sa bann problem. Mon pasyan mwan, dimoun osi i pasyan me selman i enportan ki nou kapab fer le lesansyel dan en dele letan ki rezonnab.

Alors i enportan ki nou regard sa dan en fason ki

vreman serye. E si *LOTO* i oule anmenn *PNQ*, anmenn son *PNQ!* En ta dimoun ti vreman dakor ler zot ti'n vwar zefor Kan Gard lannen pase. Malgre wi, en bal karoutsou ti ganny tire parmi bann manrmay. Me zisteman nou bezwen fer sir ki sa pwazon pa tonm dan lanmen bann zanfan! Nou bezwen anpes sa pwazon tonm dan lanmen en lot zenerasyon.

Mr Speaker, lo size program *Methadone* bann *taxpayers* zot, zot fristre. Aköz tou-le-z-an *on average* nou depans apepre R65milyon. E nou pa pe vwar *the end results*. Ozordi nou annan *crack*, kokain. Eski *methadone* i kapab ganny itilize? Mon krwar pa. Bann diferan adikt pe vin devan dan nou sosyete la.

Alors mon konpran pou dir ki in annan *COVID* pandan en peryod 2an, e i pa'n vreman kapab permet Gouvernman pou antre dan en program reabilitasyon, me selman i annan pa mal travay pou nou fer. E nou Gouvernman in rekonnet sa e i annan larzan atraver en don ki'n ganny met dekote pou en fasilite reabilitasyonnel - reabilitasyon.

Me dan lenterim i enportan ki Minister pou Lasante i vin devan e donn nou en leksplikasyon lo ki direksyon

zot pe al bouze. Mon konnen ki sa i en size *which is not straight forward* me selman nou bezwen komans kek par.

Mon oule pran sa loportinite pou felisit Mr Faddy Banane, lo la fason ki i ti'n delivre sa dokimanter. I ti'n fer nou Nasyon an antye koz lo sa size, en size kot nou pe vwar li preski toulezour partou kote nou ale dan nou bann kominote.

E i enportan ki nou sezi sa mesaz ki sa dokimanter pe fer pase. E mon santi ki dan bann lekol segonder avek pos-segonder zot fer pase sa dokimanter, pou zot koman bann zelev konpran ki savedir - non selman drog - me lenplikasyon ki i annan dan lavi en zenn. Dan lavi en paran, dan lavi en fanmir, dan lavi en sosyete e travay ki en Gouvernman i osi bezwen fer pou kapab adres sa problemn.

Me selman mon'n ganny lespwar ler mon'n ekout son garson kot i ti'n dir "mon pa pe al pran sa semen". E se sa mesaz ki nou bezwen anvoy avek nou bann zanfan. I bezwen annan en kantite zefor ki pe ganny mete pou edik nou zanfan.

Dan mon 2 dernyen diskour mon'n tous la sa topik, alors mon pa pou al plis lo la,

me selman i enportan lotorite konsernen i ekoute.

Ler nou pe koz lo zanfan i fer mwan rapel bann *shows* ki ti'n ganny fer. Mr Speaker, avan ki sa santer i vin kriy sekirite, sekirite, ler dezyenm fiy in tyonbo zot seve zot in tonm ater. Mwan mon krwar ki avan ki en *show* i ganny fer i annan bann prosedir an plas. Menm si in ganny fer o plenner, si fodre met en baraz fer lenvestisman nesese akoz zot pe ganny rannman finansyerman.

E i enportan ki ou montre ou *ID Card*, ou 18an ou a ganny akse. Ler i konsern sa *show* ki ti ganny fer *music stadium* la, sa *Ruger* se pa kwa ti'n vini, mon krwar lo kote Lazans Kreativ se zot ki *lease*. Fer sir ki ler i annan en *show* malgre ki zot met en *poster* pou 18an, selman ou vwar bann marmay anba laz i ganny *deal* avek. *This is where Licensing comes in*.

Nou osi nou annan en responsabilite vizavi sa. Nou konnen bann paran i annan en bon pe zot ki pe *fail* zot zanfan, ouswa i annan zanfan ki a pe *fail* paran. Malerezman se sa sosyete ki nou, nou'n erite e nou bezwen adrese.

Lo size *Licensing*, mon oule fer resorti ki mon'n ganny en konversasyon avek 3 marsan, ki ti pe vann lalkol

avek bann marmay anba laz e menm sigaret. Mon'n dir zot arete e si zot pa arete mon pou fer sir ki en let i ganny anvoye kot *Licensing*.

Mon pa oule sa zafer lanmann, mon oule ki zot perdi zot *license*. E i pou anvoy en mesaz avek bann lezot marsan pou konport zot. Si nou'n kapab fer sir ki tou bann marsan ozordi i annan *cash register*, mon krwar nou kapab fer lesansyel lo sa kote.

Alor Mr Ronny Antat, lo kote *licensing* ou annan en pe travay pou fer avek bann zofisye relevan. E an menm tan menm zafer i aplik pou bann *Night Clubs* ozordi, bon pe zanfana laba. Bann zanfana pa devret pe ganny ekspoze avek bann eleman negativ dan bann landrwa parey. E lesansyel i bezwen ganny fer lo sa kote osi.

Mr Speaker, vi ki mon'n koz lo bann laboutik dan mon distrik, mon ava bouz dan mon distrik. Ou konnen Mr Speaker, si mon la ozordi se gras a zabitan St Louis, si pa ti pou zot mon pa ti pou la. Me selman sa ki enteresan, Prezidan i enn mon zabitan e i form parti sa 1281 ki'n vot pou mwan.

E mon pou atas mwan avek prensip, mon pou atas mwan avek sa filozofi ki apel "Sesel pour tou son zanfana" ki

mon fermeman krwar ladan. E mon fermeman krwar ki nou bezwen viv dan en sosyete ki baze lo merit.

I annan serten enn ou de ki ekspekte faver personnel i ganny rann atraver servis Gouvernman. Sa i pa byen. I pa byen, e kot i pa byen mon pou dir ou pa byen e lo ki baz. Espesyalman ler ou annan mwayen finansyel ou kapab ed ou lekor.

Ouswa ou devret kapab pran ou responsabilite dan plas depan lo Gouvernman, zis akoz ou'n *tick* anler pa savedir i devret ganny en lakaz. Ou bezwen kontribye pou ou ganny en lakaz, wi, nou ava pran ka avek ou sityasyon sosyal. Me si ou pa pe pran ou responsabilite kot ou'n *tick* i pa en kriter ki mwan mon servi.

Mr Speaker, serten pou dir zot pa pou vot pou mwan. Be sa i zot swa, mon pa pou fors zot pou vot pou mwan parey *SPPF* i fer avek bann dimoun aze dan bann eleksyon avan, Mr Speaker sa i zot swa. E mon konnen ki i annan en group zot ki pa ti vot pou mwan, si mon met mon kandidatur zot pou siport mwan.

E i annan en group zot ki ti vot pou mwan ki pou vot ou mwan ankor. Akoz koumsa ki en eleksyon i marse. E mwan ler

mon pe deservi mon responsabilite vizavi mon bann zabitan mon pa mazin vot mwan. Se sa bann dimoun ki dir “mon pa pou vot pou ou” ki fer mwan mazin lo la.

Me selman mon konsyan e an menm tan *as the quote given by Steve Jobs goes* “si ou oule vin en dirizan, pa vann *ice cream*” an dot mo mon pa pou kapab satisfere lekspektasyon tou dimoun dan sa travay ki ou ladan.

Me selman ler ou annan, menm bann aktivis *US* zot dir tou bann keksoz ki zot pe sey fer dan distrik St Louis, mon konn tou, *good luck, eh!* Me selman zot pa pou ariv okenn par, akoz mon pa regarde si ou’n vot pou mwan ou pa’n vot pou mwan. Mwan mon la pou travay pou tou dimoun. Se sa lespri Sesel pour tou son zanfan.

Mr Speaker, mon osi fermeman krwar ki ou pa vin devan laport dimoun lavey eleksyon. Mon’n reste konekte avek mon bann zabitan, mon’n kouver 96poursan bann lakaz lo baz teren pandan sa dernyen 2an. Malgre nou ti’n annan *COVID*.

Mwan mon oule remersye mon bann zabitan pou sa lakey ki zot in donn mwan, e sa sipor enkrwayab ki mon gannyen.

Toulezour mon ganny mesaz sorti kot zot, zot ankouraz mwan dan sa travay ki mon pe fer.

E i annan zour mon dekouraze ler keksoz pa mars byen, selman ler mon ganny mesaz sorti kot zot i soulaz mwan en kantite. E pou sa mon dir mersi.

Mr Speaker, mon pou bouz lo size lakaz. *Housing estates* nou tou nou konnen dan pei an antye i pa’n ganny byen mentenir e dan ka St Louis nou annan 2, *ex-Geers*, Dan Koko, anefe 3 Harrison. Dan Koko R850mil in ganny enzekte, travay pe ganny fer. *Harrison* R550mil, *ex-Geers* i en pe pli konplike me selman travay i bezwen komanse, mon’n pasyante lo sa size.

Dan ka Dan Koko depi 2017, sa letan Mrs Valabhji ti’n donn bann dimoun en let dan en *meeting ICCS* e ziska prezan pa’n gannyen. Me selman apre zefor ki lotorite distrik in mete, dimoun Dan Koko pou ganny zot lavant tre byento.

Mr Speaker, bann proze lakaz i reste lo mon azanda. Sa lannen nou pou ganny 6 *unit* pandan mwan Me, 2 lasanm e i annan posibilite kot nou pe analize si nou kapab konstrir 20 *unit* lo laplenn basen Waterloo.

Wi, sa laplenn i annan valer santimantal pou bann ki ti'n itiliz li a en serten moman dan zot lavi. E ler mon ti'n erit sa laplenn, mon ti'n sey vin devan avek *NSC* demann zot led pa'n gannyen. Mon'n bezwen depans atraver mon prop mwayen an 2 repriz pou kapab fer lesansyel. A en repriz ti annan en garson Mr Roland Young ki ti donn en koudmen, me apre sa laplenn in retourn dan menm leta ki ladan.

E prenon kont ki nou annan mankman later dan distrik St Louis, e kot deza i ti'n sipoze annan en 24 ki Gouvernman presedan pa'n kapab fer, prenon kont ki i annan dimoun ki ankor lo sa later ki pe viv. Kote eski nou pou pran sa bann dimoun? Apepre en 20 dimoun ki bor nou pou met zot?

Alor nou bezwen regarde ki bor nou pou kapab fer en devlopman, prenon kont mon annan 140 fanmir lo lalis lakaz. E dan mwan Zilyet 2021 ansanm avek Mrs Denise Clarisse, ki ti mon *DA* avan Ms Hanna Quatre avek Mr Mervin Natir ki ti mon *clerk* nou ti fer *door-to-door*. Nou'n demann dimoun kwa ki zot panse. Dimoun ti'n dir, si zabitan St Louis ki pou ganny lakaz mon napa problem. Me ou konnen

kwa i paret i annan 3 mousketer, St Louis Basen ki oule fer en petisyon.

Zot le fer en petisyon sa 3 mousketer. En mesaz ki mon oule anvoy avek zot, si dan en konteks ekonomik sa proze i vyab, sa proze pou ganny fer e sa petisyon i pou pas parey petisyon Onorab Rocky Uranie La Digue.

Mr Speaker, i annan osi travay ki pe ganny fer kot Philomel Street, kot nou pe sey regard dan lesanz later avek bann propriyeter prive pou nou kapab fer plis lakaz. Selman ler mon dan en dilenm parey, mon bezwen kapab itiliz kot i annan le mwayen. Preski toulezour ler mon zwenn dimoun, laplipar ditan bann ka se lakaz. So, mon bezwen kapab fer le lesansyel.

Mr speaker an menm tan, mon konsyan pou dir wi en laplenn pe ganny pran. Me selman kot Ladministrasyon Distrik, sa laplenn ki la ki'n tonm an rin naryen pa'n vremen ganny fer.

Nou pe al investir apepre R1.7 milyon. Sa laplenn pou ganny re sirfas, zerb pou ganny mete e nou pou fer en sistenm drenaz apre nou pou met en *changing facility* avek en twalet, re aranz sa *sitting area*, re sirfas sa *basketball court*.

R1.1 milyon pe al ganny depase lo sant kominoter. Latmosfer dan sa landrwa pou sanze e ler mon ti'n are dan lofis, sant kominoter ti pe ganny itilize pou vann drog. Byensir mon ti bezwen met lord dan en dezord e mon pa ti vin popiler. Me parey mon'n dir, mon annan serten prensip e mon pou atas mwan avek sa bann prensip.

E apre serten desizyon ki'n ganny pran in permet dimoun pou vin devan, pou kapab vin donn nou en koudmen, pou kapab fer bann *Scheme* ki tonm anba Gouvernman Lokal.

Me avan mon al lo sa bout i enportan ki mon tous lo bann devlopman ki'n annan lo kote lenfrastruktir. Lo kote semen St Louis *main road*, nou ti'n soumet en demann, *SLTA* in met koltar. Semen Serret, pa aköz Prezidan i reste. In annan e ta zefor ki'n ganny mete par lotorite distrik St Louis avek Legliz Advantis pou kapab elarzi semen, etabli en dezyenm *turning point*. Apre lan travay avek *PUC*, nou'n nobou kapab re sirfas sa semen.

4 semenn pase apre ki nou ti'n soumet en demann avek *SLTA*, sa semen o bor lekòl Belonie Segonder, Rue Frère

Mariste e tou dan zalantour in ganny re sirfas, e sa mon pran lafyerte ladan aköz nou'n met zefor e nou pe ganny en keksoz an retour.

E ler nou pe koz lo bann zafer proze, proze semen. Mon'n erit 2 dosye, enn se Semen Kato ti annan zis en papye *A4* me selman nou'n kapab fer keksoz bouz dan en bon direksyon kot 98poursan dimoun in dakor. La i reste zis enn.

So, ler sa msye in sinyen mon pou fer sir ki mon met presyon nesaser pou nou kapab ganny sa proze semen, prenon kont dimoun in atann pou 30an. E proze semen Belonie osi nou pe travay lo la e mon konnen ki Minis i pe donn mwan en koudmen lo sa demars. Alors mon demann bann zabitan Belonie pou reste en pe pasyante prenon kont lafason ki Gouvernman presedan in *deal* avek sa proze semen.

Mr Speaker, vi ki mon lo Belonie, Lekòl Belonie se en lekòl kot mon ti'n lekòl mwan menm. Mon ansyen zelev lekòl Belonie. Mon asiz lo *School Council* e mon oule pran sa loportinite pou remersye Ms Medge Nancy pou sa loportinite ki in donn mwan, pou mwan kapab ganny en konprenezon lo lafason ki *School Council* i

fonksyonnen, ki kalite difikilte zot pe rankontre.

E zot konnen ki zot annan mon sipor total, anefè Mr Speaker avek ou nou'n etabli en bon partenarya lo nivo lekòl Belonnie e menm La Rosière e i pou donn mwan gran lafyerte pou vin koup sa riban ansanm avek ou e Prezidan, ler sa moman pou'n arive.

Vre nou'n met en kantite lanfaz lo sa proze kot a pepre 30 milyon ti'n ganny enzekte depi ler nou, nou ti'n vin o pouvwar. E nou konnen ki Lekòl La Rosière in en size ki ou'n koz lo la pou plizyer mwan, si non lannen e finalman nou'n osi ganny nouvel poudir ki travay pe al komanse pou kapab rekonstrir lekòl La Rosière.

Mr Speaker i annan en kantite keksoz pozitiv ki pe ariv dan nou distrik. I annan Lisette Maria, Nelson Sopha, Coach Lenon, Garry Woodcock, Mrs Rachel, Dericka Figaro, Daniel Robert, Faranah Commettant mon pa pou dir ki sakenn de zot in fer. Me selman pou zis dir li dan en fraz, zot in vin devan san okenn lekspektasyon an retour.

Zot in demande ki mannyer eski mon kapab fer pou mon distrik bouze. Pou sa bann keksoz, pou sa bann linisyativ ki zot pe pran pa fodre ou bezwen larzan, ou bezwen

zis leker ki senser vizavi ou bann zabitan.

Alors mon oule remersye sa bann dimoun e i osi fer mwan rapel en zenn Sheena Talma ki pe fer flote nou paviyon dan Lasyans e dan Sekter Resers. An menm tan mon pa pou oubliy mon DA Ms Anna Quatre ki osi en zabitan St Louis ansanm 30 avek 31, se nou ki lotorite distrik pli zenn lo en baz Nasyonan. Zenn se pa 46an Onorab Wallace Cosgrow, *get your facts right, ok?*

So, mon pou terminen mon oule zis fer resorti ki i annan pa mal problem dan nou distrik e sa bann problem in la pou plizyer lannen parey en bon pe zot, zot okouran.

Me selman mwan ek mon lekip determinen, nou pou trouv solisyon kot i posibil pou nou kapab rezourd sa bann problem. E fransman dir ou mon krwar pa si sa 2an edmi pou ase pou adres tou sa bann problem.

Me selman en keksoz ki mon kapab dir zot, mon pou donn 100poursan dan sa travay ki mon pe fer parey mon Prezidan pe fer pou nou pei Sesel. E mwan mon pa pou zanmen les tonbe! Mersi Mr Speaker.

(APPLAUSE)

MR DEPUTY SPEAKER

Mersi Onorab Naidu. Prosen entervenans lo lalis se Onorab Johan Loze.

HON JOHAN LOZE

Mersi Mr Speaker. Mr Speaker, depi bomaten mon pe tann bokou repons lo Kongre Madanm *United Seychelles*. Bokou repons lo diskour Dokter Patrick Herminie, e bokou repons lo bann diskour bann *MNA United Seychelles*.

Petet lot kote i kapab kadre zot bann Manm en pe, *remind* zot nou la pou reponn diskour Prezidan, e nou fer loner nou Prezidan par reponn son diskour. Annou pa inyore li konpletman, e al donn loner Dokter Patrick Herminie pou sa ki in dir dan Kongre Madanm.

Mr Speaker, i paret mwan osi ki nou'n oublie osi lekel ki ti *MNA Saint Louis* pandan plizyer lannen. Akoz lenpresyon ki mon pe gannye la, nou pe blanm *US* konmsi nou ki ti *MNA Saint Louis* avan.

Mr Speaker,

(Off-Mic)

HON JOHAN LOZE

(Zot in fini? Zot in terminen?)
Diskour Leta Lanasyon, i sipoze ganny fer par Sef *d'État* Sesel, e

koman sa enn ki *hold* sa lofis i responsabilite Prezidan pou premyerman, delivre en diskour ki pou anmenn lespwar, gidans, tras nouvo direksyon, aport kouraz, soutyen, e sipor pour sitwayen, e zeneralman elev moral sa pep ki apel Seselwa.

Diskour Leta Lanasyon i egalman devret fonde dan laverite, fermeman baze dan bann fe, azour avek la realite e gide par en lonnekte ki ferm e absoli.

Malerezman, sa ki nou'n gannye Vandredi set en toup, Prezidan in vin dous devan nou, in tourn an ron, vir, vir lanmenm, balot balote e pa'n al okenn par avek son diskour.

Sa diskour ti en diskour "ek nou, pa ek nou", ki'n met lanfaz lo kre divizyon e ensilte nou Nasyon. Sa zistwar sabotaz avek trenn lipye, i zis en nespe bat latet sorti kot en dirizan ki en *utter and complete failure!* E i konnen li ki i a pe *fail*, me i enkapab fer nanryen pou sey sov son prop lekor.

Diskour ki sa msye in delivre Vandredi, i pa ti en diskour Leta nou Nasyon, me plito en diskour lo leta nou kales, delivre anba nouvo tenm *LDS* ki "Fristrasyon, pour tou son zanfan!"

(APPLAUSE)

HON JOHAN LOZE

Nou pe viv dan en Sesel ozordi kot zournalis i ganny *ban* pou *attend* Konferans Lapres *State House*, e pour leskiz zot in dir ki sa zournalis i servi son platform pou ekri mansonz, fann rimer, e fer fo propagann.

Me Vandredi ki nou'n vwar? Diskour sa msye in fer egzaktaman menm keksoz, ki'n sa zournalis in fer. Sa diskour in koz lo bann keksoz vag, ki pa kapab ganny zistifye, ouswa verifye. Lakizasyon parti lakizasyon, ki pe zis ganny tire dan en nean e ki konpletman dekonekte avek larealite. Rimer tou sord groser e lanpler.

E finalman latak malisye ki'n konpletman divorce avek realite, zis pou sey servi sa diskour leta nou kales, pou atak enn ou oponan politik ki ou pli per.

Alors, ki diferans eski i annan ant sa ki sa msye in fer isi anndan Vandredi, avek sa ki li menm li in akiz Ralph Volcere pou fer dan son zournal *The Independent*? E en pli bon kestyon ankor, ki diferans eski i annan ant ou avek Mr Volcere si zot tou lede zot pe fer menm kalite zafer?

Petet lesel diferans se ki ou, ou posed tou pouvwar e ou kapab *ban* lezot e anpes zot

koze, ouswa ganny akse, letan zot dir keksoz ki ou, ou pa kontan.

Diskour leta nou kales ti ganny delivre le 10 Mars 2023, egzaktaman 2 zour apre ki nou ti zwenn avek lemond pou selebre Lazournen Enternasyonal pour bann Madanm.

Sa diskour Vandredi pase ennler mon oule krwar ti'n lev pou zot bann madanm. Zot lanplwa dan Servis Piblik in ganny menase, anba fo preteks trenn lipye avek sabotaz. Largiman i kapab ganny avanse ki sa menas pa'n ganny fer kont fanm spesifikman. Me okenn dimoun ki son lespri i bon, pou realize ki la pa en moman pou menas bouse manze en manman ki annan son zanfan pou sonnyen, son fanmir pou okipe, sirtou kan nou konnen ki Sesel i annan bokou manman tousel dan lanplwa.

(APPLAUSE)

HON JOHAN LOZE

Me sa ki pli iritan avek sa bann menas ki in fer, nou tou nou konnen ki zot zis en bann menas las e ki i pa pou swiv son menas avek okenn aksyon. Parske sa bann zafer sabotaz avek trenn lipye i zis en

refleksyon son prop leta mantal.

Tou sa bann lakizasyon sabotaz avek trenn lipye, i zis fason fer en dimoun iresponsab ki pa kapab aksepte responsabilite pou son prop linefikasite.

Dan plas debout, aksepte kot i pe vreman al mal e korize, i prefere kre en dram e fer en nespes *telenovela* kot i eksternaliz tou blanm, e met son fot lo ledò lezot. Avek sa kalite latitid dan en Dirizan i vreman pou napa okenn lespwar pour nou pep dan limedya. Si ou pa kapab admet ou fot e ou febles, ou pa pou zanmen kapab koriz sa menm fot e febles.

E dan en ka klasik, en *textbook case* pour enstabilite mantal, sours fristrasyon pour 90mil dimoun, i vin sers senpati an piblik pour son fristrasyon prive e personnel. Angiz ki la, tou sa ki pe kadas li ava idantifye avek li, e senpatiz avek li, vi ki dapre li, i pe eksperyans menm malez e fristrasyon avek zot.

Me kestyon, kote eski ou fristre ou msye? Letan ki ou pe anvole anler dan premyer klas? Eski ou fristre avek sa ver sanpany? Ouswa ou fristre letan ki ou dan lotel 7 zetwal laba lo lot kote kot ou reste?

Kwa egzaktèman ki fristre ou? Sa bann tapi lili laswa dan lotel 7 zetwal, pandan letan ki isi napa tapi lo lili lopital? Silvouple, dir nou.

E la mon rapel bann dimoun ki dan soulezon ti al lopital san lenz lo zot, e ti sorti dan tapi lopital ti al se zot. Ziska ozordi, zot pa ankor rann.

Akoz sa zafer fristrasyon la, pa vin koz avek Seselwa. Si i annan en group dimoun ki senserman fristre an se moman, se sa pep Seselwa, e zot fristre avek ou Msye Prezidan, avek ou ladministrasyon, avek ou *Cabinet* Minis, avek ou fason fer, avek lafason ki sa pep in ganny rezete e inyore depi Oktob 2020.

Aprè 30an ki ou'n kanpany pou vin en dirizan, ozordi ou'n arive vin en *boss*, ki pe konport li koman en *Lord and Master*. E i paret ki ou'n konpletman oubliye ki koman en Dirizan ou sipoze vin *serve* ou pep, e non pa zis servi zot pou ariv kot ou'n anvi arive.

Nou'n vin en pep ki zour an zour pe vin pli pov, konpare avek promes ki ti ganny fer pou met larzan dan nou pos. Ozordi Seselwa i vwar en Gouvernman ki donn li avek lanmen gos, e deswit rebran avek lanmen

dwat e konmsi sa pa ase, i pran avek son lipye tou.

Ozordi nou annan en pep ki pe ganny tromatize e ridikilize ler zot eksprim zot lekor. Si en garson i filmen en *video* lo lans, sa *video* i ganny latansyon Sef d'État, e i ganny en mansyon spesyal dan diskour leta nou kales.

Si en madanm i fer en odyo, sa osi deswit i sot lo la e aport a latansyon Nasyonal. Lekspresyon sitwayen in vin en lot miz an senn dan son teat lerer kot sitwayen i pas pou koupab. Kwa egzaktaman ki ou ti pe kont fer avek sa bann lerer kot sitwayen in ganny targete e ridikilize, *bully*, e abese?

Mwan an tou leka, sa kalite latitud *bullying* i pa sirprann mwan. Apre sa *sneak attack* ki ti ganny fer lo Onorab Barry Faure kot kalot par deryer son latet, en akt non selman *bullying*. Me egalman en aksyon kapon. Apre zoure e menas ki Onorab Sophola ti gannyen isi menm dan nou kantin.

Apre latak verbal ki Onorab Chantal Ghislain ti gannyen isi menm dan nou *Chambers*, kot ti ganny dir 'sepa si ou konnen kote ou desandans i sorti Lafrik'. Konmsi lesklav ti ganny

anmennen avek *travel documents* sorti Lafrik.

I pa sirprann mwan ditou, si sa menm kalite latitud *bullying* in ganny transfer lo nou sitwayen. E mark mon parol, se *bullying* sa ki i pe fer. In servi en platform nasyonal, pou li *bully* nou bann sitwayen ki pli feb, swa endividuelman, ouswa an group.

E parey tou *bully*, i annan son lekip kapon ki pou *back li up* e ranforsi son mesaz *bullying*. Sa menas pou li pous siporter *US* dan travay, aköz son maladi imaziner trenn lipye, e sabotaz i senpleman en akt *bullying* parey son labitud.

(APPLAUSE)

HON JOHAN LOZE

Kot li ki annan tou pouvwar, i servi son pozisyon pou fabrik lakizasyon e mansonz, apre menas sa ki pli feb avek en aksyon defavorab, si zot pa fer sa ki li in demann zot pou fer. Kwa sa si pa *bullying*? Eksplik mwan?

Aprezan i annan en lekip, ki pa pe servi zot lespri pou sey analiz kwa ki zot pe fer, ki pe zis kontinyelman repet son mesaz konmsi i en keksoz normal pou bann privilezye menas sa ki pli feb dan sosyete.

Sa konportman enstab, ki ozordi pe manifeste isi menm anndan dan nou Lasanble, i enn bann vre sours fristrasyon nou pep. Kot nou pe dousman, dousman devlop en kiltir labi lo travayer, sirtou dan Servis Piblik. Bann travayer ki ganny arsele, menase e viktimize aköz zot kouler politik.

Be si, platform Nasyonal, pilye nou demokrasi, Lasanble Nasyonal Sesel i kapab ganny servi pou senm sa legren reglis viktimizasyon politik e nou aplodi, bat lanmen, siporte, alors pou napa lespwar pou nou pep. E sa fristrasyon ki zot pe santi pou reste avek zot pou en bon pe letan ankor.

Lord ek Lape; I sagrinan letan ki mon tann sa msye dir ki li i pe al dir Komisyoner Lapolis pou fer isi e fer laba. Zot kontan gard en fasad ki zot bann pli gran demokrat dan sa liniver. Be de tanzantan i ariv bann moman kot sa fasad i glise e kontrol i sap zot, apre tou, zot imen zot osi.

Enn bann mansonz favori, se ki zot pa enterfer dan travay Lapolis, apre zot debout la devan e admet ki zot ki dir Komisyoner ki i pou fer. Zot zis en nespes bwat kontradiksyon koumsanmenm.

Be si zot pe dir Komisyoner ki pou fer, lekel

ankor ki zot pe dir ki pou fer? ACCS petet? Posibleman Zidisyer osi? Pa trakase, avan lontan tou pou devwale. Ou konnen lekel ki ou devret pe raport avek Komisyoner? Raport sa enn ki'n admet devan Lakour ki i servi *fake profile*.

Raport sa enn ki *email* son frer e demann li pou anvoy *sex toys*, apre eksplike dan sa *email* ki i pou fer avek sa bann *young girls*.

Raport sa enn ki anvoy mesaz elektronik pou son siporter e menas en santer popiler avek en boulet dan son latet.

Gete sa msye, i annan ase *cybercrimes* lo ou pou ou raporte, i annan tro bokou menm. Leta nou Nasyon ozordi i enn kot si en paran i koriz son zanfan, en pti moman ou pou vwar Sosyal, gard avek Nasyon-z-Ini kot in vin mele.

Me si en group zofisye ibou i balans grenad karoutsou parmi zanfan, la person pa mele, aköz sa i byen, napa fot la ki'n ganny komet la Onorab Naidu. Ou'n fek dir, malgre ki enn pti boulet karoutsou ti ganny tire parmi zanfan, nou pe normaliz labi lo zanfan *as long* ki i *fit* nou azanda politik.

(APPLAUSE)

HON JOHAN LOZE

E koman nou lo sa bann size lord ek lape. Lekel ki responsab pou sa bann Mersener Angle avek pistol, ki ti pe parade dan nou pei en pe letan pase? Oli sa bann Mersener ozordi? Oli zot pou reponn kestyon lo sa bann alegasyon vol ki'n pase kot lakaz Valabhji Morne Blanc?

I paret mwan ki Leta nou Nasyon, i enn kot Angle i anvoy lanmen, me blanm i retonm lo ledò Kreol. Ozordi tou blanm i lo Lapolis Sesel. Pov zot!

Se sa ki arive letan ki en pei souveren i deside pou rekomans bese, pwenti e prostern li devan son met kolonyal. Se zisteman sa ki arive letan ki ou al sers sa lasenn kolonyal pour remet otour ou likou.

Ozordi Angle pe *enjoy*, e Komite Lenvestigasyon in ganny dir tenir en kou, nou a get ladan pli tar aköz zot per pou ofans zot met kolonyal. Lo lot kote, pli lalit kont drog i vin asarnen, pli drog i anvai nou sosyete.

An 2019 letan ki zot ti pe lager pouvwar zot ti annan tou solisyon, e zot ti pe al rezourd sa problem dan 100 zour. Ozordi an 2023, pros 3an apre ki zot in fini ganny pouvwar zot nepli koz lo zot solisyon, zot koz

zis lo problem erite e problem ki ti la avan.

Zot nepli koz lo kwa ki zot pou fer pou rezourd sa sityasyon parey ki zot ti fer letan ki zot ti pe rod vot. Ozordi zot tou zot bann eksper lo kwa ki pa'n ganny fer par ladministrasyon presedan, ki mannyer eski sa ki pa'n ganny fer yer, pou rezourd sa problem ozordi?

Eski zot in fini *give up* lo trouv en solisyon reel, e zot zis satisfè pou bat nou latet ki drog i dan en defonse 3000 met anba lanmer. E ki zot pour servi zot mazorite absoli, pour fors en solisyon.

An terminan lo sa size, ed mwan pou konpran ki mannyer eski bann menas sabotaz kont bann lenfrastruktir Leta, e lenportasyon zarm par prizonyen e sepa lekel ankor pa pe ganny trete koman en lenvestigasyon serye? Ki mannyer eski bann size sitan enportan pa pe ganny *investigated* dan tout konfidansyalite par bann Lazans konsernen?

Olye lenvestigasyon serye, lenformasyon pe ganny trete dan en fason banal, e pe ganny balanse dan domenn piblik dan fason pli iresponsab posibil, par en endividi *who should know better*.

Mwan koman en Lezislater mon vremen konsernen. Swa nou lafors sekirite in *fail* fas avek en menas grav, ouswa la ankor en fwa nou fas avek en lot maladi imaziner sa msye.

Si ou en zom serye, pran aksyon silvouple. Tou pouvwar i dan ou lanmen, pa bezwen zis babala, pran aksyon ferm e desiziv. Aret zis fer ensinyasyon, kre spekilasyon e fann rimer. Lasanble i pa en ros larivyer e ou, ou pa en blansisez lepok lontan.

Lasante;

Resours pli enportan pour nou servis lasante i nou resours imen. Nou bann profesyonnel lasante avek zot bann *support staff*, se zot ki le sel bizou, e sa vre trezor nou sistenm lasante. Se zot ki nou vremen depan lo la pour reste an bonn sante. Sa group profesyonnel ki'n ganny tromatize e brile par sa pandemi *COVID*, e son bann konsekans.

Travayer Lasante ki ziska ozordi ankor pe *carry on* konmsi *business as usual*, apre *COVID*, e nou tou nou pe tret zot konmsi zot *ok*. E napa person ant nou ki pe *bother* pou demann zot, eski zot vremen *ok*, eski zot korek?

Ki lenpak eski sa *COVID* in annan lo zot? Eski zot fatigue, pli fatigue ki avan? Eski zot annan

bann mo ki pa ti la oparavan? Lekel ki pe pran ka, avek bann ki'n pran ka avek nou? Lekel ki pe okip sa group dimoun ki'n travay toulezour pandan letan *COVID*? Sa group dimoun ki ti pe travay anba en moratwar ki ti anpes zot pran konze.

I enportan pou repete sa. Pandan ki nou, nou ti pe pran ka avek nou fanmir dan konfinman kot lakour, Travayer Lasante zot, zot ti pe travay anba en moratwar ki ti defann zot pran konze.

Aprezan, ki mannyer eski nou adres sa. Ki fason eski nou *make it right* pou sa bann travayer lasante ki'n donn sitan, *how do we make them whole again*? Eski nou pe mazine ki nou bezwen annan serten konsiderasyon spesyal pou zot? Byen sir ki non, akoz nou pa pe koz avek zot. Nou pa pe demann zot si zot *ok*? Personn pa pe fer letan pou zot.

Mwan mon kapab dir zot sa ki mwan mon konnen. Ki an mazer parti nou bann travayer lasante zot pa *ok*. E nou koman en sosyete, nou bezwen fer plis pou adres sa size avan ki nou komans perdi zot, enn par en.

Gard byen antet, i pa zis sa ki'n ale, i pa zis sa ki kite ki'n ale. Me egalman sa ki'n demotive, sa ki'n ganny perse sek, sa ki'n konpletman epwize,

e sa ki moralman, mantalman e spirityelman bezwen resourse. Me zour an zour zot forse kontinyen. Mon lapel pou zot, se pour komans aranz nou sistenm lasante, par aranz nou bann travayer Lasante.

(APPLAUSE)

HON JOHAN LOZE

Pri Lavi;

I tre kler pou tou Seselwa ki Prezidan pe evite pou adres sa size pri lavi. I koz 2 erdtan lo tou size anba soley, me sa size pri lavi i alerzik avek. Lenflasyon in defons plafon, me zot pe koz lo en logmantasyon 10poursan konmsi sa pti lamann ki'n tonbe sorti dan lesyel e i sipoze nourri nou lekor korporel e spirityel pour en leternite.

Dan plas sitye keksoz dan la realite, ki sa logmantasyon 10poursan ki zot in donn avek martir, i zis en pti bout lapay ki Seselwa pou sey anpandan avek pou anpes li noye. *By the time* ki sa 10poursan i ariv dan ou pos, i pou'n fini ganny anvale par to lenflasyon reel ki'n fini *set in* depi 2021.

I pou napa okenn benefis. I pou napa okenn soulazman pour sa pep ki'n deza sitan strese par son kondisyon lavi egzistan. Keksoz ti pou diferan si ASP ti'n zwe son rol depi 2021

pou anpar nou travayer Seselwa. Dan plas ranpli son manda, ASP li osi in vin en lot zouti labi, ki'n la pour pini nou bann travayer Seselwa.

Pourtan, *IMF* ti'n donn zot larzan pou siport nou bann program sosyal. Sa zans in vir zot ledo lo sa pep ki apel Seselwa. Mon pa konnen ki kalite maladi i apele sa enn, akoz non selman zot in vir zot ledo lo sa pep, me zot in maltret li osi pli ba ki later.

I enportan pou Seselwa konnen ki depi lannen pase i annan plis ki en 15enn *staff* ki pe met zot *retirement* kot ASP. Kan sel dimoun ki devret ale kot ASP se son *CEO*. Dan zot lopilans, zot pas zot letan zis pou tret dimoun parese, pa oule travay, depan lo Leta, abizer, malsen, serpan, *zombie*, tousala dan en zefor pou kasyet zot pese. Bann atoufer!

Depi 2021 travayer Seselwa pe ganny kit ater kot ASP, travayer Seselwa pe ganny kit ater kot *part rental*. Travayer Seselwa in ganny abandonnen e kit ater dan tou demars sosyal ki zot in fer.

Eski zot pe sey dir nou ki travayer Seselwa i bann abizer, bann kaler, bann parese, bann serpan? Ouswa se zot ki bann atoufer e zot en bann *bullies* parey zot *Leader* ki konvenki ki

Seselwa set en pep dosil, ki pou toultan asiz trankil e les li ensilte zot?

Napa nanryen ki zot pe fer ki pe aziste, zis zot pe tourn an ron parey zot Dirizan. An 2025 zot pou tonm sek avek zot tourbiyon. *ASP* i fer pou li, *SEYPEC* i fer pou li, *PUC* i fer sa ki pou li, e *STC*, ki nou kapab dir lo *STC*? *STC* ozordi in vin en sours soufrans limero enn pour sa pep. La ozordi ziska dipen zot trouve fodre ogmante, zot pou dray sa Kreol ziska vant i kol avek ledò, e mon pa krwar ki ni menm sa pou satisfè zot.

Enn ler letan mon get mon zoli pei, mon krwar ki zot tou zot ankor soule lo diven Mr Mukesh. Apre tou, draze vole i pli dou ki draze aste.

(APPLAUSE)

HON JOHAN LOZE

Koman mon pe koz lo kou lavi, eski zot in tande ki kantite profi ki *SEYPEC* in fer? Eski zot rapel propozisyon ki ti ganny fer par Onorab Churchill Gill, pour sey adres nou sityasyon pansyon par transfer bann *share dividends* sorti kot bann lantrepriz piblik pou al kot Fon Pansyon? Eski zot rapel? La zot pe al ogmant laz pansyon e nou, nou'n sey avans solisyon.

Me pa trakase. Semenn prosen, *LOTO* pe anmenn en Mosyon Irzan pour *quash* sa *S.I.* pou ogmant laz pansyon. Lepep Seselwa a vwar kote ki zot, zot vreman debout.

Nou ti kapab rezourd nou problem pansyon dan zis en *move*. Si nou ti fer sa ki Onorab Gill in sizere. Me non, sa nou pa pou fer. Sa ki nou pour fer se kontinyen abiz sa pep e pers li sek ziska ki a sek an dibout la, la prezan zot kontan.

Sa diskour avek son loter ou kapab pran tou lede met dan en sak e balans dan en fon 3000met e Seselwa pa pou mank nanryen. Sa diskour pa'n aport nanryen ki byen pour sa pep! Loter diskour ti napa lentansyon pou vin enspir sa pep, ni pou lev son moral, ouswa donn li gidans e bon direksyon.

Sa ki, mon'n vwar Vandredi se en *weak embattled leader* ki pa konnen ki kote pou vire, in vin sey maltret serten, rod senpati avek lezot, sey zwe fer lapenn an menm tan ki i pe sey fer krwar i for e se li ki la, e se li ki dir ki pou fer. Kan saler diskour ti napa ni en devan, ni en deryer.

Sesel pour tou son zanfan, me selman Christopher Gill avek Praslin *Business Association* antye in ganny met

akote dan tou proze devlopman lo Praslin.

Bann largiman feb e deleye ki'n sey vin zwe lo lemosyon nou pep, tel parey ki i pa kapab al lo lans Beau Vallon avek son pti zanfan. Be mon zanmi ou bezwen pa kapab al lo lans Beau Vallon avek ou pti zanfan, akoz ou pa reste isi ou. Sey al lo lans dan *Gulf* laba kot ou reste.

MR DEPUTY SPEAKER

3 minit silvouple.

HON JOHAN LOZE

Pa oubliy bann largiman *best worker*, kot in deklar son lekor peser e ki sak fwa i al lapas i anmenn keksoz. Mon zanmi, peser ater toultan i anmenn keksoz, akoz se kanmarad ki bezaye lo kannal, li zis i met pri, i vann.

Ou en peser ater ou, kanmarad ki lapas pou ou laba lo lot kote e tou Seselwa i konnen lekel ki pe lapas pou ou, pou fer pli gou, ou menm tir portre avek li.

Pou terminen, mon swet Seselwa kouraz, pran ka avek zot lekor, pran byen swen avek zot fanmir, keksoz pou vin pli dir e pli difisil dan bann mwan ki pe vini. E mon swete ki zot tou zot a kapab ganny en fason pour sirviv e avans devan.

Mr Speaker si mon pour *sum-up* sa *speech*, dan en fraz, mon krwar mon ava demann prete parol, demann prete lenspirasyon, mon zanmi Gato e dan parol Gato sel keksoz ki mon kapab dir pour *sum-up* sa *speech* Mr Speaker. 🎵 “Sa *speech* i lalang, lalang, lalang, zot pe servi lalang pour zot kouver lalang, zot lalang, lalang, lalang” 🎵. Mersi Mr Speaker.

(APPLAUSE)

MR DEPUTY SPEAKER

Mersi Onorab Loze. Nou pou pran en *break* aprezan e rebran 4er. Mersi.

(BREAK)

MR DEPUTY SPEAKER

Welcome back tou dimoun. E nou kontinyen avek nou, bann repons Manm Lasanble lo mesaz Prezidan lo Leta Lanasyon. Prosen entervenans lo lalis se Manm Elekte pour distrik Cascade Onorab Philip Monthy.

HON PHILIP MONTHY

Mersi Mr Speaker. Bonn apre midi Mr Speaker. Bonn apre midi tou koleg Onorab, bonn apre midi tou zabitan Cascade ki pe ekout mwan.

Mr Speaker avan mon komanse atraver ou, mon oule reponn en lakizasyon ki Onorab - pa en lakizasyon me en mo ki'n servi kont nou lekip isi ki nou'n ganny trete koman bann kapon, ki pe defann Prezidan.

Mwan sa mo kapon, pa egziste dan mon vokabiler mwan Mr Speaker, *ok?* Kapon se sa lekip ki ti anvoy en madanm vin fer lakizasyon lo en zofisyè Finans isi dan sa Lasanble ki apre ler ti bezwen *apologize* sa madanm ti ase for ti vin *apologize*. E *Leader* ti kasyet deryer, se sa kapon, Mr Speaker. Pa sa lekip ki la.

(APPLAUSE)

HON PHILIP MONTHY

Mersi Mr Speaker. Mr Speaker, ler mon'n ekout diskour ki Prezidan Larepiblik ti prononse dan sa Lasanble Vandredi le 10 Mars 2023, 5er apre midi, mon'n santi en serten lemosyon e mon'n vwar li konman mon devwar pou envit sa Nasyon ki apel Seselwa pou fer en refleksyon profon lo sa diskour ki'n ganny prononse, e osi lo sa zonn li menm ki ti delivre sa diskour.

Sa refleksyon i enportan Mr Speaker, aköz ler mon ekout *Leader* parti minoriter ek son bann Manm Onorab koze, e

mon'n lir serten remark lo *Facebook* par serten gran koneser ki'n ganny Doktora dan zis en semenn, e ler mon'n ekout sa pti group la deor ki swadizan ti nou bann siporter *LDS*, i fer mwan tris Mr Speaker.

Mon tris, aköz parey lot fwa dan en konversasyon ki Minis Ferrari ti repet en parol ki ansyen Prezidan Mancham ti'n deza dir li, e mon site "Dan politik napa rekonesans". Fen sitasyon Mr Speaker.

E laprev in la dan sa Lasanble depi yer Mr Speaker. E in sirtou ganny prouve par sa 2 Manm Onorab lo lot kote latab ki enn pe reprezant Baie Ste Anne Praslin e lot La Digue. Vre napa rekonesans dan politik Mr Speaker.

Sa zonn ki ti la anler pe koze Vandredi pase, Mr Speaker ki yer zour son laniverser olye pe asize dan la trankilite parmi son fanmir, in o kontrer pas en lazournen travay dir, kot i pe touzour sey rod solisyon pou rann lavi sa pep ki apel Seselwa pli meyer.

E in selebre son laniverser, tout an ekoutan en kantite laenn, negativite, e engratitid ki'n sorti lo sa lot kote latab la dan sa Lasanble.

(APPLAUSE)

HON PHILIP MONTHY

Akoz sitan negativite e laenn sorti kot sa parti minoriter Mr Speaker? Ler mon'n ekout zot, i fer mwan mazin en *interview* ki en madanm ti donnen lo *SBC* semenn pase a lokazyon peryod Karenm ki bann manm lafwa *Bahai* ti pe al antre ladan.

Mon pou sit li Mr Speaker. i ti dir "Dan Karenm osi nou bezwen pirifye nou bann panse, akoz si nou pans pozitiv, nou pou apresye plis sa ki otour nou. Olye *focus* lo sa ki nou napa, *focus* lo sa ki nou annan. I fer nou annan lakontantman. Olye rod problemm, nou pou vwar en ta problemm, si nou rod problemm. Annou rod solisyon e nou devret form parti sa solisyon. Annou osi fer nou pti zefor pou sey fer Sesel ek lemonn en landrwa meyer." Fen sitasyon.

Bann mo tre for Mr Speaker, ki mon swete sa bann fo profet negativite i ekoute e met an pratik pou byennet sa pep e sa pei. Prezidan Ramkalawan ti'n kapab pe fer lot keksoz parey li menm li in fer nou remarke dan son diskour Mr Speaker. Kot i pa ti pou bezwen pe ekout en Manm Lasanble, kot apre ki son zil in benefisy e avek en lasose pasaze e plizyer lezot devlopman ki son

parti pa'n kapab donn li pandan 25 an, parey li menm li in fer nou remarke.

Me olye dir mersi, in vin dir nou ki son Gouvernman ki ti desid lo la, son parti ki ti fer plan e li ki ti koz lo la, e li ki ti lo sepa ki Komite." Atraver ou Mr Speaker, mon le dir onorab Gill, ki in fer en tre bon konklizyon lo son parti ki apel *US*. Akoz li menm li in konfirman ki zot zis en parti ki deside, ki fer plan e ki koze. Me nanryen plis ki sa zot pa fer.

Mr Speaker, Wavel John Charles Ramkalawan pa'n swazir sa semen ki ti pou fer li la sa laz ki i arive pe asize trankilman e kot i ti a pe fer sa ki li i anvi, al lo lans ek son pti zanfan, san presyon e san lensilt sorti kot bann engra.

I pa'n swazir sa semen, akoz sa gran met ki'n anvoy li lo sa later, ti annan en misyon spesifik pou donn li pou akonplir. E ler sa in ganny ekrir Mr Speaker, napa okenn zonn ki pou kapab fer lekotr. Sanmenm sa ki nou apel desten, Mr Speaker.

Desten in fer ki Wavel John Charles Ramkalawan pa'n ganny anvoye lo sa later pou zis vin en Pret e apre kontinyen viv son lavi dan la trankilite. Desten in fer ki se li ki'n ganny sa latas lour, pou debout en

zour e annan kouraz pandan ki plizyer ti'n prefere gard silans, akoz zot ti per pou zot lavi.

Pour li konmans en parkour e anmenn en lager asarnen kont lenzistis, viktimizasyon politik, koripsyon, *népotisme*, e lager pou ki laliberte e la demokrasi i rennyen dan sa pti pei ki apel Sesel.

Kot prezan, gras a sa lalit ki in anmennen, menm bann ki napa nanryen pou dir, ozordi zot lib pou zot kapab dir nenport kwa ki zot anvi. Personn pa pou fer zot disparet, met en bin *liner* lo zot latet, bat zot, viktimiz zot e obliz zot kit pei kont zot volonte!

E atraver ou Mr Speaker, mon oule dir Onorab Uranie pou li get li byen dan laglas bomaten e get son parti byen. Sa parti ki pandan 15an, anba en sistenm diktatir ti senm laterer parmi sa kous popilasyon ki pa ti siport zot filozofi. Kot tou sort atosite ti ganny komet. Avan i esey vin donn nou en leson lo viktimizasyon politik, la demokrasi e laliberte lekspresyon.

Sa lalit ki sa zonm in anmennen Mr Speaker, in dir plis ki 30an, apre 5 eleksyon perdi. Ler mon analiz parkour sa zonm, mon ti a kontan poz sa

kestyon. Lekel parmi nou la, ki ti pou annan sa kouraz pou kontinyen? Mon asire ki apre zis premye oubyen 2enm eleksyon ki nou ti pou'n perdi, ou ti pou vwar nou pe rann zarm e abandonnen, parey plizyer in fer.

Menm apre tou sa eleksyon ki in perdi, apre tou sa lensilt, lesey pou anpes li partisip dan prosesis eleksyon, kas latet e plizyer ankor, sa zonm in persiste. Zot konnen akoz? Mon a dir zot mwan Mr Speaker. Se akoz sete sa son desten, e se sa ki sa gran met in anvoy li lo sa later pou akonplir. E personn pa pou tir li la, tan ki sa travay pa fini ganny akonplir.

E se akoz lanmour pou sa pep e sa pei, e en laswaf pou la demokrasi e laliberte lekspresyon, ki i la kot i ete ozordi. Apre plis ki 30 an lalit, nou tou nou konnen anba ki kondisyon ki i ti erit sa pei. Si annan ki'n bliye, akoz parey mon'n toultan dir Mr Speaker, i annan nou ki souvan annan tandans pou bliy vitman. Mon pou profite pou rafresir zot memwar en pe.

Ti annan zis R14milyon dan kof Gouvernman, e kot nou ti bezwen trouv larzan pou finans en Bidze R11 bilyon kot 3 ekek bilyon ladan ti al pou pey

travayer. E kot kandida Vis-Prezidan Parti *US* dan dernyen eleksyon, ti pe menm konmans koz lo koupir saler pou serten travayer.

Nou'n bliye sa? Gras a travay ki sa zonm ek son lekip in fer. Sa Gouvernman *LDS* pa'n zis anpese ki serten nou travayer i vwar zot pe bezwen pran en koupir saler, me in fer ki lafendimwan Avril sa lannen, zis a penn 2an edmi apre ki nou ti pe get en katastrof ekonomik drwat dan son figir e pa ti asire ki lavenir pou anmennen pou nou. Tou travayer Servis Piblik e menm plizyer dan Sekter Prive, pe al vwar en logmantasyon 10poursan lo zot saler, la lafendimwan Avril Mr Speaker.

Olye apresye sa, zot vin rod koz lo *tax* ki pou ganny tire lo sa logmantasyon. Me selman zot pa vin dir, ki sa logmantasyon pou ganny kalkile lo saler apre ki bann *allowance* in ganny konsolide. Ki fer travayer pou pli benefisye. *Tax* Mr Speaker, nou tou nou bezwen peye. Mon krwar zis sa parti ki apel *US* ki pou kapab *run* en pei san fer koleksyon *tax* lo saler, Mr Speaker.

(APPLAUSE)

HON PHILIP MONTHY

Mon mazine kekfw zot a fer donasyon en pe zot bann byen mal aki ki zot in akimile pandan sa 43an avek sa pep, pou kapab fer sa. Annou pa bliye osi, ki sa parti i annan sa vilen manni pa pey son *tax* Mr Speaker. Sanmenm ki nou apel politik bon marse Mr Speaker. Sa ki zot pa dir. Se ki ler en travayer pou bezwen ganny *backpay* son saler, *tax* pa pou ganny kalkile lo sa sonm total, ki fer zot ti pou pey plis *tax*, parey ti leka avan.

Me o kontrer prezan si ou ganny en *backpay*, sa pou ganny kalkile lo zot saler lafendimwan pou sak mwan ki zot in ganny peye. E mwens *tax* i ganny retire lo zot.

Ler ou ekout *US* koze Mr Speaker, ou a krwar ki napa okenn logmantasyon saler ki Gouvernman in donner. Zot pe sey tou pou tir latansyon sa pep lo sa. Kestyon ki nou devret pe poz nou lekor a sa staz, se eski si *US* ki ti'n ganny eleksyon an 2020, Seselwa ozordi ti pou pe vwar en logmantasyon 10poursan lo zot saler lafendimwan, Mr Speaker? Avek sa kantite bal dan *FA4JR* ki ti pe ganny donner e labi partou kote, mon krwar pa Mr Speaker, Seselwa in byen vote.

Seselwa mwan prosen ler pou get zot *pay slip*, pou rann kont poudir vre sa bann zans pe

zis esey vin bat zot latet parey zot in abitye fer pandan sa plis ki 43an.

Ler ou ekout zot koze Mr Speaker, konmsi in napa rediksyon dan pri *fuel*. Me ler Seselwa i al met *fuel* dan zot transpor, zot vwar ki pri bennzin lo laponp in desann. Politik bat latet ankor. Bennzin in sorti R25.20 an Zen 2022, pou desann R20.93, an oktob 2022, e R20.60 an Mars 2023. En rediksyon R4.60 depi lannen pase Mr Speaker. Zot par konbyen zot ti fer desann zot? Par 25 sou a sak fwa ki ti annan en rediksyon.

Nou bann etidyan ki pe etidye dan plizyer pei aletranze pe vwar en logmantasyon dan zot *stipend*. Revizyon dan *weights ASP* pou benefisyé bann ki pli vilnerab in ganny fer. Revizyon *part rental* ki pe tre byen ganny apresye par sa group ki pou benefisyé, i annan ankor bann lanons pozitiv ki pou ganny anonse byento pou ede amelyor lavi sa pep. En keksoz ki pandan 43an en Gouvernman *US* pa'n kapab fer.

Si sa pa en travay ki merit ganny rekonné e apresye Mr Speaker, mon pa konnen kwa ankor mwan. Si ler nou ti pran sa pei, nou laliny aeryen nasyonal *Air Seychelles* ti'n preski faid, e ti topik

konversasyon toulezour, ki swa dan Nouvel, oubyen menm isi dan sa Lasanble. Kot kestyon prensipal sete pou fermen, oubyen pa pou fermen? Mr Speaker, zis a penn 2an edmi, apre sa bann moman sonm dan listwar *Air Seychelles* pou la premyer fwa dan son listwar, *Air Seychelles* pe fer en profi. Eski sa pa merit ganny rekonné e apresye sa? Sanmenm sa en pei ki dan problem sa? Sanmenm sa en pei ki pe glise sa? Eski sa i en pei ki pe deperir sa Onorab Vidot, atraver ou Mr Speaker?

Mwan o kontré mon vwar en pep ki byen portan mwan. Vre dan politik napa rekonesans. Ozordi ler ou tann koz *Air Seychelles*, i zis an referans a bann nouvo larout ki sa lakonpanyen pe al konmanse me non pa lo det ki in akimile.

Omwen, aprann dir mersi. Akoz se nou lafyerte nasyonal ki sa Gouvernman *LDS* in reisir sove. Zis a penn 2an edmi, kot nou pa ti tro sir ki demen pou anmennen, nou pe temwanny plizyer lakonplisman lo nivo lenfrastruktir.

En lenfrastruktir ki'n ganny abandonnen par sa ansyen Gouvernman *US* ki ti la lo pouwar, e ki la pe esey fer sa pep krwar ki zot ki meyer

solisyon pou Sesel. Batiman ki ti'n ganny abandonnen, in reganny en nouvo lavi e kot nou bann zenn ki pe aspire pou fer karyer dan *nursing*, pe kapab etidye dan konfor pou realiz zot rev.

En trou dan *Palais des Sports* ki'n dir plizyer lannen, kot ler lapli ti tonbe, *match* ti bezwen arete pou en zofisye kapab swiy ater avek en gran servyet.

Court tenis ki'n deplise. Stad Linite ki la, me kot nou Lekip Nasyonal e nou bann klib i bezwen al zwe zot bann *match* enternasyonal *Maurice*. Zis 2an edmi, *Palais des Sports* in ganny repare. Stad Linite pou byento dan en pozisyon pou rekonmans akeyir bann *match* enternasyonal.

Onorab Uranie, atraver ou Mr Speaker in koz lo move leta lo laplenn La Digue. Me Mr Speaker si ti mwan, mon ti pou kanmi pou koz lo lenfrastriktir sportif lo La Digue. Akoz nou tou nou konnen ki sa deteryorasyon pa'n ariv pandan sa 2an. Nou tou nou konnen lekel ki ti la tou sa letan. Digwa silvouple, ouver zot lizye.

Me selman Mr Speaker, la nou ki la prezan, e sa Gouvernman *LDS* pou fer li son devwar anver tou zenn lo La Digue ki pe angaz zot dan spor

pou remet sa bann lenfrastriktir dan sa leta ki zot devret ete, kot zot a kapab pratik zot spor prefere dan konfor.

Complex Sportif Anse Royale ki'n touzour zis en rev pou bann zenn sa distrik e sa rezyon, byento Onorab Lemiel a ganny sans koup en riban li osi. Ler Prezidan i koz lo konstrikasyon en nouvo lopital modern lo Mahe, ki zot dir? Sa ti zot nide Mr Speaker. Mon fek dir boner ki tou keksoz ti zot nide, tou proze zot ki ti deside, tou proze zot ki ti diskite, tou proze zot ki ti fer plan. Selman, tou sa bann proze in zis reste en plan, tel parey Lasose Baie Ste Anne. Lopital La Digue i en legzanp tipik ankor.

Ni en Kordgard zot pa'n kapab repare Glacis, selman ler Prezidan Ramkalawan in koz lo konstrikasyon en nouvo lopital modern, ankor sa ti zot nide! Silvouple! Ler mon pe koz lo lopital Mr Speaker, mon pou profite pou mwan koz lo sa zafer dra lopital akoz yer ler sa konversasyon in leve, mon'n resevwar de mesaz sorti kot en zabitan e en ansyen travayer lasante.

E premye i lir koumsa Mr Speaker. Mon pour sit li, "*Good day sir. Just to let you know that the lack of bedsheet in the*

hospital is not a new problem. Mum passed away in 2018 there was this problem. We had to bring our own". Lekel ki ti la an 2018 Mr Speaker? *LDS?*

Lot i dir mwan, "Onorab Monthy, bonzour. Mon en ansyen travayer lasante, pandan sa 43an nou'n toultan napa dra lopital. Nou ti bezwen toultan esper dra sorti *laundry*. Latizann menm problemm. Me nou ti per pou koze aköz viktimizasyon. Mersi." Aprezan zot vin akiz nou konmkwa nou, nou pe fer viktimizasyon politik.

Mr Speaker, nou'n antann en bann pe koz lalit kont drog kan zot menm ki ti ansarz *APDAR*. Montre nou sa bon rezilta *APDAR*. Bann zenn pe *kick* an debout partou dan tou kwen nou distrik. E yer menm mon'n vwar en *video* kot en zenn fiy pe *kick* devan en touris lo en *bus stop*.

Mr Speaker i fer mwan lapenn sa. I fer mwan lapenn ler mon bezwen al lanterman enn mon ansyen kanmarad lekol ki nou'n grandi ansanm, aköz sa pwazon ki apel eroin.

Ozordi lalit kont drog in ganny ranforsi, plis *drug dealers* pe ganny arete, plis bato pe ganny entersepte dan nou delo, e pli gran kantite drog danzere pe ganny entersepte e detrir. E la mon pou lans en

lapel avek Gouvernman Mr Speaker. Pou vin devan a sak fwa ki'n annan bann tel looperasyon e eksplik sa pep byen, aköz drog in ganny detrir an mer e aköz sa bann dimoun ki ti lo sa bann bato in ganny large.

Akoz menm si levidans i la, nou'n vwar sa lesey pou sey konfiz sa pep, pou sey fer krwar ki sa bann deklarasyon i fo. Realite i la Mr Speaker. Menm si annan en serten kantite drog ki antre, lakantite in diminyen konsiderableman, zis *US* ki pa vwar sa.

Me zot ki zot ti fer zot? Vin defann eskobar dan Lasanble e kraz Lapolis ler pe fer zot travay dan bann kan drog. Si ozordi Sesel i annan plis ki 10 mil adikt, anba ki Gouvernman ki sa in arive? Anba Gouvernman *LDS?* Si ozordi tout en zenerasyon nou lafors travayer in perdi? Eski sa in ariv anba Gouvernman *LDS* sa?

Mr Speaker, sa problemm *hard drugs* Sesel, se sa Gouvernman *SPPF*, *US* ki'n les anvair nou pei. E ozordi sa defi pou redres sa problemm in tonm lo nou Gouvernman. *US* i le pran kredi pou tou proze ki *LDS* pe fer ouswa konplete e pe dir ki nou pe zis vin koup riban.

Be Mr Speaker, selman kredi pou zot bann katastrof ki

zot in kit deryer, sa zot pa oule pran sa. Sa bann piti pa pou zot sa? Sa kiltir depandans lo *welfare* ki zot in kit deryer, se zot ki'n koup riban sa.

E sa bann det egzorbitan ki zot in met lo sa pei e son pep ladan, se zot ki'n koup riban sa. E sa divizyon politik ki'n rennyen dan sa pei pandan sa karant ekek lannen ki zot in lo pouvwar, se zot ankor ki'n koup riban sa.

Mr Speaker, en kantite in ganny fer pandan sa pti peryod letan nou'n lo pouvwar. Me eski tou i parfe? Larepons i non. Fristrasyon i annan. I annan en kantite ankor pou fer, aköz nou ti konnen ki sa kales pou pran bokou plis ki 5an pou repare.

Servis Piblik i ankor en defi aköz menm nou *MNA*, plizyer fwa nou tonm dan dir. Mon fek *call* dan en biro pou fikse en randevou ek en *CEO* pou enn mon zabitan, sekreter i dir mwan i a *get back* ek mwan, ziska la mon ankor pe espere. Dokiman ki perdi, telefonn ki pa ganny reponn, tousala i bann move pratik ki ti la depi lontan e ki ankor pe montre son vilen figir. Sa ki pe servi politik dan travay pou fer sa pep fristre, parey *US* in deza ankouraz zot siporter pou fer dan enn zot bann Kongre, i ankor pe fer.

Mr Speaker, ler nou'n elimin labi kot *ASP*, ki tre byen, nou osi bezwen amelyor sistenm ki an plas pou ki sa prosedir i ganny fer pli vit e osi asire ki dimoun ki bezwen lasistans i gannyen.

Avek kreasyon nouvo Lazans pou *Home Care*, mon espere ki serten ka spesifik, parey enn dan mon distrik, kot sa madanm in kalifye pou ganny en *carer*, aköz in perdi en kote son lazanm, me aköz i annan de dimoun ki travay kot lakaz, i pe ganny dir i annan ase *income* pou zot kapab pey zot *carer* zot menm. Mon espere ki son *case* i ganny revwar, aköz tou lakour i annan serten depans Mr Speaker.

E ler mon pe koz lo *carer*, byento zot pou anba en kad formel, e kot pou napa okenn konfizyon konsernan zot konze e zot a osi ganny zot tandservis si zot deside arete fer sa travay. Tou *carer* i konnen ki anba en Gouvernman *LDS*, zot profesyon pe ganny rekonnet en keksoz ki *US* zanmen in fer.

Mr Speaker, napa en zour ki pase ki mon pa pe mazine kwa ki kapab ganny fer pour swa deblok en sityasyon, swa kan tel ou tel proze pou konmanse, oubyen ki mannyer mon pou sey rod lasistans pou

asiste zabitan dan mon distrik Cascade.

En distrik avek bokou defi, me ki kantmenm sa responsabilite ki zabitan i donn mwan, i fer ki i en lobligasyon pou sey rod solisyon e fer sa distrik avek son zabitan bouz de lavan.

Parfwa i annan sityasyon kot ou kapab ed sa zabitan avek son problemn dan en kourt peryod letan, me parfwa osi i pran letan pou kapab fer sa. Sa ki ou'n kapab ede i souvan remersye ou, menm si i pa touzour leka, me sa ki son sityasyon pa ankor ganny rezourd parfwa i santi fristrasyon e anler zot mazine ki ou'n bliy zot, me sa i pa leka.

Me nou bezwen admet osi ki annan sityasyon ki nou konman *MNA*, nou pa pou zanmen kapab rezourd akoz nou osi nou annan nou limit. E la Mr Speaker, mon pou lans en lapel avek tou nou bann zabitan pou nou adopte sa lespri kominoter e sa mantalite ed nou prosen. Si i annan en proze semen ki bezwen pas lo ou propriyete e ki pa pou ni menm afekte ou, annou diskite, e tonm dakor pou ki sa proze i a kapab demare, e soufrans sa bann zabitan ki pe esper sa proze semen a anfen benefisyè.

Souvan ou vwar bann Dokter lo *Facebook* pe fer bann kritik san ki zot konnen kwa ki pe ganny fer par deryer pou ki en problemn i ganny rezourd.

Mr Speaker, dan distrik mon travay avek en *DA*, mon *clerk* ek lezot *staff* kot biro Ladministrasyon Distrik. Menm si onorab Uranie ek Onorab Herminie in dir nou'n pous tou siporter *US* dan Gouvernman, mwan mon pe travay ek siporter son parti.

Nou bi prensipal se pa politik, me byennet sa distrik ki apel Cascade. Lo mon kote i pou touzour reste koumsa e mon espere ki sa i ava leka pou lezot.

An 2021, anvi problemn ekonomik, nou ti ganny zis R200mil pou proze distrik. E nou ti servi sa pou fer en proze dan leo Cascade pou rezourd en problemn linondasyon ki ti pe afekte bann zabitan sa sou distrik.

An 2022 nou ti ganny 740 mil tel parey in leka pou sa lannen. E avek sa nou'n kapab konplet plizyer proze, tel parey plizyer *bin site* ki'n ganny repare oubyen konstrir, e drenaz ki'n ganny repare. Sa lannen nou annan en gran lalis proze e parmi i annan detrwa proze semen. Nou konvenki ki nou pou kapab realiz mazorite sa bann proze.

Re sirfas bann semen segonder dan distrik pou kontinyen e sa detrwa ki reste pou ganny fer byento. E la mon mazin bann zabitan anler kot masin koltar ti ete. Sa semen in deteryore e byento i ava ganny en nivo sirfas pou soulaz zot soufrans.

Mon pou profite Mr Speaker, pou remersye sa lekip *SLTA* ki touzour pe fer en travay ekselan. Lalimyer pe ganny enstale dan plizyer sou distrik e mon kontan vwar ki bann zabitan i apresye sa travay ki pe ganny fer.

Plizyer pti semen ki pou bokou lannen ti dan fernwanr pe finalman ganny eklere. Remersiman i osi pou sa de zofisyé *LWMA* ki fer sir tou le Lendi zot lo teren avek *DA*, pou asire ki sa bann kontrakter pe vreman delivre dapre zot kontra. Ler distrik i mal ganny netwaye, se *MNA* ki ganny montre ledwa.

E la mon pou dir *LWMA* osi pou fer bouze nou bann *request* pou *one-off*, kot sa bann landrwa ki pa tonm dan kontra i a kapab ganny netwaye o pli vit posibil. Zofisyé later pou Cascade e *Planning* osi i touzour disponib pou esey rezourd bann *case* ki ganny met a zot latansyon. E pou sa mon remersye zot, e espere ki bann

zabitan ki zot *case* later pa ankor ganny rezourd a byento ganny *deal* avek.

Mr Speaker, diskisyon avek lotorite konsernen in konmansé lo dezyenm faz proze 24/24 Vilaz Zonblon Petit Paris. E sa proze pou demare byento. Lenfrastruktir sportif dan distrik pe ganny repare. *Court* in ganny en nouvo vizaz e byento sa laplenn ki ti'n ganny abandonnen Anse Dezennen pou osi ganny transformen.

Travay in fini komansé Mr Speaker, e mon pou profite pou remersye tou sa bann endividi prive ki enplike dan sa proze tel parey Mr Suketu Patel, *Vijay Construction*, Lucas, Costa e lezot ankor. Bann manrmay dan leo Cascade pou osi byento vwar transformasyon sa pti laplenn ki'n zis la abandonnen pandan tou sa lannen.

Mr Speaker, i annan plizyer endividi e biznes prive ki a sak fwa ki nou tap zot laport zot pare pou asiste distrik e mon pou dir zot en gran mersi.

E mon pou lans en lapel avek lezot pou vin donn en sipor, sirtou an term proze tel parey *Vijay* pe fer, e osi parey *Rotary Club Coco De Mer*, ki pe donn nou en nouvo *bus stop* Petit Paris. Nou de lekip sport dan distrik, Cascade *Bullets* nou lekip *basket* e nou lekip

volleyball madanm i osi bezwen sipor.

Remersiman pou Mr Ralf Estico, ki pe ede ek sa lekip *basket* e la mon pou remersye Prezidan Larepublik pour son led personnel ki'n fer ki nou lekip *volleyball* madanm in kapab deplase pou partisip dan konpetisyon Klib Losean Endyen. E mon pou remersye tou dimoun lo *management* ki'n devoue pou sa lekip.

Mr Speaker Cascade pou byento annan pa zis en nouvo sant kominoter, me osi en nouvo biro Ladministrasyon Distrik. Travay i sipoze konmanse apartir Zilyet sa lannen.

Mr Speaker, lavenir nou pei i briyan e sa fondasyon solid in fini ganny enstale. Fodre pa ki Seselwa i les zot ganny anbete avek sa bann Dokter negativite e ki swazir pou *boycott* menm louvertir Lasanble Nasyonal. *Valentine's Day* pa en lafet ki ganny selebre zour Lafet de Mor Mr Speaker.

Ler mon pe terminen Mr Speaker, mon pou zis donn en konsey gratwit pep Seselwa, e mon espere ki zot a reflexir byen lo la.

Mr Speaker, ler ou annan ou en transpor ki ou'n servi pandan plis ki 40an e ki *mileage* lo la in tous plafon,

larouy in fer lakaz lo la, e menm pyes in aret ganny fer pou sa mark transport. Ler ou'n pran desizyon pou ou al aste en loto nef e pran sa enn vye ki'n rouye e al met li lo *landfill* Providence.

Silvouple, pa retourn lo ou desizyon, pou kit ou loto nef ki ou'n fek aste, e pou ou al retir sa katyapo lo *landfill*! Akoz nou tou nou konnen ki i pou kit ou dan semen e ni kot *exit* dan Providence ou pa pou arive. Mersi Mr Speaker.

(APPLAUSE)

MR DEPUTY SPEAKER

Mersi Onorab Monthy. Prosen entervenans lo lalis se Onorab Flory Larue.

HON FLORY LARUE

Mersi Mr Speaker. Bonn apre midi Mr Speaker e koleg Onorab e tou dimoun a lekout.

Prezidan Ramkalawan in koz fran avek pep Seselwa e in adres en santiman. En santiman ki popilasyon i santi e enn ki li menm li i santi. Fristrasyon. Son pep i fristre e li i fristre. I fer son 3enm repons SONA ki i fer koman Prezidan depi Oktob 2020, 2an 5mwan e non pa 3an pase depi ler ki nou'n fer eleksyon.

En zonm 62an ki pe partisip dan lavi politik son pei

depi dan bann lannen 1990. Dan plis ki 30an dan sa parkour nou kapab dir ki en Prezidan ki konn bokou Seselwa personnelman e in pas preske dan tou lakour dan Sesel, i vwar e tann zot bann sityasyon li menm.

Kwa sa bann sityasyon? Eski nou oubliye? Nou ti en pep kot standar pou ganny servi dan Sekter Piblik ti vin avek ki kantite afilye ou ti afilye avek en serten kouler e parti politik. Ouswa ki kantite abilite ou ti annan pou fer krwar ki ou ti siport zot. Ou ti bezwen pas ou letan zwe rol, pa kritike, pa demann keston, toler koripsyon par ferm ou lizye pangar ou perdi ou bouse manze.

Toler move fason fer ti vin enorm pou pa ganny viktimize. Promosyon e loportinite devlopman pa ti touzour vin avek abilite me avek lezot rezon. Pep Seselwa eski zot konnen kwa ki mon pe koz lo la?

Mon ti form par sizenm Lasanble e mon ti pe travay ansanm avek en tim pou reget Gouvernman nou pei. Nou ti fer travay dan sa Lasanble koman en Lasanble responsab pou akonpany nou pep pou konpran sa mo gouvrenans e responsabilite ki vin avek. Mon oule fer rapel pep Seselwa ki

Leader Lopoziyon sa letan ti Onorab Wavel Ramkalawan. Ozordi Prezidan Sesel. Nou ti siport son plan e nou'n met li koman Prezidan.

Mr Speaker, eski nou bliye ki program pli televize dan Sesel ti program Lasanble dan Mardi ek Merkredi? Radyo ti fini laboutik e topik konversasyon ti toultan lo bann travay ki ti pe ganny fer, *Leader* Lopoziyon ek son tim sa letan ti konstaman pe revel bann sityasyon dan pei e pe propoz ba plan travay pou konpliment bann azanda travay Gouvernman dizour.

Apre sa 4an dan Lasanble kot Prezidan Ramkalawan koman *Leader* Lopoziyon in koz fran, e in dir nou ki i pou remet balans dan sa sistenm ki gouvren nou pei pa repete a plizyer repriz ki i pou fer Sesel en pei ki annan *rule of law*.

I ti met lanfaz lo travay dapre en sistenm kot napa faver ki ganny fer pou en sitwayen ler i vin rod en Servis Piblik, me i ganny en servis ki in erite a en standar lapolites eleve e sirtou dan en dele letan akseptab.

Mon oule dir zot ki Prezidan Wavel Ramkalawan koman en *Leader* Lopoziyon ti en dimoun ki ti travay dir, i ti vin dan son biro toulezour depi avan 7er bomaten e ziska

a pepre 6er diswar. I ti lir tou rapor ki ti annan pou fer ek nou pei e menm koman en Manm Parlman i ti angaz li lo bann travay lo nivo enternasyonal.

La sa *FPAC* ki nou pep pa ti konnen i egziste, i ti fer sesyon apre sesyon pou devwal bann standar deplorab ki Gouvernman *US* ti annan. Bann keksoz ki ti fer nou demann nou lekor be sa bann dimoun apre plis ki 40an i kapab kontinyen fer marse nou pei dan sa fason?

Kot kontra ti ganny fer ek *Irish* pou sepa konbyen milyon. Kontra disparet *State House* apre reaparet dan en loto e tou sa bann boutey *whisky*. Apre nou a tann dir ki nou ki ti dan pye mang, ki nou pe manz tou mang. O kontrer nou'n protez nou pye mang ler sounami in pase dan sa dernyen 2an. Nou pe tay nou pye mang, nou pe met langre avek e deza nou pe komans vwar rekolt.

Mr Speaker, nou'n tann en pake lesou sorti lot kote latab. Eski Onorab *Leader* parti minoriter ek son tim i kapab donn nou pei e nou parti lesou lo zesyon?

Ozordi koman Prezidan, sa menm zonm avek menm pasyon son biro i *State House*. Me sa labitid travay for i ankor avek li. In deza fer premye

meeting State House 5er bomaten e enn son pli long lazournen i ti kit *State House* 11er diswar. I napa en lasanm dormi *State House*. Sa ladministrasyon ozordi in tire sa kalite fonksyon ki sertennman pa ti ganny servi pou repoze.

Dan son bann sesyon travay, son sel priyorite se pou zwenn son bann Minis e zofisyè pou deblok bann plan travay pou pei e non pa zwenn man piblik dan en lasanm prive pou promot zot pou fer zot *loan* disparet. Pardon Mr Speaker. Pou promet zot pou fer zot *loan* disparet, pou promet zot pou donn zot en later ouswa lezot kalite faver ki pa zanmen aparet dan en *file*.

Mr Ramkalawan koman Prezidan, letan i ti pe fer son konpanyi i ti koz lo sanzman, lo transformasyon nou pei e nou ti dakor e se sa direksyon ki nou, nou ti oule. Modernizasyon, regilasyon, en sistenm egal pou tou dimoun.

In komans sa travay par enkli tou Seselwa, an di-z-an Sesel i pour tou son zanfan. In donn tou dimoun en loportinite pou zwenn sa traze.

Mr Speaker, sanzman i en mo ki konplike. I vedir sanz tou ou fason fer, sanz ou konportman, sanz ou valer,

sanz ou latitid me sa pa ganny fer par sanz kouler miray, par konstrir en batiman ouswa en semen. Me i en aksyon personnel ki sak endividi i bezwen fer lo li menm.

Kiltir sanzman, *culture of change* i enn bann keksoz pli difisil pou etabli dan en striktir ki'n annan en fason fer san direksyon. Sa pa ti zis en kri batay kanpany eleksyon me en fe ki pe ariv otour nou. Avek globalizasyon, progre rapid dan teknolozi e en lanfaz spesifik ki pe ganny mete lo lefikasite, i fer ki amelyorasyon par transform nou administrasyon i enkontrolab.

Ler sanzman pe ganny enplimante, i souvan annan rezistans, sa i fer ki bokou latansyon i bezwen ganny donnen avek sa proses. Nou kanpany sanzman ti anmenn *LDS State House* an Oktob 2020.

Mr Speaker, mon ti a kontan demann pep Seselwa e nou Lasanble, eski nou'n deza mazine ki mannyer sa sanzman ti pou ete si ti napa *COVID* an 2020? Si *erport* pa ti fermen pou plis ki lan, si ti napa lager *Ukraine* ki'n anmenn en destabilizasyon dan lemonn kot bann komodite in vin rar lo marse? La mon pe koz lo delwil manze, lafarin ek lezot

komodite de baz. Tousala dan nou premye 2an. Ki mannyer Prezidan Ramkalawan in fer?

Se son karakter for, son perseverans e son determinasyon pou li fer sir i konpran bann sityasyon. Son abilite pou kapab gard en tim ansanm, in kapab fer bann desizyon brav ki ti bezwen ganny pran e ganny pran vitman.

Nou pep in manze, nou travayer in ganny en saler, nou lekonomi in rebran. En keksoz ki mon garanti i si Wavel John Charles Ramkalawan pa ti Prezidan Sesel, pa ti pou koumsa.

Eski nou mazine ki sityasyon nou ti pou ladan si parti minoriter ki ti'n ganny eleksyon? Zis get zot listwar. Vyolans, met bonm dan sak vakwa, labi drwa imen, pran bann aki e protez zot aki. Get bann desizyon ler pei ti pe fer sitan byen, pa dan kriz. Bann desizyon ki'n anfans nou laliny aeryen ziska preske fait. Nou pei zot in fer fait e ki mannyer zot in toultan get zis sot lekor.

Si *US* ti o pouvwar nou pa ti pou zis fristre, me nou ti pou dan en lot kalite parol pa nonmen. Me an menm tan ganny tou sa ki nou'n erite avek en Gouvernman *US*. En serten group dimoun ki pa respekte

zot prosen ek zot kominote par zwe lanmizik for ziska tou keksoz i tranble dan lakaz. E pa dir zot naryen zot pou koup ou ek en kouto.

En fason viv kot vyolans domestik i kouran partou, kot labi zanfan ti'n vin en *sport* nasyonal, vole ti travay pli atiran ki nou zenn ti oule fer. Kot gard ti napa okenn kontrol, en lenfestasyon drog dan tou kous tou sosyete e sa program *BBC* ki'n kas nou leker in montre ki mannyer serten nou pep pe viv.

Pa bliye pa fek arive tousala. En pei kot nou pa ti zis fristre me viv dan lafreyer dan nou lakour ek dan nou kominote. Avek tou sa ta problem ki ti lo lasyet nou bann *leaders*, tou dimoun ti ankor pe ganny en saler.

E avek tou defi ki nou'n traverse lannen pase en lanons ti ganny fer dan Bidze pou en logmantasyon 10poursan dan saler travayer Sekter Piblik ki pou arive an Avril 2023.

Sa logmantasyon i garanti ki sa ki lo saler pli ba i garanti ganny R1000 an plis lo son saler si son 10poursan i pli ba ki R1000. Parti *US* an 2019 ti propoz en 5poursan logmantasyon lo saler zot pa ti dan okenn problem ekonomik e ti napa bouwersman

mondyal, sa ti pou fer ki sa ki ti lo saler pli ba ti pou ganny en ogmantasyon R250.

Avek vizyon *LDS* dan Lasanble, ti propoze ki sa i ganny rekonsidere par donn 450 tou dimoun pou benefis sa ki lo saler pli ba. Sa ti ganny rezete par Parti *US* apre zot vin dir nou ki nou pa enterese avek pos Seselwa.

Mr Speaker, eski pep Seselwa i realize ki sa logmantasyon in vin zis 2an apre Oktob 2020?

Ler nou'n perdi 2an pou re stabiliz nou pei e nou pep nou Prezidan i retourn ankor ver servis prensipal en Gouvernman ki Servis Piblik. Gouvernman pe met lanfaz dan fer son servis vin pli performan, sa i pou direkteman benefisyte Sekter Prive ki pou kontinyen donn rezilta atraver en lekonomi pli performan.

Mr Speaker, permet mwan pou fer en sitasyon. "Sa ki enteres mwan e ki tou Seselwa san distenksyon i resevwar menm servis e bon tretman. Sa ki enteres mwan i ou lwayote ver sa Gouvernman ki'n ganny elekte par lepep. Si ou pa kapab respe sa bann kriter napa plas pou ou dan Servis Piblik". Fen sitasyon. Sa ti ganny dir par Prezidan James Michel dan *SONA* 2016.

Mr Speaker servis i rol prensipal en Gouvernman e nou vwar ki fristrasyon mankman dan sa bann servis i reel. E Prezidan Ramkalawan i pe fer fas avek sa. Koman Sef sa Nasyon parey plizyer Manm parti minoriter in fer remarke se li sef sa servis.

In profite avek loportinite SONA pou met sa bann latansyon Lasanble direkteman akoz sa i afekte tou Manm, i donn nou en referans lo kwa en *civil servant*. I en vokasyon par en sitwayen ki dedye son lavi dan Servis Piblik avek en konpetans dan son domenn spesifik pou deservi piblik.

Par son natir i sipoze en domenn pou bann ki kapab sirmont son krwayans politik dan son lavi profesyonnel e travay pou benefis sitwayen son pei.

Dan sa ka mon ti ekspekte ki *Leader* parti minoriter pou sezi sa pwen e kontribye bann sizesyon ou donn bann direktiv pou ede etabli sa pou donn lanmen tir fristrasyon. In mank en loportinite pou ede depolitiz e promouvwar etik dan Servis Piblik.

Kontrer i dir nou si dimoun i ganny pouse zot pou desann kot Lorloz, savedir zot pa krwar ki bann dimoun ki travay kot *PSAB* i konpetan. I

pa krwar ki *Ombudsman* pou kapab entervenir pou regard merit sa bann ka. Mon'n tann li nonm SQA, eski laba i annan nouvo dimoun ki prezan papye i pran 4 semenn, ouswa sa ka ki ti referans avek ti en ka spesifik?

Mr Speaker, la mon bezwen krwar ki bar i tro o pou sa msye. Akoz ler mon'n ekoute, enn son Manm ki'n koz apre li in ganny plis aklamasyon ki li. Dapre mon konpran i pa ti pe port latansyon parol ki ti pe ganny dir me plito note konbyen fwa nou ti bat lanmen e i konfize akoz nou pa'n debout apre ki nou Prezidan in koze. Alor zot, zot pou debout sak fwa enn zot Manm i koze akoz zot eksite pou zot bat lanmen.

Mr Speaker, mon bezwen dir ki zot pa devret tro eksite akoz Prezidan in dir nou ki rapor *TRNUC* pou ganny prezante avek li le 28 Mars e parey Lalwa i dir sa dokiman pou vin piblik, zot in manke sa pti bout? Sanmenm ki zot dir son *speech* i siperfisyel e pa donn okenn lespwar? Zot ki pe perdi lespwar byen boner?

Pep Seselwa nou viv dan en demokrasi, zour eleksyon pou ariv ankor e zot in byen ekout tou bann revelasyon dan *TRNUC* ki byento pou an blan ek nwanr. Ki pou vin par nou

listwar ki liste tou sa bann pli gro atosite ki Parti *SPUP*, *SPPF*, Parti Lepep e la *US* in fer, mazin byen si i annan en plas pou zot dan lavenir nou pei. Ouswa nou pou kit zot dan sa *bin bag* ki en ansyen Prezidan in kit pei avek e i pa oule retournen.

Ler sa rapor pou vin devan nou Lasanble, nou pou regard bann rekomandasyon ki bann Komisyoner in fer, enn bann travay ki ti komanse avek bokou zefor par Prezidan Ramkalawan avek bi promot linite e rekonsilyasyon. Mr Speaker, la ki nou pou vwar ki manner lot kote latab pou reakte. Dan Kongre zot in dir ki zot atas zot avek bann prensip en serten ero. Nou a gete ki manner zot pou reakte, nou a gete si zot meyer opsyon pou Sesel ouswa zot pou pas an pasan dan en gran presipis.

Nou pou gete si zot pou dir nou ki Mr Brian Victor en gro msye ki ti tonm ater dan lasal *TRNUC* e montre nou ki manner i ti ganny trete apre lese pou mor, i ti plere, i ti akont nou son defi. Ozordi son latet i plen avek bann mark kot in fer plizyer loperasyon e ki ankor fermal.

Dir mwan Mr Speaker eski zot pou vin sant ek nou 🎵 lalang, lalang, lalang, lalang,

lalang, lalang, lalang, lalang, lalang? 🎵.

Mr Speaker, sa bann keksoz i form par nou defayans sosyal kot en pep ti ganny servi par itiliz lafreyer pou reste o pouvwar, akoz zot ti swaf pouvwar. En lafreyer kot ou pa ti ganny drwa koze e zot in perdi konfyans dan zot lekor.

Mr Speaker *LDS* in re donn Seselwa sa konfyans. Prezidan Ramkalawan apre tou sa defi dan son premye 2an ki in sirmonte, in rediriz sa pei dan en direksyon kot ozordi nou tou nou garanti en saler si nou pe travay.

Mr Speaker, in re pran aker en keksoz ki enportan pou nou devlopman, nou Servis Piblik. Se li leker en Gouvernman. Alor nou Prezidan i pe met lanfaz lo la e nou pou siport li.

Pep Seselwa nou'n ariv dan pozisyon kot nou bezwen regard nou lekor e definir nou rol. Si ou en siporter *LDS*, si ou en siporter *US*, e bann ki pa siport okenn parti politik nou tou nou Seselwa. Pa demande ki ou pei i kapab fer pou ou me kwa ki ou kapab fer pou ou pei. Sa kotasyon i sorti dan diskour linogirasyon Prezidan Kennedy an 1961. I enn ki mark demokrasi bann Ameriken ler zot fer referans avek zot pei. Zot

lapartenans patriyotik i pli for ki zot lapartenans politik ler zot fer referans avek sa kotasyon.

Donn sipor en parti pa devret vedir perdi ou etik, ou reste en manman, en papa, en zanfan, en travayer, en koleg. Ou reste en Seselwa. Ou pei i vin premye. Mersi Mr Speaker.

(APPLAUSE)

MR DEPUTY SPEAKER

Mersi Onorab Larue. I ti dernyen entervenans ki nou ti annan lo lalis pou ozordi. Nou pou kontinyen avek larepons bann lezot Manm lo mesaz Prezidan Diskour Leta Lanasyon demen bomaten 9er. Alors nou ava *adjourn* pou ozordi. Mersi.

(ADJOURNMENT)